

BORAPELI BA 'NETE HO MARIA

BORAPELI BA 'NETE HO MARIA



LOUIS-MARIA OA MONTFORT EA HALALELANG

**BORAPELI BA 'NETE
HO MARIA**

LOUIS-MARIA OA MONTFORT EA HALALELANG

SELELEKELA

Ho tloha ha a behoa har'a ba lehlohonolo selemong sa 1888, 'me haholo ho tloha ha a bitsoa ea halalelang ka 1947, Louis Mary Grignon de Montfort (1673-1716); o ile a thoholetsoa ke Baholo ba Kereke. Tse ngotsoeng ke eena, tsa nkuoa ele tse lumellanang hantle le thuto ea Kereke: "Li e-na le cheseho, li tilie, li otlolohile." Ka ho ea ka mantsoe a Pius XII.

Ho tsejua kamoo Mopapa Johannes-Paulosi II, a ratang morutimotsamai enoa kateng. O bontšitse pepeneneng lerato lena, 'me ho feta moo, o khethile mantsoe a tsoang bukeng ea mohalaleli enoa (*Borapeli ba 'Nete*); ho ba lepetjo la hae; esita le ha a khethiloe ho ba Mopapa: TOTUS TUUS, ke ho re: Oa hao ka ho tlala!

Johannes-Paulosi, joaloka ba bangata, ha a thekesele ha a re: Buka ena ea *Borapeli ba 'Nete*, e ile ea fetola bophelo ba hae. Louis de Montfort ea halalelang, o bile le tšusumetso e kholo Kerekeng; 'me o tla 'ne a be le eona ho feta. Thutong ea hae, mangolong a hae, esita le meqoqong ea hae, o n'a bontša tsebo e makatsang, ea tse tla etsahala Kerekeng nakong tse tlang.

Ka ho ea ka polelo ea Louis de Montfort, buka ea hae e ile ea e-ba pinyane lilemo tse lekholo, 'me selemo ke sa lekholo le mashome a mahlano, buka ea *Borapeli ba 'Nete*, e ile ea fumanoa ke Moprista e mong oa Montfort. Ho tloha nakong eo, buka e ile ea hasanngoa lefatšeng lohle, e fetoletsoe lipuong tse ngata.

Buka ena ke karolo e 'ngoe, ea libuka tsa Louis de Montfort, e bitsoang *Lerato la Bohlale bo sa Feleng*. E kileng ea ratoa haholo har'a lingolioeng tsa hae, 'me ea etsa hore ebe sengoli se tummeng lefatšeng.

Bukeng ena e nyenyane e ngotsoeng ka potlako, Louis de Montfort o ile a akaretsa thuto ea Kereke, malebana le Maria 'M'a-Jesu. O ruta ka matla, kamoo e mong le e mong a amanang le Maria ho Kriste. O bontša kamoo boinehelo ho Maria, re le makhoba a hae, bo tšoanang le nchafatso ea lipallo tsa rona tsa hlatsuo. O re bolella 'nete e re thusang, ha a re: Maria ke foromo e re tšoantsang le Jesu Kriste.

Louis de Montfort, o supa sebaka sa Maria, eseng feela morerong oa ho pholosa lefatše lohle, empa esita le bophelong ba motho e mong le e mong. Ha motho a rata ho ba matla, o lokela ho ipeha matsohong a Maria; ele hore a tle a tšoane le Jesu Kriste.

Lekholong la 17, mehleng ea bo-Bartolomi de Los Rios, Mocardinale Berulle, le Henri Boudon, bokhoba bo halalelang, e ne e le mokhoa oa bophelo ba moea. Montfort eena o ile a tebisa thuto, eseng feela holim'a hore

First Edition	1992
Second Edition	1994
Third Edition	1996

March 25th, 1992

Maria ke 'Mamolimo; empa le hore ke 'M'a Kereke, Monyaluoa oa Moea o Halalelang. A hhalosa kabelo ea hae nalaneng ea topollo, a ntsetsa pele thuto holim'a Bo-'M'a Molimo ba Maria, holim'a bo-'M'a Kereke ba Maria, holim'a Maria ele monyaluoa oa Moea o Halalelang, le holim'a kabelo ea hae, mosebetsing oa ho pholosa lefatše.

Borapeli ba 'Nete ho Maria Movirigo, hase buka ea lithapelo; empa e supa tsela e nepahetseng ea bophelo ba moea, bo hahiloeng holim'a mokhoa o khethhehileng, oa bophelo bo kahare. Ka ho ea ka thuto ena ea de Montfort, Maria ke setsi sa bophelo ba moea, ke pelo ea tseleng e 'ngoe le e 'ngoe e isang ho Molimo.

Selemong sena, seo eleng sa lekholo le mashome a mahlano, buka ena e utulotsoe, le selemo sa mashome a supileng le metso e mehlano, Maria a ile a iponahatsa Fatima, Bo-Ntate ba de Montfort, ba thabile ho hlahisa buka ena e fetoletoeng Sesothong, ke Ntate Johannes Ntaote Letsie O.M.I. Re tsepa hore e tla thusa Basotho, ho tseba Maria ho feta; le ho metsisa tumelong le leratong la hae.

Ntate Attilio Corna s.m.m.

Lesotho 1992

KHATISO EA BOBELI

Bukahali ena ea bohlokoahali eo re e hatisang khetlo la bobeli, e topetse joaloka parafini fatše; kapa joaloka moholi ha tsatsi le chaba! Khatisong ea pele, re ntšitse buka tse sekete, empa tsa fela ka nako le motsotsotso. Batho ba ne ba re tsekisa le tseo re itheketseng tsona! Mokriste e mong o ne a re ho 'na: "Ho tloha joale ha ke sa tla reka buka e 'ngoe hape, ntle ho ena!" Buka ena ke ea bohlokoahali ho bohole kaofela balumeli, ho sa natsoe mahlofo a bona; ba banyenyane le ba baholo; esita le baprista le baitlami.

Bohlokoahali ba buka ena bo pakoa ke Morena Papa Johannese-Paolosi II, ka ho qotsula mantsoe a Lepetjo la hae ho eona: "KE OA HAO KA HO TLALA." Joaloka Paolosi ea Halalelang, Morena Papa o re, buka ena e ile ea fetola bophelo ba hae. Ha re e baleng, re e pheleng kaofela.

M.C. Mehlala, O.M.I.

Mophatlalatsi.

Buka e ntlehali ena, e hatisitsoe ka Sesotho khale. Re iktloa re le motlotlo, re bile re le lehlohonolo haholo, hore e be ka selemo sena sa 1992, sa Jubile ea lemo tse 75 ea Boiponahatso ba Mofumahali oa Fatima ka 1917, re ba le monyetla oa ho bala buka ena ea bohloko; e ngotsoeng ke Louis de Montfort ea Halalelang. Ea entseng boikhathatso ba ho ngola a tebisitse maikutlo, ka Maria Movirigo. E re ruta kamoo re ka kenang Tseleng ea Molimo, le ho tsamaea tseleng eo, hammoho le Maria 'M'a-Jesu. Ke tsepa hore ba bangata, ba tla ithuta Tsela ena.

† Paul Khoarai
Mobishopo oa Leribe

SELELEKELA SA LITABA



Joanner Paulus P.P.E

- 1* Ke ka Movirigo ea Halalelang Maria, ha Jesu a tlile lefatšeng, 'me o tla busa lefatšeng, ka eena Maria.
- 2* Maria o n'a sa bonoe ha nts'a phela. Ke kahoo Moea o Halalelang le Kereke, ba 'mitsang: "Alma Mater": "Mè Moanyisi". Boikokobetso ba hae bo ne bo tebile haholo, hoo a neng a sekametse ho inyelisa le ho se bonoe ke batho; e le hore ka hona, a tle a tsejoe ke Molimo feela.
- 3* Molimo o ile a rata hore, a fele a patehe Kemolong, Tsoalong, Bophelong, Tsohong le Nyollelong ea hae Leholidmong. Ele ha a arabela lithapelo tseo Maria, a neng a li etsa hore a patehe; a fumanehe, a kokobetsoe. Esitana le batoali ba hae, ba ne ba sa tsebe boholo ba hae. Mangeloi a n'a hlola a ipotsa a re: "Ke mang eo?" Hobane Molimo, o n'a a patetse boholo ba Maria. Seo a neng a se tseba holim'a hae, e ne ese letho; ha se bapisoa le tseo Molimo, a neng a a patetse tsona.
- 4* Molimo-Ntate, a mo lumella hore a se ke a etsa mehlo-
lo, bonyane e pepeneneng; le hoja a n'a mo nehile
matla a ho e etsa. Molimo-Mora, o n'a mo lumelle ho bua
hanyenyane feela, le hoja a n'a mo file Bohlale ba hae.
Molimo-Moea o Halalelang, leha Maria e le monyaluoa oa
Oona, o n'o lumelle Baapostola le Bangoli ba Evangeli, ho bua
ka Eena hanyenyane feela, ho lekana hore Jesu a tsejoe.
- 5* Maria ke sebabatso sa mohlololo sa Morena Molimo!
Seo a ipoloketseng sona, hore se bonoe ke Eena feela,
ka ho tlala. Maria, ke 'Mè ea babatsehang oa Mor'a Molimo, eo
a ratileng hore a kokobetsoe; 'me a patehe ka nako ea bophelo
ba hae. Ka baka lena, a 'mitsa ka lebitso la: "Mulier": "Mosali",
joalokaha eka ke molichaba feela; leha pelong ea Hae, a n'a
mo tlotlisa; a bile a mo rata ho feta Bahalaleli le Mangeloi
'ohle. Maria, ke seliba se lika-likelitsoeng sa Moea o Halalelang;

joalokaha ele Monyaluo ea tsepahalang oa Hae a inotši. Maria, ke sehalalelo le phomolelo ea Boraro bo Halalelang, moo Molimo a lutseng teng, ka borena le ka Bomolimo ba hae; ho feta libakeng tsohle tsa maholimo le lefatše, ho feta esita le har'a Mangeloi: Bo-Kerubime le Bo-Serafime. 'Me ha ho lumeloe sebopua sefe kapa sefe, leha se ka halalela joang kapa joang, ho kena sehalalelong seno; haese ka tšitso e itseng ea mohlolo.

6* Ke bua joaloka bona Bahalaleli, ke re: Ke eena feela ea nang le kopano e tsotehang le Molimo; ke leholimo la Adama e mocha lefatšeng, moo a neng a inkele nama ka matla a Moea o Halalelang. Ele hore a tle a sebetse teng meeka le mehlolo, e fetang kelello ea rona. Maria ke mohlolo oa lefatše la Molimo; moo botle le mabenyane a fahlang mahlo, li behiloeng teng. Maria ke Botlotlehi ba Ea-holimolimo! Moo, joaloka sefubeng sa Hae, Molimo a patileng Mora a inotši oa Hae; le tsohle tse ratehang haholo, 'me le tsa bohloko. Oho, ke mohlolo feela, seo Molimo a se entseng ka sebopua sena, se babatsehang! Leha Maria e le boikokobetso ka bobona, o ile a tlameha ho bolela a re: "Ea matla o nketseli-tse tse kholo!" Lefatše ha le li tsebe, hobane ha le tšoaneloe ke tsebo ea tsona, 'me le ke ke la li tseba.

7* Bahalaleli ba boletse tse tsotehang, holim'a motse ona o halalelang oa Molimo. 'Me joalokaha le bona ba ntse ba tiisa, ba ne ba le kheleke, ba ikutloa ba le motlotlo ha ba ne ba bua ka eena; ho feta ha ba bua ka eng le eng. Ke re leha ho le joalo, ba ne ba qetella ka ho phatlalatsa, hore bophahamo ba meuno, e mo phahamiselitseng teroneng ea Molimo, hase bo ka fihleloang ke mothol! Bophara ba rato la hae, bo batsi ho feta lefatše; kannete, bo ke ke ba lekanngoa. Boholo ba matla ao a nang le 'ona, holim'a Molimo ka sebele sa Oona, bo ke ke ba nahanoa. Le hore botebo ba boikokobetso ba hae, ba makhabane a moea, le ba ligrasia, ke mohohlo o sa bonoeng phele-tso. Oho, bophahamo bo sa fihleloeng! Oho, bophara bo tsote-

hang! Oho, boholo bo ke keng ba kopjoa! Oho, holokohlo e se nang khutlelo!

8* Ka matsatsi 'ohle, ho tloha ntlheng e 'ngoe ea lefatše ho isa ho e 'ngoe, maholimong a holimo, esita le bote-bong ba mehohlohalo e sa bonoeng pheletso, tsohle li eme li ruta, li phatlalatsa Maria ea babatsehang! Mangeloi le lihlo-phat tsa 'ona tse robong, batho bohle, ba mefuta eohle, ba boemo bofe kapa bofe, le ba lithuto tsohle, baloki le ba khopo; esita le lisatane ka botsona, leha ba rata kapa ba sa rate, bohle ba tlanngoe ke 'nete ho 'mitsa; "Ea Lehlohonolo." Bonaventura ea halalelang, o re bolella hore Mangeloi 'ohle leholimong, a nts'a hoa, a re: "Ua halalela, ua halalela, ua halalela Maria, 'M'a Molimo le Movirigo!" *Le hore ka letsatsi lohle, ba mo lumelisa ba sa tsoa mo lumelisa:* Ahe Maria! Ba itihela fatše-fatše ka lifahleho, ba mo kopa hore a mp'a be mosa, ho ba fa lehloholo, la ho rongoa ke Eena. Augustinus ea halalelang, o bolella hore Mikael ea halalelang, leha e le eena Khosana ea Makhotla a leholimo, o sehlahlo ho mo hlonepha; 'me o etsa hore a hlomphuoe. A nts'a le tsebe e lethoethoe ho rongoa ke Eena; ho ea thusa e mong, oa bahlanka ba Maria.

9* Lefatše lohle le tletse letlotlo la hae, haholo-holo har'a bakriste moo a khethiloeng, ele mosireletsi oa mebuso e mengata, oa metse le metsana. Matlo a mangata a Molimo, a hlohonolofalelitsoeng Tšebeletso ea Hae, a behiloe tlas'a lebitso la Maria. Ha ho ntlo ea Molimo, e senang aletare ea Maria. Ha ho naha kapa motse, o hlokang litšoantšo tsa hae tsa mehlolo; moo likotsi le maloetse 'ohle a phekoloang, le melemo-lemo ea mefuta-futa e fumanoang teng. Ke mang ea ka balang palo ea likopano tsa bakriste, tse hlomiloeng ka ho mo hlonepha? 'Me li ngata likopano tsa Baitlami, tse behiloeng paballong ea hae. Ba bakae, har'a litho tsa likopano tseo, ba bolelang mehauhelo ea hae, ba binang lithoko tsa hae! Masea 'ohle a ea mo tumisa, ka ho bitsa mantsoe ana "Ahe Maria!" "Ahe Maria!" Ha ho moetsalibe leha a s'a thata-

fetse pelong, ea se nang tšeponyana ho eena. Ruri, esita le meea e mebe liheleng, e ea mo hlompha; leha e ntse e mo tšaba!

10* Ka mor'a tsena, re tlamehile ho bua joaloka Bahalaleli re re: Tsa Maria ha li qetoe! Maria ha re e-s'o mo tlotsi-se, ha re e-s'o mo phahamise, leha ele ho mo hlompha, ho mo rata, ho mo sebeletsa; ka ho ea kamoo, a lokelang kateng. Tsena, ke tseo esaleng li mo lokela, tlotsiso e fetang, hlompho e fetang, lerato le fetang le tšebeletso e fetang.

11* Re ka isa pele ho bolela le Moea o Halalelang, ra re: "Tlotliso, ea Morali oa Morena, e kahare". Tlotliso eohle, eo a e nehoang ke maholimo le lefatše hase letho; ha e bapisoa le eo a e nehoang ke 'Mopi. Es a tsejoeng ke libupuo, tse haelloang ke ho fihlela makunutu, a tebileng a Morena.

12* Re ka isa pele, ra hoa le Moapostola ra re: Leihlo ha le e-s'o bone, tsèbè ha e-s'o utloe, ha bo e-s'o kene ka pelong ea motho; bottle, boholo le botlotlehi ba Maria. Ke mehlolo ea mehlolo ea grasia, ea tlhaho le ea letlotlo. Haeba u rata ho utloisia Maria ka ho tlala, qala ka ho utloisia Mora, ho rialo Mohalaleli. Hobane ke 'M'a Molimo, ea mo tšoanelang. Mona, maleme 'ohle a ke a khutse!

13* Ke motlotlo hore e be ke ngotse sena seo ke se ngo-tseng; ho bontša hore ho fihlela joale, Maria ha e-s'o tsejoe. 'Me ke le leng la mabaka a hore, ebe Jesu Kriste o tlameha ho tla lefatšeng! Ho tla ba joalo feela, ha 'Muso oa Maria o s'o tlile. Maria, ea neng a mo tlise la pele lefatšeng, o tla mo hlahisa ho batho, hore a tsejoe ke bona.

KHAOLO EA PELE

TLHOKAHALO EA BORAPELI HO MARIA MOVIRIGO

14* Erekaha Maria e le sebupuo, se tsoang liatleng tsa Morena Molimo, ke tiisa hammoho le Kereke eohle, hore: Ke kokoanyana feela, ha a bapisoa le Botlotlehi ba Hae bo sa feleng. Nka mpa ka re: Maria ke lefeela-felane, hobane Molimo feela ke "Ea teng kamehla." Kahoo, Morena eo e Molo ea ipusang, 'me ea itekaneng ka Boeena, ha a hloke motho; esita le Eena Maria Movirigo, ha a ka a mo hloka! 'Me a ke ke a mo hloka, ho phetha Thato ea Hae, le ho hlahisa letlotlo la hae.

15* A ka laela feela, 'me tsohle tsa e-ba teng. Empa leha ho le joalo ke re: Ha re nka lintho kamoo li leng kateng hona joale, Morena Molimo o ratile ho qala, le ho phetha mesebetsi e meholohali, ka Movirigo ea halalelang haholo, haesale a mo bopile. 'Me a ke ke a fetoha mererong ea Hae ea Bosafeleng; hobane ke Molimo, ha a fetoha mehopolong le liketsong tsa Hae.

HLOHO EA PELE: METHEO EA BORAPELI HO MARIA

1. Morena Molimo o ratile ho iketsa Motho ka Maria.

16* Molimo-Ntate, ha a ka a fana ka Mora oa Hae a inotši ho lefatše, haese ka Maria. Baholo-holo ba halalelang, ba ne ba tletse mesisimoloho. Baprofeta le Bahalaleli ba molao oa khale, ba ne ba nyollela mehopolo le pelo tsa bona ho Molimo, ka lilemo tse likete tse 'ne tse tletseng; ho fumana letlotlo lena, empa e bile Maria feela ea le fumanang. Ke Maria feela, ea fumaneng mohau ho Morena Molimo, ka matla a thapelo tsa hae, le ka makhabane a moea oa hae: Lefatše le ne le sa tšoanele ho amohela Mor'a Molimo, liatleng tsa Ntate! Ho rialo Mohalaleli Augustinus. O mo nehile Maria, hore lefatše le tle le mo amohele ka eena. Mor'a Molimo o ikentse

Motho; hore re pholohe. Hona, a ho etsa ho Maria le ka Maria. Molimo-Moea o Halalelang, o hlotse Jesu Kreste ka ho Maria. Empa hona ha etsahala hobane a mo kope tumello; ka e mong oa Bahlanka ba Oona ba kapele, Lekhotleng la Oona.

17* Molimo-Ntate, o abetse Maria matla a batsoali ba Hae; ho ea kamoo sebopuo a se ka bang le kabelo, ho bona kateng. Ele hore a mo fe matla a ho tsoala Mor'a Hae, le litho tsohle tsa Kereke, eleng 'Mele oa Hae o tsotehang.

18* Molimo-Mora, o n'a theohela popelong ea hae ea Bovirigo, joaloka Adama e mocha, leholimong la Hae la lefatše, ho iketla teng! Le ho sebetsa ka lekunutu, limakatso tsa grasia ea Hae. Molimo ea ikentseng Motho, o fumane bolokolohi ba ho iphumana, a koaletsoe popelong ea hae. O entse hore Boramatla bohole ba hae bo khanye, ka ho itumella hore a jaroe ke Movirigo, eo ea lehlohonolo. O fumane Tlotliso ea Hae le ea Ntat'ae, ka ho patela libopuo a tsohle mona lefatšeng, mahalihali a Hae; le ho a bontša Maria feela. O tlotlisitse Boipuso bo phethehileng le Bohlomphehi ba Hae, ka ho ipeha tlas'a Movirigo eo ea monate; Kemolong ea Hae, Tsoalong ea Hae, Tlhahisong ea Hae ka Tempeleng, le Bophelong ba Hae bo patehileng, ba lilemo tse mashome a mararo. Esita le lefung la Hae, moo Maria a neng a tlamehe ho ba teng; ele hore Molimo, a tle a etse sehlabelo se le seng feela le eena. Le hore a etsoe secheso ho Ntat'ae oa Bosafeleng, ka kutloano le Maria. Ha e-ba joaloka mohla monene, ha Isaaka a n'a neheloe, ka kutloano le Abrahama, ho Thato ea Morena Molimo. Ke Maria, ea neng a mo antše, a mo fepe, a mo thuse, ea neng a mo holise; 'me a qetella a mo entse sehlabo bakeng la rona.

A mohlolo o ke keng oa utloisisoa oa puso ea Molimo, eo Moea o Halalelang, o sitiloeng ho se bue ka eona Bophelong ba Jesu Kriste! Lehoja O batlile O re patela tsohle tse hlollang, tseo Bohlale bo inketseng Motho, bo li entseng Bophelong bo patehileng ba hae. Joaloka hoja o n'o rata hore bonyane, ka

tšenolelo ena ea Hae, re tle re utloisise lethonyana le leng la bo-hloko, la Bophelo ba hae bo patehileng; le letlotlo la Hae le se nang moeli. Jesu Kriste o nehile Molimo-Ntate, tlotsiso e kholo haholo, ka ho ipeha tlas'a 'M'a Hae; ka nako ea lilemo tsena tse mashome a mararo. Ho feta eo a neng a ka mo neha eona, ka ho sokolla lefatše lohle, ka ho etsa mehlolo ea mehlolo. Ao, re tlotlisa Morena Molimo hakaakang! Ha re rata ho Mo thabisa 'me ka hona, re ipeha tlas'a Maria; ka ho latela Morena oa Rona Jesu Kriste, eleng Eena feela Sesupiso sa Rona!

19* Haeba re qamakisisa Bophelo bohole, ba Moren'a Rona ea Tlotleheng, re tla fumana hore ebile Thato ea Hae, ho qala mehlolo ea Hae ka Maria. O ne a halaletsa Joannes Mohlatsoi ea halalelang, ka popelong ea 'M'ae Elizabetha; empa e ne e be ka lentsoe la Maria. Hang feela hoba Maria a bue, Joannes a halaletsa; 'me ona, e ne ele mohlolo oa pele oa Hae, o mo holohali oa grasia. Moketeng oa Kana, o n'a fetole metsi veine; empa o n'a etse hoo, ka thapelo e boikokobetso ea Maria! 'Me ona, e ne ele mohlolo oa hae oa pele o bonoang ka mahlo. O n'a qale mehlolo ea hae, a ba a e ntše-tsapele ka Maria; 'me o tla 'ne a e ntsetse pele joalo ka Maria, ho fihlela qetellong ea lefatše.

20* Molimo-Moea o Halalelang, o n'o fumanehile ho Molimo – ke ho re, o sa hlahise Molimo – Mopersone e mong. Joale o ruile ka Maria, eo o mo entseng Monyaluo a Hael Ho Maria, le Maria, le ka Maria, Moea o Halalelang, o hlahisitse Sebabatso, seo eleng Molimo, ea ikentseng Motho.

Hape o nts'o hlahisa, 'me o tla 'ne o hlahise bakhethua, hammoho le litho tsa 'Mele o tsotehang; oo Jesu e leng hloho ea Oona, ho fihlela bofelo ba lefatše. Ke ka lebaka lena, e eeng ere Moea o Halalelang, ha o fumana Maria, Monyaluo a Oona ea ratehang, eo O kekeng oa arohana le eena lekhale, a le teng moeeng ofe kapa ofe oa motho, O eeng o sebetse ka mafolo-folo le ka matla a fetang; ele hore O hlahise Jesu Kriste moeeng oo! Le hore moea oo, o bopjoe ho Jesu Kriste.

21* Ha re hlile ha re bolele hore Maria Movirigo, ke eena ea nehang Moea o Halalelang, matla a botsoali, joalokaha eka O n'o se na 'ona ka Booona; hobane Moea o Halalelang, ke Molimo. O na le botsoali le matla a ho bopa, joaloka Ntate le Mora. Empa feela, ha O hlahisetse matla ao a Oona kantle ketsahalong; ha O hlahise Molimo-Mopersone e mong. Hoo re ratang ho ho bolela ke ho re, Moea o Halalelang, o ikhethetse ho sebelisa Movirigo ea halalelang, lehoja O ne O sa tlameha hohang ke eena; ho hlahisa ka ho eena le ka eena, Jesu Kriste le litho tsa Hae. Ke sephiri sa grasia se sa tsejoeng esita le ke ba bohlale-hlale, le ba borapelihali, har'a bakriste.

22* Morero oo Bapersone ba Boraro bo Halalelang, ba ileng ba o phetha ha Mor'a Molimo a iketsa Motho, 'me a e-tla la pele lefatšeng, ba ntse ba o phetha ka matsatsi; ka mokhoa o sa bonoeng, hohle Kerekeng. 'Me Ba tla 'ne ba tsoele-pele ho phetha, ho fihlela bofelong ba mengoaha, ha Jesu Kriste a e-tla la qetello.

23* Molimo-Ntate, o n'a etse pokello ea metsi 'ohle; eaba o bitsa pokello eo leoatle. O entse pokello ea ligrasia tsohle tsa Hae, 'me pokello ena o e bitsa Maria! Molimo enoa ea matla 'ohle, o na le ntlo ea Matlotlo, eo ho eona a behileng tsohle tseo a nang le tsona: Tsa botle, tsa mahalima, tsa mehlolo le tsa bohlokoahali esita le Mora oa Hae. 'Me ntlo ena ea matlotlo 'ohle, ke Maria. Eo Bahalaleli, ba 'mitsang Letlotlo la Morena! Leo khaphatsehong ea Iona, batho bohle ba ntseg ba ruisoa.

24* Molimo-Mora, o nehile 'M'a-Hae tsohle, tseo a li fumaneng ka Bophelo ba Hae le ka Lefu la Hae; meuno ea Hae e senang palo, le makhabane a hae a makatsang! 'Me o mo entse 'moloki oa matlotlo 'ohle; ao Ntat'ae a Mo fileng 'ona, ele lefa la Hae. Ka Maria, O abela litho tsa Hae meuno ea Hae; ka eena, o neha batho makhabane a Hae, le ligrasia tsa Hae. Maria ke Nōkana ea mohlolo! Eo ka eona, mehauhelo ea Molimo-Mora, e fihlang ho rōna ka bongata, joaloka metsi a monate.

25* Moea o Halalelang, o nehile Maria, Monyaluo ea tše-pahalang oa Hae, limpho tse tsotehang! 'Me o mo khethile ho ba Seabi sa limpho le ligrasia tsohle, tseo O nang le tsona. Maria o li abela mang kapa mang, eo a mo ratang; ka tekanyo eo a e ratang, kamoo a ratang, ka nako eo a ratang. Ha ho mpho eo Moea o Halalelang o e fang batho, o sa e fetise ka matsoho a hloekileng a Maria. Ena ke thato ea Morena Molimo, ea ratileng hore re fumane tsohle ho Maria. Ele hore Eena ea neng a iqaqafatse, a inyelise, 'me a ipate esita le botebong ba bofeelafelane, ka boikokobetso ba Hae bo tebileng, nakong ea bophelo bohle ba Hae; kajeno a rentšoe, a be a phahamisoe ke Ea-holimo-limo. Ana ke maikutlo a Kereke, le a bo-Ntate ba halalelang ba Kereke.



26* Haeba ke ne ke bua le bo-rabohlale ba tšiu tsena, sena seo ke se ngotseng habonolo feela, ke ne ke tla se paka ka ho se tšehtesa, ka tse ngotsoeng Mangolong a Halalelang, le ke bo-Ntate ba Kereke. Ke nyafa hona mohloling, 'me ke bea mabaka a mangata a tiileng; a ka 'nang a fumanoa bukeng ea Mefapahloho e meraro, ea Maria Movirigo; ea Ntate Poiré. Empa ke hlile ke ipuela le batho ba batho, ba bonolo, ba pelo e ntle. 'Me ba atisang ho ba le tumelo, ho feta bongata ba bahlalefi; ba itumellang habonolo! 'Me kahoo, ba fumanang moputso o moholo ho feta. Ka baka lena, ke tla hle ke hlahise 'nete ka mokhoa o bonolo, ke sa eme; ho 'na ke hlahisa litaba tseo ba kekeng ba li utloisia. Empa leha ho le joalo, kantle ho phatisiso e kholo, ha ke tl'o lesa kamohlomong, ho 'na ke hlahisa tse ling tsa tsona. Empa ha re tsoeleng-pele ka taba ea rōna.



27* Erekaha grasia e phethisa botho, le letlōtlo la leholimo le phethisa grasia! Ha ho pelaelo, Morena Jesu Kriste esita le leholimong, e ntse ele ngoan'a Maria, joalokaha e ne e

le eena lefatšeng. 'Me kahoo, o nts'a bolökile mamelo le tsamaiso e phethehileng haholo, ea bana ba 'M'a; ea fetang bo-'m'a bana bohole. Empa, re tšoanetse ho hlokomela hore mamelo ena ea Jesu Kriste, ha e-na khaello leha ele bofokoli. Maria o ka tlase-tlase ho Mor'a hae, hobane Eena ke Molimo. 'Me kahoo, ha a Mo laele joaloka mosali, ea laelang ngoan'a hae mona lefatšeng; kaha ngoana a le ka tlase ho 'm'ae. Maria ha a kōpe letho, ha a lakatse letho, ha a etse letho, le ka loantšanang le Thato e sa fetoheng ea Morena Molimo. Ha re bala libukeng tsa Bahalaleli, Bo-Bernard, Bernardine, Bonaventura le ba bang, re fumana hore Leholidong le lefatšeng, lintho tsohle, esita le Molimo ka sebele, li tlas'a Maria, ke ho re matla a hae a maholo, eka hoja a lekana le 'ona a Morena Molimo ka sebele. Lithapelo le likopo tsa hae ho Morena Molimo, li matla haholo; eka hoja e le taelo ho Bohlomphehi ba Hae. Ha a khese thapelo ea 'M'a-Hae ea ratehang! Hobane Maria o ikokobelitse, 'me o talimile Thato ea Hae kamehla.

Moshe, ka matla a thapelo ea hae, a hlöla Morena Molimo, khalefong ea Hae ho Ba-Iseraile. 'Me Morena Molimo ea mohau o se nang phello, ka ho hlöloa ke Moshe, a 'molella a re, a Mo tlohele a ke a halefele sechaba seo se manganga, a ke a se otle. Joale, re ka re'ng ka thapelo ea Moikokobetsi Maria, 'Mè eo ea tšoanelang oa Morena Molimo? Thapelo ea Maria e matla ho Bohlomphehi ba Hae; ho feta lithapelo tsohle le merapelo ea Mangeloi 'ohle, le Bahalaleli bohole, ba leholimong le ba lefatšeng!

28* Maria o laela Mangeloi le Bahalaleli, Maholimong. Ka baka la boikokobetsi bo tebileng ba hae, Morena Molimo a Mo putsa. 'Me a mo fa tokollo ea ho tlatsa ka Bahalaleli, literone tse feela; tseo mangeloi a mabe a neng a oe ho tsona ke boikhantšo. Thato ea Ea-holimo-limo, ea phahamisang moikokobetsi, ke hore leholimo le lefatše li itihe, le ha li rata kapa li sa rate; tlas'a litaelo tsa Moikokobetsi Maria. Molimo o mo entse Mofumahali oa leholimo le lefatše: Molaoli oa

Makhotla a Hae, Motšoari oa Matlötlo a Hae, Seabi sa ligrasia tsa Hae, Seetsi sa mehlolahali ea Hae, senchafatsi sa batho, le 'Muelli oa bona, Motimetsi oa lira tsa Molimo; le Molekane ea tsepahalang oa boholo le litlhölo tsa Hae.



29* Molimo-Ntate, o rata ho ba le bana ka Maria, ho fihlela bofelo ba lefatše. O 'molella mantsoe ana: "Aha ka ho Jakobo!" Ke ho re: iketsetse ntlo le lehaha la hao, ka ho bakhethuoa ba ka, ba tšoantšitsoeng ka Jakobo. Eseng ka ho bana ba rohakehileng ba Satane; ba tšoantšitsoeng ka Esau.

30* Tsoalong ea tlhaho le ea nama, ho na le ntat'a le 'm'a bana. Ka mokhoa o tšoanang, tsoalong ea moea, ho na le Ntat'a rona eo eleng Molimo, le 'M'a rona eo eleng Maria. Eo ea sa talimeng Maria ele 'M'ae, Molimo e keke ea e-ba Ntat'ae. Ke ka baka lena balahlehi, joaloka bakhelohi, baikhaohanyi (schismatics) le ba bang, ba hloileng Maria Mofumahali oa röna ea Lehlohonolo; kapa ba mo shebang ka nyekelo le ka ho se mo natse, ba sitoang ho ba le Molimo ele Ntat'a bona; hobane Maria hase 'M'a bona. Hobane hae-ba Maria e ne ele 'M'a bona, ba ne ba tla mo rata ba mo hlomphé, joalokaha ngoana oa 'nete ea lökileng, ka tlhaho, a rata 'me a hlonepha 'm'a hae ea mo fileng bophelo.

Pontšo, eo re ka khethang ka eona mokoenehi, motho oa thuto e mpe; molahlehi ho Mokhethuo, ke ena: Mokoenehi le molahlehi, ha ba na taba le Mofumahali oa rona ea halalelang; haese ho mo nyekolla, le ho se mo natse! Ba bile ba leka ka matla, ka mantsoe le ka mehlala, ho nyenyefatsa pontšeng le ka sephiring, tlhompho le lerato ho eena; ka mohlomong, ele ka bonokoane bosele-sele. A bomalimabe! Morena Molimo Ntate ha a ka a bolella Maria ho aha ka ho bona hobane ke bo-Esau!

31* Molimo-Mora o rata ho ipopa lithong tsa Hae. 'Me nka re: Ho inkela botho ba röna ka matsatsi 'ohle, ka 'M'ae

ea ratehang. O bile a re ho eena: "Inkele Israele, ho ba lefa la hao." Eka hoja a itse: "Molimo-Ntate o 'nehile lichaba tsohle tsa lefatše; batho bohle ba lokileng le ba khopo, bakhethuoa le balahlehi, ho ba lefa la ka. Ba pele, ke tla ba busa ka lere la gaudal 'me ba bang, ke tla ba busa ka lere la tšepe. Ke tla ba ho ba bang Ntat'a bona le 'Muelli. Ho ba bang ke tla ba Mophetetsi ea lokileng, le Moahloli oa bohole! Empa, haele uena, 'Mè ea ratehang, u tla inkela Bakhethuoa feela, ho ba lefa le leruo la hao, bona ba tšoantšitsoeng ka Israele. 'Me joaloka 'M'a bona ea molemo, u tla ba beleha, u be u ba boloke! 'Me joaloka Mofumahali oa bona, u tla ba tataisa, u ba tsamaise 'me u ba sireletse.

32* "Motho enoa le motho eane, o tsoetsoe ka ho eena!"
Ho rialo Moea o Halalelang – (B. 86, 5). Ka ho ea ka tlhaloso ea bo-Ntate ba bang ba Kereke, motho oa pele ea tsoetsoeng ka ho Maria, ke Molimo-Motho, Jesu Kriste. Oa bobeli ke motho feela, ngoan'a Molimo le oa Maria ka pabalio. Haeba Jesu Kriste, Hloho ea batho, a tsoetsoe ka ho Eena, le bakhethuoa, bao eleng litho tsa Hloho eo, ba tlameha hore le bona ba tsoaloa ka ho eena. 'M'a ngoana, a keke a tsoala hloho e senang litho, leha ele litho tse senang hloho! Hoo ekaba ntho eselesa feela, e fapaneng le tlhaho. Ka mokhoa o tšoanang le tabeng ea grasia: Hloho le litho, li tsoaloa ke motho a le mong. 'Me haeba setho sa 'Mele o tsotehang oa Jesu Kriste, ke ho re mokhethuoa, a n'a ka tsoaloa ke e mong, eseng Maria ea tsoetseng Hloho, e ne e keke ea e-ba mokhethuoa; leha ele setho sa Jesu Kriste. Empa e ne etlaba ntho eselesa feela, tsoalong ea grasia.

33* Ho feta mona, Jesu Kriste e ntse e le tholoana ea Maria hona joale, joaloka mohla monene. Kamoo leholimo le lefatše li ntseng li pheta ka makhetlo a likete-kete; ka matsatsitsatsi: "Le Jesu ngoan'a popelo ea hao o Lehlohonolo", Ke 'nene e tiileng hore Jesu Kriste, ke tholoana ea 'nene ea Maria, ho motho e mong le e mong ea nang le Eena. Joalokaha ele

tholoana ea Maria ho lefatše lohle ka bophara ba Iona. Haeba e mong oa bakriste, a ka ba le Jesu Kriste ka ho eena; a ka bua ka sebete a re: "Ho bokoe Maria! Seo ke nang le sona ke sa hae, ebile ke tholoana ea hae; 'me ke ne nkeke ka ba le sona, hoja ese ka eena". Re ka lebisa ho Maria mantsoe ana, ho feta kamoo Paulose ea halalelang, a neng a ipolela, a re: "Ke sa le pelehing hape ea bana ba Molimo; ho fihlela ha Jesu Kriste, Mor'a Ka, a bopjoa ka ho bona." Augustinus ea halalelang, o kile a bua ho fetisa seo ke se boletseng, eaba o tiisa hore: Bakhethuoa bohole, hore ba tle ba bopjoe setšoantšong sa Mor'a Molimo, hona mona lefatšeng, ba ntse ba patiloe pōpelong ea Movirigo ea halalelang haholo! Moo ba ntseng ba sireletsoa, ba nontsoa, ba ötloa, ba hölisoa ke 'Mè eo ea molemo; ho fihlela a ba honyeletsa letlōtlong ka mor'a lefu la bona. Leo eleng letsatsi la tsoalo ea bona, joalokaha Kereke, e bitsa joalo, lefu la Balöki. Oho, misteri ea grasia, e sa tsejoeng ke balahlehi; 'me e tsejoang hanyenyane esita le ke Bakhethuoal!



34* Molimo-Moea o Halalelang, o rata ho ipöpela Bakhethuoa ka Maria. 'Me o s'o n'o bue le eena oa re: "Tebisa methapo, oho Moratua ea khabane, Monyaluoia oa Me! Tebisa methapo ea makhabane 'ohle a hao, ka ho Bakhethuoa ba kal Ele hore, ba tle ba höle ho tloha bokhabaneng bo bong ho isa ho bo bong; ho tloha grasieng e 'ngoe ho isa ho e 'ngoe. Ke ne ke ithabela ka uena ha u sa phela lefatšeng. Ka baka lena, ke ntse ke lakatsa ho u fumana lefatšeng, u sa khaotse ho ba teng leholimong. A k'u iphelele ka ho Bakhethuoa ba Kal Ele hore ke tle ke bone ka ho bona, metso ea Tumelo ea hao e sa hlöloeng ke letho, ea boikokobetso ba hao bo tebileng, ea boithapiso ba hao ho tsohle, ea thapelo ea hao e ntse, ea lerato la hao le khanare, ea tšepo ea hao e tiileng, le ea makhabane 'ohle a hao. Kamehla u Monyaluoia oa Ka, ea tšepahalang, 'Mè ea hloekileng haholo. Etsa hore Tumelo ea hao, e mphe balu-

meli, etsa hore bohloeki ba hao bo mphe bavirigo, etsa hore borui ba hao, bo nketsetse litempele tsa Ka, le Bakhethuoa ba Ka."

35* Ha Maria a likelitse methapo ea hae, ka moeeng oa motho, o hlahisa hona teng limakatso tsa grasia, tse ka hlahisoang ke eena a le mong feela. Ha ho ea lekanang le Maria ka bohloeki, le ka ho beha litholoana tsa grasia; 'me ha a sa tla ba teng lekhale!

Tlatsanong le Moea o Halalelang, Maria o hlahisitse ntho eo e kalo, e e-s'o be teng; 'me ha e sa tla ba teng: "Molimo-Mothol!" Kahoo, o tla hlahisa ntho tse kholo-kholo, tse tlang ho ba teng mehleng ea qetello. Pōpo le khōliso ea Bahalaleli ba baholo, ba tla hlaea qetellong ea lefatše, li bōlōketsoe Maria. Hobane ke Movirigo enoa feela ea inotši oa mohlolo, eo, ka tlatsano le Moea o Halalelang, a ka hlahisang lintho tse hlollang tsa mehlolo.

36* Ha Moea o Halalelang, O fumana Maria moeeng oa motho, o itahlela teng. O kena teng ka ho tlala ha Oona! O ikopanya le moea oo kahohle, le ka ho ea kamoo moea oo, o suthelang Maria sebaka kateng. Lebaka le leng le leholo, la hore ebe Moea o Halalelang, ha o etse mehlolo e hlollang ea Oona moeeng oa rōna, ke hobane, O sa fumane ho rōna kopano e kholo, e lekaneng le Maria Movirigo ea tšepahalang! 'Me eo, O ke keng oa arohana le eena lekhale. Ke re: Monyali-tlama-thatal Hobane, haesale Lerato leo, eleng Boleng ba Ntate le Mora, le inkela Maria ho ba Monyalua oa Iona, ha le e-so mo nene le kamohlal Ele hore le tle le hlahise Jesu Kriste, Hloho ea Bakhethuoa, le Jesu Kriste ka ho Bakhethuoa. Hobane haesale Maria a tšepahala, 'me a sa lese ho beleha.

HLOHO EA BOBELI: LITHOLOANA TSA BORAPELI HO MARIA

1. *Maria ke Mofumahali oa lipelo tsa rona.*

37* Maria, o nehoa ke Morena Molimo matla a maholo, holim'a meeaa ea Bakhethuoa. Hoseng joalo, o n'a keke a aha ka ho eona, joalokaha a laetsoe joalo ke Molimo-Ntate. O n'a keke a ba bopa ka ho Jesu Kriste, kapa a bopa Jesu ka ho bona. O n'a keke a tebisa methapo ea makhabane a hae lipelong tsa bona; e n'e keke ea e-ba molekane oa tlama-thata oa Moea o Halalelang, mesebetsing eohle ea grasia! O n'a keke a etsa tsena tsohle, haese ha e-na le tokelo le matla holim'a meeaa, ka ho ea ka grasia e itseng, ea Ea-holimo-limo. Morena Molimo, ha a neha Maria matla holim'a Jesu, Mor'a Hae feelal! O mo nehile matla a joalo, le holim'a bana bohle ba batho. Eseng holim'a 'mele oa bona feela, hoba hoo e b'e tla ba ho honyenyane haholo; empa le teng holim'a meeaa ea bona.

38* Maria ke Mofumahali oa leholimo le lefatše ka grasia; joalokaha Jesu Kriste ele Morena oa leholimo le lefatše, ka tsoalo le ka tlholo. Joale, 'Muso oa Kriste ke oa lipelo, le oa kahare ho motho – ho ea ka lentsoe lena: "'Muso oa Molimo o ka ho lōna!' Ka mokhoa o tšoanang, 'Muso oa Maria, o hlile o kahare ho motho – ke ho re moeeng oa hae. 'Me ke hona ka meeeng, a hlileng a tlotsihang le Mor'a hae; ho feta libōpuoa tsohle tse bonoang kantle. Ka baka lena, joaloka Bahalaleli, re ka hla ra 'mitsa: Mofumahali oa lipelo!

2. *Maria o hlokahala ho bohle, hore ba finyelle leholimong.*

39* Erekaha Maria a hlokahala esita le ho Molimo, kaha a ratile joalo, Maria o hlokahala haholo ho feta ho batho; ele hore ba tle ba finyelle Lehōlimong. Re hlokomele, ke hona, hore borapeli ho Maria Movirigo, bo hlokahala haholo; ho feta borapeli ho Bahalaleli ba bang.

A. Borapeli ho Maria, bo hlokahala haholo ho bohole, hore ba pholohé

40* Suarez, eleng monna oa morapeli le mohlalefi e moholo, mohlalefi le mochesehehi Justus Lipsius, eleng mohlalefihali oa University ea Louvain, le ba bang ba bangata, ba ile ba paka ka mokhoa o tiileng – ho se khanyetso; hore borapeli ho Maria Movirigo, bo hlokahala haholo hore motho a pholohé.

'Nete ena, ha e fumane thutong ea Bo-Ntate ba Kereke, haholo bo-Augustinus, Ephrem, modiakone oa Edessa, Cyrille oa Jerusalema, Germanus oa Constatinopole, Joannes Damasene, Anselme, Bernarde, Bernardine, Thomas, Bonaventura, ba halalelang. Hape, ka ho ea ka polelo ea mokhelohi Oecolampadius, le bakhelohi ba bang, ba hhalosa hore ha motho a se na hlompho le lerato ho Maria, ke pontšo e tiileng ea tahleho. Athe ha motho a e-na le lerato la 'nete ho Eena, ke pontšo e tiileng ea pholohé.

41* Mantsoe le lipapiso, tsa Testamente ea khale le e ncha, li paka taba ena. Lipolelo le mehlala ea Bahalaleli, lia e tiisa. Kelello le nalane lia e ruta, ebile lia e hhalosa. Esitana le satane, hammoho le mangeloi a hae a mabe, le hoja ba sa rate, ba 'nile ba tlameha ho e bolela; ka baka la ho khannoa ke bonnete ba taba.

Har'a mantsoe 'ohle a bo-Ntate le Bahlalefihali, ao kea entseng pokello, ke tla nyafa ana feela ka bokhutšoanyane, ho paka 'nete ena: "Ho ba le borapeli ho eena, ke ho ba le sebetsa sa pholohó; seo Morena Molimo a se nehang bana bao, a batlang hore ba pholohé!" Ho rialo Mohalaleli, Joannes Damascene.

42* Nka 'na ka bolela hona mona, taba tse ngata, tse pakang 'nete ena. E 'ngoe ke ena: Francis ea halalelang, a bona lere e telele e fihlang leholimong. Ka holimo ho eona, Maria Movirigo o n'a le teng! 'Me Francis a bolella hore lere ena, ke

eo re tšoanetseng ho nyolohela leholimong ka eona.

E 'ngoe hape ke ena; e boleloang libukeng tsa Mohalaleli, Dominic: Ho n'o e-na le mokhelohi e mong ea malimabe haufi le Carcassona, moo Dominic ea halalelang, a neng a ntse a ruta tsa Rosari teng. Mokhelohi enoa, o n'a kenoe ke sehlopha sa lisatane, tse kete tse leshome le metso e mehlano. Meea ena e litšila, hore e tle e hlabisoe lihlong, e kile ea leleko ka taelo ea Mofumahali oa rona ea Halalelang! Ea laeloa ho anetsa linnete tse ngata, tse kholo 'me tse tšelisang, holim'a borapeli ho Movirigo ea halalelang. Li ne li etse phatlatalso ena ka tieo eo, le ka bopaki bo hloekileng hoo, motho a sitoang ho thiba meokho ea thabo, ha a bala taba ena ea 'nete! Le thoholetso eo satane a neng a etse leha a n'a sa rate, ho paka borapeli ho Maria ea halalelang haholo.

B. Borapeli bo hlokahala ho feta, ho ba bilelitsoeng phethehong.

43* Haeba borapeli ho Maria Movirigo ea halalelang haholo, bo hlokahala ho batho bohole, hore ba pholohé, bo hlokahala haholo ho feta, ho bona ba khethetsoeng tsela e 'ngoe ea phetheho. Ha ke kholoe hore ho ka ba le motho, ea ka fumanang kopano ea sebele, le Moren'a rōna Jesu Kriste, le bōtsēpehi bo phethehileng ho Moea o Halalelang, ntle le hore a be le kopano e kholo le Movirigo ea halalelang; 'moho le ho lebella thata thuso eohle ea Hae.

44* Maria a inotši o fumana grasia ho Molimo; kantle ho thuso efe kapa efe, e tsoang ho sebopua. 'Me bohole ba fumaneng grasia ho Molimo, ba e fumane ka Maria. 'Me e ntse e tla ba ka eena feela, bohole ba tleng kamorao, ba tla e fumana. O n'a tletse grasia, ha a n'a lumelisoa ke Moarkangeloi Gabriel! 'Me a boela a tlatsoa ka grasia ke Moea o Halalelang, mohla matla a Oona, a mo koahelang! 'Me joale o n'a atisa grasia ena, ka tsatsi le leng le le leng, ka motsotsoana o mong le o mong; hoo, a fihlileng tlhorong ea grasia e senang moeli,

'me e senang tekanyo. Ea-holimo-limo, a mo etsa Motšoarakotla a inotši, oa matlotlo a Hae. Seabi se inotši sa ligrasia tsa Hae, ho renefatsa, ho phahamisa le ho ruisa mang kapa mang ea ratoang ke Maria. O kenya tseleng e patisaneng ea leholimo, mang kapa mang ea ratoang ke Eena; O ntša ka menyako e qotetsaneng ea bophelo, motho mang kapa mang, ea mo ratang; Leha a ka ba le mathata afe kapa afe. O neha terone, lere la borena, le mofapahloho oa Morena, ho mang kapa mang, ka ho rata ha Hae. Kamehla le kahohle, Jesu ke tholoana ea Maria le Mor'a Maria! 'Me Maria ke sefate sa 'nete, se beang Tholoana ea Bophelo.

45* Morena Molimo, o file Maria a inotši linotlolo tsa lerato la Bomolimo! Le matla a ho kena litseleng tsa makuntu a khalalelo e phahameng, le 'ona matla a ho kenya ba bang hona teng. Maria a inotši, o nehile bana ba malimabe ba Eva, ho kena paradising ea lefatše; hore ba tle ba itsamaele teng, ba ntse ba khahleha ho Morena Molimo; ba ipatele lira tsa bona. Ba iphepa hona teng, ba sa tšohe lefu; ka ho itjella tholoana ea Sefate sa bophelo, le sa tsebo ea botle le bobe. Hona teng, ba inoella metsi a leholimo, a tsoang selibeng seo se hloekileng, se ntseng se foqoha ka matla! Re ka hla ra re: Maria ke eena paradise ea lefatše, mobu oo o hloekileng 'me o halalelang; oo baetsalibe, Adama le Eva, ba neng ba tebeloe ho oona. Maria ha a lumelle motho mang kapa mang, ho kena hona teng; haese feela bona bao a ikhethelang bona, ho ba etsa Bahalaleli.

46* "Barui bohle har'a batho, barui bohle ba tla rapela ho bona sefahleho sa hao, ho tloha molokong ho isa molo-kong; haholo-holo ho ea qetellong ea lefatše." Ha ke sebelisa mantsoe ana a Moea o Halalelang, ka ho ea ka tlhaloso ea Mohalaleli Bernard, ke ho re: Bahalaleli ba baholo, batho ba ruileng ligrasia le makhabane a moea, etlaba bona ba tla che-sehela haholo-holo ho rapela Maria Movirigo. 'Me etlabesale ba mo talimile kamehla, a le teng ho bona. Ele sesupiso sa

bona se phethehileng, seo ba tšoanetseng ho se etsisa; thuso ea bona e kholohali, e tlang ho ba matlafatsa.

47* Ke itse sena, se tla etsahala haholo-holo, ho ea bofelong ba lefatše, 'me haufinyane le teng. Hobane Ea-holimo-limo le 'M'a Hae ea halalelang, o batla ka matla ho ipopela Bahalaleli ba baholo. Ba tla feta bongata ba Bahalaleli ba bang; joalokaha lifate tse phahameng tsa Libano, li phahametse lihlahla. Eleng taba e neng e senoleloe motho e mong ea halalelang; eo bophelo ba hae, bo ngoliloeng ke mohlanka e moholo, oa Morena Molimo.

48* Meea ena e hlomphehang, e tletseng grasia le borumuoa, e tla khethoa ho loantšana le lira tsa Molimo, tse senyang kahohle. Ba tla ikhetha ka lerato la bona ho Maria Movirigo. Ba tla bonesetsoa ke leseli la hae, ba fepjoe ka lebese la hae, ba tsamaisoa ke moea oa hae, ba tšehetsoa ke matsoho a hae, ba sireletsoa ke eena! Hoo, ka tsoho le leng ba tla loana, ha ba ntse ba aha ka le leng. Ka le leng ba tla loana, ba tabanye 'me ba pshatlyne bakhelohi, le bokhelohi ba bona; baikhaohanyi le boikhaohanyo ba bona, Bokhumamelia ba melimo ea bohata le melimo ea bona, baetsalibe le bokhopo ba bona. Ka tsoho le leng, ba tla aha tempele ea 'nete, ea Solomone oa sebele; le motse oa mohlolo oa Molimo! Ke hore Maria Movirigo (1 N.B. Bophelo ba Maria des Valles ka M. de Renty). Ea bitsoang ke bo-Ntate ba Kereke, tempele ea Solomone le motse oa Molimo. Ka mantsoe le ka mehlala ea bona, ba tla isa batho bohle borapeling ba 'nete ho Maria; ka hona ba tla ba le lira tse ngata. Empa le teng, ba tla tlisetsa Morena Molimo likhapo tse ngata, le letlotlo le leholoi! Ke sona sena, seo Molimo, a neng a se senolele Mohalaleli Vincent Ferrere: Moapostola e moholo oa mehla ea hae; joalokaha a boletse bukeng e 'ngoe ea hae.

Ke sona sena, seo ho bonahalang hore Moea o halalelang, o n'o se porofeta pesalemeng ea 58, Oa re: "'Me ba tla tseba hore Molimo o tla busa Jakobo, le lipheletso tsa lefatše. Ba tla

khutla mantsiboea; 'me ba tla khoebethoa ke tlala joaloka lintja, 'me ba tla pota-pota motse". Motse ona, oo batho ba tla o fumana, qetellong ea lefatše, ho balehela ho oona, le ho khotsofatsa tlala ea bona ea ho nyoreloa toka, ke Movirigo ea halalelang haholo. Eena ea bitsoang Motse oa Molimo, ke Moea o Halalelang.

3. Borapeli ho Maria, bo tla hlokahala haholo, linakong tsa morao

49* Pholoho ea lefatše e ile ea qaleha ka Maria; e tla phethahala ka Maria! Ha Jesu Kriste a tlie khetlong la pele, Maria o n'a hlahele hanyenyane haholo. Ele ho re batho ba se ke ba arohana, tsebong le leratong la Mor'a hae; ka ho ikerametsa ho Maria ka mokhoa o phoso, oa bofofu. Sena se ne se ka 'na sa etsahala, haeba a n'a ka tsejoe ka baka la likhohelo tse makatsang; tseo Ea-holimo-limo, a mo apesitseng tsona, esita le tšobotsing ea hae. Taba ena, e pakoa ke Mohalaleli Denys oa Areopagite, ea re bolellang libukeng *tsa hae hore: Hoja Tumelo e se mo rute, hore Maria hase Molimo, mohla a neng a 'mona, a ka b'a n'a mo talime ele Molimo; ka baka la likhohelo tse patehileng tsa hae le botle, bo se nang ho hlalosoa.* Empa ha Jesu Kriste a e-tla la bobeli, Maria o tla tsejoe ke batho, 'me a senoleloe bona ke Moea o Halalelang. E-le hore ka eena, Jesu Kriste a tle a tsejoe, a ratoe 'me a sebeltsoe. Mabaka a neng a etse hore Moea o Halalelang, o pate Monyaluoaa Oona, nakong ea bophelo ba hae, ha a sa le eo joale.



50* Ka baka leo, Morena Molimo, o rata, hore nakong tsena tsa morao, Maria, Sebabatso sa matsoho a Hae, a tsejoe ke batho. Mabaka a taba ena ke ana:

1. Maria o n'a ipate, ha a sa phela lefatšeng lena! 'Me a ipeha ka tlase-tlase leroleng, ka baka la boikokobetso ba

hae bo tebileng; ka ho fumana grasia ho Molimo, ea ho se tsejoe le ho se boleloe, ke Baapostola le Baevangelista ba Molimo.

2. Maria ke Sebabatso sa matsoho a Morena Molimo, lefatšeng! Sa grasia le letlotlo leholimong! Ka baka lena, Molimo o rata hore a tlotlisoe 'me a rorisoe, ke bona ba phelang lefatšeng.
3. Erekaha Maria ele mafube a etellang pele, 'me a bileng a hlahisang Jesu Kriste; eleng Letsatsi la Toka, eka khona Maria a hopoloe 'me a tsejoe. Ele hore Jesu Kriste le Eena a tle a hopoloe, 'me a tsejoe ke batho.
4. Maria ke tsela eo Jesu Kriste, a neng a tle ka eona ho rona khetlo la pele. 'Me e ntse e tla ba eona tsela eo, Jesu Kriste a tla tla ka eona khetlo la bobeli; leha ese ka mokhoa o tšoanang.
5. Maria ke tsela ea 'nete e otlolohileng, e senang koli, ho ea ho Jesu Kriste; le ho fumana Jesu Kriste, ka ho tlala. Ka baka lena, ke ka eena, meeaa e halalelang e tšoanetseng ho mo fumana. Ea tla fumana Maria, o tla fumana bophelo; ke ho re o tla fumana Jesu Kriste. Eo eleng, Tsela, 'Nete le Bophelo. Empa ha ho ea ka fumanang Maria, a sa 'matle! 'Me ha ho ea ka batlang Maria, a sa mo tsebe: Hobane re sitoa ho batla kapa ho lakatsa, ntho eo re sa e tsebeng. Ka baka lena, hoa hlokahala hore Maria a tsejoe haholo ho feta pele. Ele hore Morena Molimo, a tsejoe 'me a tlotlisoe haholo ho feta pele.
6. Nakong tsena tsa morao, Maria o tšoanetse ho hlahella ho feta pele; ka mosa, ka matla, le ka grasia. Ka mosa: Ele hore a tle a khutlisetse baetsalibe ba batho, Kerekeng e Katholike, a ba amohele ho eona ka lerato! Ka matla: Ho hlola lira tsa Molimo, bokhumameli ba melimo ea bohata, baikhaoahanyi, ba Mahomete, Bajode, le meeaa e ithatalitseng ke ho hloka tumelo. Eleng ba tla tsohela Molimo noha! ho eka le ho lihela ka litsepiso, le ho tšosa bohle ba sa eeng le bona. Qetellong, Maria o tlameha ho

khanya ka grasia! Hore a susumeletse a be a tšehetse masole a sebete; le bahlanka ba tsepahalang ba Jesu Kriste, ba tla loanela Kriste, le Lebitso la Hae.

7. Qetellong, Maria o tla tšabeha ho satane le ho bahlanka ba hae, joaloka Lebotho le loanang ntoa; haholo-holo hona tšiung tsena tsa morao. Hobane satane, ka ho tseba hore nako ea hae ea ho timetsa meea, e se e le khutšoanyane, ka tsatsi le leng le le leng, o tla leka ka matla ho bolaea le ho timetsa. O tla boela a tsosa litlhoriso tse ling tse ncha. 'Me o tla bea licheho tse tšabehang, ka pele ho bana ba 'nete, le bahlanka ba tsepahalang ba Maria; bao ehileng eleng bona ba thata ho hloloa, ho feta ba bang.

★
★

51* Litlhoriso tsena tsa qetello tsa satane, tse tla ipha matla ka matsatsi 'ohle, ho fihlela puso ea Mohanyetsioa-Kriste, ke tsona tse boletsoeng ke Molimo, ha a rohaka noha paradising ea lefatše. Ho molemo ho hhalosa lentsoe lena hona mona, hore Maria Movirigo a tlotsisoe, bana ba hae ba pholohe 'me satane a tle a hlajoe ke lihlong (Ge. 12. 3. 15). "Ke tla kenya bora mahareng a hao le mosali, le mahareng a tho-loana ea hao le tho-loana ea hae. Mosali o tla u pshatla hloho, 'me uena u tla nanarela serethe sa hae".

52* Molimo ha a e-s'o etse leha ele ho bopa bora, haese bo le bong feela! Empa ke bo kekeng ba felisoa, bo tla ema, bo le joalo; bo ntse bo tsoela-pele, ho fihlela tšenyeho ea lefatše. Bora boo, bo pakeng tsa 'M'a Hae ea hlomphehang Maria le satane, bo mahareng a bana le bahlanka ba Maria Movirigo ea halalelang, le bana ba satane. Sera se tšabehang har'a lira tsohle, tseo Morena Molimo, a li behileng ho loantša satane, ke 'M'a Hae ea halalelang haholo Maria! Ka nako ea paradiisi ea lefatše, leha Maria a ne a sa le ka kelellong ea Molimo, Morena Molimo a kenya pelong ea Maria feela, tlhoeo e makatsang, ea sera seo se rohakehileng sa Hae le katleho

e tletseng, ho hlanola bokhopo ba noha eo ea khale, le matla a maholo a ho e hlola! Ho e khatlabanya, le ho pshatla lehlabaphieo leo la moikhohomosi! Hoo satane a sa mo tšabeng feela, ho feta Mangeloi le Bahalaleli, empa ka mokhoa o mong re ka re: Le ho feta Morena Molimo ka sebele! Hase hore bohale, tlhoeo le matla a Morena Molimo, ha li fete hole-hole, ka mokhoa o kekeng oa lekanngoa, tsa Maria Movirigo. Hobane liphetheho tsa Maria li na le moeli. Empa satane o mo tšaba ho feta Molimo! Ka baka la hobane ke moikhantši. 'Me o utloa bohloko bo tlolang tekanyo, ho hloloa le ho shapua ke lekhabunyane-nyana le ikokobelitseng, la Morena Molimo! Boikokobetso ba Maria, bo otla satane ho feta kamoo matla a Morena Molimo, a mo otlang kateng! Hape, Morena Molimo o nehile Maria matla a kekeng a boleloa, holim'a lisatane. Hoo, kamoo le tsona li 'nileng li tlameha ho bolela kateng, ka molomo oa bao li neng li kene ho bona; li tšaba tšisimoloho feela ea Maria ho moea o mong, ho feta lithapelotso Bahalaleli bohle! Le tšokelo e le 'ngoe ea hae holim'a tsona, ho feta mahloko 'ohle a mang!

53* Seo satane a neng a se lahle, ka baka la boikhantšo, Maria o se fumane ka boikokobetso. Seo Eva a neng a se lahle, ka ho se mamele ha hae, Maria o se pholositse ka mamelo ea hae. Eva, ka ho mamela satane, o n'a timetse bana ba hae bohle, 'me a ba neha satane; eena a b'a ipolaea. Maria, ka ho tsepahala ka tlalo ho Morena Molimo, hammoho le eena, o pholositse bana le bahlanka bohle ba hae. 'Me o nehelane ka bona ho Morena Molimo, ea Bohlomphehi bo se nang moeli.

54* Molimo ha a kenya bora bo le bong feela, empa bora ba mefuta-futa, mahareng a Maria le satane. Esita le mahareng a moloko oa Movirigo ea halalelang, le oona moloko oa satane. Ke ho re: Morena Molimo o kentse litšokelano, le tlhoeo, mafufa a patehileng, mahareng a bana ba 'nete le bahlanka ba Maria; le ho bana le bahlanka ba satane.

Ha ba ratane, leha ele hanyenyanel! Bana ba Beliale makhoba a satane, metsoalle ea lefatše (hoba baa tšoana); haesale, ho fihlela joale, ba ntse ba hlorisa bao bohole; ba ratang Maria Mofumahali oa rona ea Lehlohonolo. 'Me, ba tla ba hlorisa haholo ho feta ka nako tse tlang; ho tla ba joalo kaha, mehleng e fetileng, Kaine a ne a hlorise ngoan'abo Abele, le Esau ngoan'abo Jakobo. Bao eleng bona, ba tšoantšitseng balahlehi le bakhethuo. Empa haele Maria ea ikokobelitseng, etlabe-sale a ntse a hlola moea oo o ikhantšang. Ka tlholo eo a tla be a mo pshatle hloho, moo boikhantšo ba hae bo lulang teng. Kamehla, Maria o tla 'ne a hlanole bokhopo, ba eona noha eo. Kamehla Maria o tla qhaqholla mamma a eona a lihele; a be a qhalanye merero ea eona, ea bosatane! 'Me Maria o tla fetoha thebe ea tšepe, ho bahlanka ba hae ba tšepahalang. O tla ba qobeletsa marong a noha eo e khopo, ho fihlela bofelo ba lefatše.

Empa mehleng ea qetello, matla a Maria a tla hlahella haholo-holo holim'a satane; nakong eo satane a tla nanarela serethe sa Maria. Ke ho re, a tla nanarela makhoba a Maria, le bana ba fumanehileng ba Maria; bao Maria a tla ba hlahisa ho loantsa satane. Mahlong a ba lefatše, etlaba bathoana ba batho ba fumanehileng, ba nyelisoang ke bohole, joaloka serethe, ba hatakeloang ka maotol! 'Me ba hlorisoang joalokaha serethe, se hateletsoe ke litho tsohle tsa 'mele. Empa holim'a tsena, ba tla buselsetsoa ka ho ba barui ba grasia ea Molimo; eo Maria a tla ba abela eona ka bongata. Mahlong a Morena Molimo ba tla phahamisoa, 'me ba be baholo ka bohalaleli. Ba tla phahamelia libopua tse ling tsohle, ka moea o tletseng cheseho; ka ho itšetleha thusong e tsoang ho Molimo feela, le ka baka la boikokobetso ba bona ba serethe. Ka ho ikopanya le Maria, ba tla pshatla hloho ea satane, 'me ba etse hore Jesu Kriste a hlole lira tsa hae.



55* Ka lentsoe le le leng, hona joale, Molimo o rata hore: 'M'a Hae ea halalelang haholo, a tsejoe ho feta pele, a ratoe ho feta pele, a hlonesphoe ho feta pele. Ha ho pelaelo, sena se tla etsahala haeba ka grasia le ka leseli la Moea o Halalelang, bakhethuo ba kena boitekong, boo ke tla ba koahollela bona haufinyane. Ka nako eo, ba tla bona Naleli eo e Ntle ea Leoatle, ba e bona ka mahlo; ho ea kamoo Tumelo ea bona e ka ba hulang kateng! Ba tla fihla hae hantle ka thabo; ba ntse ba latetse tsamaiso ea eona, leha ho ka ba le lifeo le linōkoane. Ba tla tseba boholo ba Mofumahali eo ea hlomphehang; 'me ba tla inehela tšebeletso ea hae ka hohle-hohle, joaloka bahlanka le makhoba a lerato. Ba tla latsoa bomonate ba hae, le melemo ea botsoali ba hae. 'Me ba tla mo rata ka lerato le sisitseng, la bana ba felang ba ratoa kasebele. Ba tla tseba tlalo ea hae ea mehauhelo, le tlhokahalo eo ba leng ho eona ea hae. 'Me ba tla mathela ho eena linthong tsohle, joalokaha ele 'muelli oa 'nete oa bona, le morapelli oa bona ho Jesu Kriste. Ba tla tseba hore ke eena tsela e nepahetseng ka tlalo, e bonolo-nolo; e khutšoanyane ka ho fetisisa, 'me e ntlehali, ho leba ho Jesu Kriste. 'Me ba tla inehela Maria Movirigo, ka 'mele le ka moea oa bona, ba sa itšihele letho. Ele hore etlebe ba Jesu Kriste, ka hohle-hohle.

56* Empa bahlanka baa, makhoba aa, le bana baa ba Maria, etlaba batho ba joang? E tla ba likhanare tsa mollo: Bahlanka ba Morena, ba tla hotetsa mollo oa Lerato la Molimo, hohle-hohle. Ke tlile ho akhela mollo lefatšeng, 'me ke batla'ng haese hore o tuke? (Lk. 12,49). Ba tla ba joaloka metsu e nchocho matsohong a matla a Maria, metsu eo ka eona a tla hlaba lira tsa hae.

Etbla litloholo tsa Levi, tse neng li hloekisoe ka mollo oa mahloko a maholo, ba ikopantseng ka ho tlala le Morena. Ba ntse ba jere gauda ea lerato ka lipelong tsa bona, ba jere insense ea thapelo ka kelellong ea bona, le mira ea boithapiso 'meleng oa bona. Hohle moo ba eang teng, ba tlisa monko o

monate oa Jesu Kriste, ho bafumanehi le ho baikokobetsi. Empa ho bo-tumane ba lefatše lena, barui le ho baikhantši, ba tla tsamaea le monkho oa lefu.

57* Etlaba maru a thoathoaretsang, ao ka tšisinyehonyana feela ea Moea o Halalelang, a fokaelang kahohle le moea. Ba keke ba itharetsa ka letho, leha ele ho makatsoa ke letho; kapa ho ithophka ka letho. Ka baka lena, ba tla tlopoula pula ea lentsoe la Molimo, le ea bophelo bo sa feleng. Ba tla kirietsa ho loantša sebe, (ba etse lethala la likulo ho loantša) le lefatše. Ba tla hlola satane le mahlahana a hae. Haele batho bao ba romiloeng ho bona, lebitsong la Ea-holimo-limo, bona ba tla hlaba ka sabole e ntlha li peli, ea lentsoe la Molimo. Ba phelang ba phele, ba shoang ba ichoelle.

58* Etlaba baapostola ba 'nete ba tšiu tsa morao; bao Morena oa Makhotla, a tla ba neha molomo oa ho bua, le matla a ho etsa limakatso; le ho ba le khapo e kholo ea lira tsa Hae. Har'a baprista ba bang, har'a banna ba Kereke, ba tla ithoballa ho se cheletana ea gauda leha e le silvera. Ho se letho le ba kukunelang ke tse joalo: Ba tla ba le mapheo a benyang a maeba, ho fofela hohle moo Moea o Halalelang o ba bitsetsang teng. Ba khannoa ke takatso e le 'ngoe feela: Letlotlo la Molimo, le pholoho ea meea ea batho. Moo ba ileng ba ruta teng, ba tla sia gauda feela ea lerato la Molimo; eo eleng phetheho ea molao oohle.

59* Khabareng, re tseba hore etlaba barutuoa ba 'nete ba Jesu Kriste; ba tsamaeang mehlaleng ea Hae ea bofumanehi, boikokobetso ba Hae, nyeliso ea lefatše, le lerato. Ba tla ruta batho tsela e otlolohileng ea Molimo, 'nete ruri; ka ho ea ka Mangolo a Halalelang, eseng mahlale a lefatše. Ba keke ba tsotella motho, leha ele ho ea ka tšobotsi; ba sa qenehele, ho ikhathatsa, kapa ho tšaba motho ea shoang; leha a ka ba matla joang le joang. Melomong ea bona, ho tla tuka sabole e mahale a mabeli, ea Lentsoe la Molimo. Mahetla a bona a tla khanya ke mokhele, o lutlang mali a Moren'a bona ea thakhisi-

tsoeng. Sefapano, ba tla se tšoara ka le letona, Rosari, ka le le-tšeali. Lipelong tsa bona ba ipolöketse, lebitso le halalelang la Jesu le la Maria. Ha boitšoaro bohole ba bona, bo paka boithapiso le boitšoaro bo botle, ba batho ba baholo ba Jesu Kriste.

Etlaba mofuta ona, likhalala! Ba tleng ho rutoa ke Maria ka eona taelo ea Ea-holimo-limo; hore a tle a tsebe ho anetsa 'Muso oa Hae, holim'a 'Muso oa ba babe; oa bahedene le oa mahometa. Empa na see se tla etsahala neng, le hona, ka mokhoa o joang..? Ho tseba Morena Molimo feela, haele rōna ho molemo re rapele; re tlameha ho rapela, ho sisimoloha le ho lebella.





Juxta precy Beatae Mariae Virginis a Bande
in Montfort invocatio haec calvitudinem et
commodum et ejusdem Beatae Virginis prece
nobis Augustiniana Benedictinorum precum
impetramus.

Die 27 December 1908,

Pius PP. X

Tekenelo ea Mopapa Pius X, holim'a buka ena:
"Borapeli ba 'Nete ho Maria."

Re le khothaletsa ho bala bukana ea Borapeli ba 'Nete ho
Maria; e ngotsoeng ke Louis-Maria oa Montfort ea Lehloho-
nolo. Re bile re hlohonolofatsa bohole ba etsang joalo.

27th December 1908
Pius P.P. X

KHAOLO EA BOBELI

LINNETE TSA MANTLHA, MALEBANA LE BORAPELI HO MARIA MOVIRIGO

60* Erekaha ho fihlela joale, re sa buile hakhetšoanyane ka tlhokahalo ea borapeli, ho Maria Movirigo ea halale-lang haholo; joale ke tšoanetse ho bolela seo bo leng sona ka bobona. Ha ke se ke hhalositse linnete tse ling tsa mantlha, eleng tse tlang ho neha leseli, hore motho a tl'a utloisise hantle borapeli bona bo tiileng 'me bo boholo, boo ke lakatsang ho bo pepesa; ke hona ke tla hhalosa seo bo leng sona, ka thuso ea grasia ea Molimo.

HLOHO EA PELE: JESU KRISTE KE EENA, QETELLO EA BORAPELI HO MOFUMAHALI OA RONA.

61* Jesu Kriste, Molopolli oa Rona, Molimo ruri le Motho ruri, ekakhona ebe Eena qetello ea borapeli bohole ba rōna, bofe kapa bofe. Ho seng joalo, e tla ba ke borapeli bo fosahetseng 'me bo lahlang batho. Jesu Kriste ke Alpha le Omega, qalo le qetello ea lintho tsohle. Ha re sebetse letho, ho rialo Moapostola; haese hore batho bohole ba phethehe ka ho Jesu Kriste. Ke Eena feela ea nang le tlalo ea Bomolimo; le khaphatseho ea ligrasia tsohle, ea makhabane 'ohle le ea liphetheho tsohle. Ka Eena feela, re hlohonolofalitsoe ka litlhohonolofatso tsohle tsa leholimo. Ke Eena feela Monghali ea ka rutang, Morena a inotši oa rōna, eo re tlamehang ho itšetleha ka Eena; Hloho e le 'ngoe feela ea rōna, eo re tlamehang ho ikopanya le Eona; Sesupiso se le inotši sa rōna, seo re tlanehang ho tšoana le sona; Ngaka ea rōna, e tlamehang ho re phekola; Molisa a inotši oa rona, ea tlamehang ho re fepa; Tsela ele 'ngoe feela ea rona, e tlamehang ho re tsamaisa; 'Nete e le 'ngoe ea rona, eo ho eona re tlamehang ho lumela; Bophelo bo le inotši ba rōna, bo tlamehang ho re phelisa. Ke

Eena feela eo elang tsohte tsa rōna ho limho tsohle; ea tlamehang ho re khona. Ha ho lebitso le leng tla'sa leholimo, haese lebitso la Jesu; leo ka lona re tlamehang ho pholoha. Molimo ha a hloma motheo o mong oa pholoha, oa phetheho, le oa letlōtlō la rōna, kantle ho Jesu Kriste. Mohaho ofe kapa ofe, o sa theoang holim'a lefika leo le tileng, o thehiloe holim'a lehlabathe le ntseng le baleha; 'me ka tsatsi le leng, o tla oa, ho se tika-tiko. Mang kapa mang oa balumeli, ea sa ikopanyang le Eena, joaloka lekala la morara sefateng sa oona, o tla oa! A ornelle, a be a tsoaneloe feela, ke ho lahleloa mollong. Kastle ho Eena, tsohle lia lahla ke mashano; ke bokhopo, thetso, lefu le tahleho. Haeba re le ka ho Jesu Kriste, le Jesu Kriste a le ka ho rōna, ha re hleke ho tsoha tahleho. Ha ho sebopua se ka re hlahisang kotsi, leha ekaba mangeloi a tsoang leholimong; kapa batho ba lefatše lena, leha ekaba lisatane tse tsoang liheleng! Hobane li sitoa ho re arohanya le lerato la Molimo le leng teng ka ho Jesu Kriste. Ka Jesu Kriste, le Jesu Kriste, re ka etsa tsohle! Re ka neha Ntate hlompho le tlohliso, ka kopano Ic Moea o Halalelang. Re ka phetheha 'me ra fetoha monko o monate, oa bophelo bo sa feleng, ho bana ba bo-rōna.

62* Haeba re hlahisa borapeli bo tileng ho Maria Movirigo, ke ho re, re tle re hlome borapeli bo phethehileng haholo ho Jesu Kriste. Re fumantše batho tsela e bonolo 'me ea 'nete, ho fumana Jesu Kriste. Haeba borapeli ho Maria Movirigo, bo ne bo ka re arohanya le Jesu Kriste, re ne re tla tlameha ho bo lahla ele leraba la satane! Empa hona ho sitoa ho ba teng hohang. Joalokaha ke se ke 'nile ke bontša, eibile ke tla tsoela pele ho 'na ke paka; borapeli bona bo hloka hala ruri ho rōna. Hore re tle re fumana Jesu Kriste ka tlalo; re mo rate ka lerato la bongoana 'me re Mo sebeletse ka botsepehi ba 'nete.



63* Mona nkaka ka retelehela ho Uena ho se hokae: Oho Jesu oa ka ea monate; ke na le pelaelo eo ke e hlahisang ka lerato, ho Botlōtlehi ba Bomolimo ba Hao. Ke fumana hore Bakriste ba bangata, esitana le bona ba ithutileng haholo, ha ba tsebe tlamahano e tlamehileng ho ba teng, e le kepantseng, Uena le 'M'ao ea Halalelang! Morena, kamehla o na le Maria, 'me kamehla Maria o na le Uena. Eibile ha ho kamoo a ka bang teng kastle ho Uena; hoseng joalo a ka tlōhla ho ba seo a leng sona! Grasia e mo fetōletse ho Uena; no a seng a sa phele, a seng a le sieo! Empa ke Uena fe... Jesu oa ka, ea phelang 'me ea busang ka tlalo ka ho Eena; hueta ho mangeloi le ho bahalaleli bohole. A taba! Hoja re ne re ka tseba letlōtlō le lerato, leo U le fumanang ka ho sebōpuoa sena se babatsehang, mabapa le Uena hammoho le Eena! Re ne re tla ba le maikutlo a fapanang, le 'ona ao re nang le 'ona. U kopane le eena, ka tlamahano e thata haholo. Ho ka ba bonolo ho arola leseli ho letsatsi, mofuthu ho mollo; ho feta moo, ho ne ho ka ba bobobe ho U arohanya le mangeloi 'ohle le bona bahalaleli; ho e-na le ho U arohanya le Maria Movirigo! Hobane o u rata ka lerato le tukang! Eibile o u tlōtisa ka phetheho e fetang hole, ea libōpuoa tsohle tsaa Hao, ha li kopane hammoho.

64* Ha ho le joalo, Monghali oa ka ea monate, na hase ntho e makatsang, e utloisang bohlōkō, ho bona kamoo booatla le lefifi li tsoereng batho bohole hona moo lefatšeng; malebana le 'M'a Hao ea Halalelang? Ha ke bue ka bakhumeli ba melimo ea bohata, bahedene, bao ka ho sa u tsebe, ba leng hole le Uena, le 'M'a Hao, ea halalelang. Ha ke bue le ka bakhelohi le baikhaohanyi le Kereke ea Hao. Bao, ka ho ba hole le ho rapela 'M'a Hao ea Halalelang, ka ketso ena ba ikarohantse le Uena, 'moho le Kereke ea Hao e Halalelang. Empa ke bua ka Bakatholike bao har'a bona, ba bileng ba nang le bahlalefihali (doctors). Bao, ka ho ikhora moea oa ho ruta ba bang 'nete, ba sa tsebeng Uena, iaha ele 'M'a Hao ea Halalelang; haese ka mokhoa o batang, o shōohlō 'me o se nang thuso! Bahlomphehi banu, oa tsoha ba buile ka eena 'M'a Hao

ea Halalelang! Le ka borapeli boo re tlamehileng ho ba le bona ho Eena. Hoba ba bua ba re: Borapeli bo joalo bo tla tlankeilo! Le hore Uena ka sebele, U tla nyelisoa ke hlompho e fetang tšoanelo, e nehoang 'M'a Hao. Mohlomong ba ee ba utloe mohlanka ea chesehelang oa Maria, a bua hangata ka borapeli ho 'Mè enoa ea molemo, ka mantsoe a tletseng lerato le sisitseng; le matla 'me le tsitsinyang maikutlo! A hhalosa hore borapeli bona, ke tsela ea 'nete e senang mamma; e khutšoanyane e senang kotsi, hape ke tsela e hloekileng e senang koli le mamphemphe. Ke lekunutu la mohlolo ho u fumana ka eona; le ho u rata ka phetheho! Eo ba tla mo tlaka, ka ho mo tlietsa linthoana-nthoana tsa mabaka, a ho leka ho mo kholisa hore, a se ithophe hakana-kana! Ho 'na a bua ka Movirigo ea Halalelang! Hape ba re borapeling bona, ho na le litlankello tse tšabehang! Eleng lintho tseo motho eo, a tšoanelang hore a leke ho li felisa. Hape tšoanelo ea hae, ke ho bua ka Uena Morena! Ho e-na le ho hulela batho borapeling ho Movirigo ea Halalelang! Eo ba ntseng ba mo rata ka ho lekana!

Ka mohlomong u ka utloa batho bana, ba bua ka borapeli ho 'M'a Hao ea Halalelang. Eseng ho bo kenya maikutlong a batho, kapa ho bo ntšetsa-pele ka ho ba kholisa. Empa feela hore ba felise liphoso, tse ka etsoang ho bona. Atha bahlphehi bana, ba hloka borapeli le cheseho ea lerato le sisitseng ho Uena; hobane ha ba na borapeli ho Maria. Ba talima Rosari, Sekapulari le setšoantšo, ele lintho tsa maghekoana a basali, tse lokelang lithötö feela! 'Me tse sa hlokahaleng ho pholosa moea oa motho! Ha ba ka ba tšoha ba teana le mohlanka oa Mofumahali oa Rōna, ea tloaetseng ho bala Rosari, kapa ho iketsetsa ketso e 'ngoe ea borapeli ho eena; kapele-pele ba tla fetola mehopolo le maikutlo a hae. Bakeng sa Rosari, ba tla mo eletsa hore a etse lipesalema tse supileng tsa pako! Bakeng sa borapeli ho Movirigo ea Lehlohonolo, ba tla mo eletsa ho ba le borapeli ho Jesu Kristel!

Oho Jesu ea monate, na batho baa ba na le moea oa

Hao? Na baa U thabisa ka ho etsa tje? Na ke ntho e u thabisang, hore re se iteke le letho ho thabisa 'M'ao; hobane re tla tšoha re U siteloa? Na borapeli ho 'M'ao, bo loantšana le borapeli ho Uena? Na ebe 'M'ao, o sa ipolokela hlompho eo re mo nehang eona? Na oa U nena? Na ke molichaba ea senang kopano le Uena? Eona takatso ea ho mo thabisa, na e ea U soabisa? Na boinehelo ba motho ho Maria le lerato la hae ho eena, ese ele karohano le Uena; le ho lahleheloa ke lerato la Hao?

65* Empa ke re: Oho Moren'a ka ea monate, le hoja tsena tseo ke li bolelang, e ne ekaba 'nete, bongata bo boholo ba bahlalefi, ka baka la kotlo ea boikhantšo ba bona; ba ne ba keke ba hlola ba balehela borapeli ho 'M'a Hao; ho feta kamoo ba leng kateng. Oho Morena, a k'u mpe u ntšabise, u ntšireletse khopolong tsena tsa bona le liketsong tsa bona! 'Me u etse hore ke kene maikutlong a teboho, a tlotliso, a hlompho le a lerato; ao U nang le 'ona ho 'M'a Hao ea Halalelang. Ele hore, ke tle ke u rate 'me ke u tlotlise ho feta, kaha ke tla be ke U etsisa. Ke bile ke hata mehlaleng ea Hao hantle haholo, ha ke etsa joalo.

66* Joaloka motho ea e-song ho bue letho le letho feela, ho tlotlisa 'M'a Hao ea Halalelang; a k'u nthuse hona joale, ka grasia ea ho mo rorisa ka tšoanelo! Ho qholotsa lira tsohle tsa hae, tseo eleng lira tsa Hao. U ntumelle, ke ba bolelle ke kopane le bahalaleli, ke re: "Ho se be le ea mong ea ka hopolang hore, o tla fumana mohau ho Molimo, empa a soabisa 'M'a Hae ea Halalelang (Mohalaleli William oa Parisi).

67* Ele hore ke tle ke fumane ka mohau oa Hao, borapeli ba 'nete ho 'M'a Hao ea Halalelang, le hore ke tle ke bo jale lefatšeng lohle; nthuse hle; ke U rate ka lerato le tukang! Ka baka lena, ak'u amohele thapelo e tukang ea lerato, eo ke e e-tsong le Augustinus ea halalelang; 'moho le bohle ba u ratang ka 'nete:



"U Kriste, Ntate ea Halalelang, Molimo oa ka ea mosa, Morena e Moholo oa ka. Molisa oa ka ea molemo, Moruti oa ka a inotši, Mothusi oa ka oa manthla, Moratuoa oa me ea Khabane, Bohobe ba me bo phelang, Moprista oa ka ka bosa-feleng. Motataisi oa ka ho ea hae, Leseli la ka la 'nete, Bomonate ba ka bo Halalelang, Tsela ea ka e otlolohileng, Bohlale bo khanyang ba ka, Khotso ea boithabiso ba me, Tlhokomelo eohle ea ka, Kabelo ea ka e monate, Phölöho ea ka ea bosafe-leng.....

Kriste Jesu, Morena Moratuo, ke ka baka la'ng ha nkile ka rata? Ke ka baka la'ng, ha nkile ka lakatsa ho hong bophelong ba ka, kantle ho Uena, Jesu, Molimo oa ka? Ke ne ke le hokae nakong eo ka, kelello ea ka ke neng ke le sieo ho Uena? Ho tloha joale ho isa pele, Iona litakatso tsohle tsa ka, hotelang le tšolohela ho Morena Jesu: Mathang, ho fihlela joale le bile botsoa; phakisetsang ho ea moo le hopotseng teng; 'matleng eo le ntseng le 'matla. Jesu oa ka, ke re: Eo ea sa U rateng e be ea rohakehileng; ea sa u rateng a tlaloe ke libabang.... Oho Jesu ea monate, eka maikutlo 'ohle a lokileng a tšoanelang tlötliso ea Hao, a ka U rata, a iketle ho Uena, a U tlötlise. Molimo oa pelo ea kal Kabelo ea ka, Kriste Jesu, eke pelo ea ka e ka elibana ke moea oa Hao! 'Me Uena, ak'u phele ka ho 'na. Hape leshala le phelang la lerato la Hao, le ke le hlene ka moeeng oa ka; le tsoele-pele ho 'na le hlena ka aletareng ea pelo ea kal Le iketsa shekhema kahare ho moko oa masapo a kal Le etse khanare, kahare-hare ho makunutu a moea oa ka! 'Me letsatsing la ho fela ha ka, ke mpe ke fumanoe ke nyametse ka ho Uena. A ho be joalo."

HLOHO EA BOBELI: RE MAKHOBA A JESU LE MARIA.

^{68*} Ka ho ea ka seo Jesu Kriste a leng sona, malebana le rōna, re ka qetella ka ho bua hammoho le Moapostola, re re: Ha re ba rōna, empa re ba hae ka ho tlala, joaloka litho tsa Hae le makhoba a Hae; ao a a rekileng ka theko e senang ho

lekanngoa; theko ea Mali a Hae! Pele ho Hlatsuo, re ne re le ba satane; re le makhoba a hae! Joale Hlatsuo e re entse ruri makhoba a Jesu Kriste; a tšoaneloang ke ntho e le 'ngoe feela, ho beela Molimo-Motho litholoana ka bophelo, mesebetsi le lefu la rōna. Re mo tlötlise ka 'mele oa rōna, re Mo etse hore a buse ka moeeng oa rōna. Hobane re khapo ea Hae, bathluoa ba Hae le lefa la Hae! Ka mabaka 'ona ana, Moea o Halalelang, o re tšoantša le:

1. Lifate tse lenngoeng pel'a metsi a ligrasia, tšimong ea Kereke, tse tšoanetseng ho bea litholoana tsa tsona, ka nako ea teng.
2. Makala a morara oo Jesu Kriste, eleng sefate sa oona; 'me a tlamehang ho bea litholoana tse hlabosehang.
3. Mohlape, oo Jesu Kriste eleng Molisa oa oona; 'me o tlamehang ho ata le ho hlahisa lebese. Hape O re tšoantša le:
4. Mobu o motle, oo Morena Molimo eleng molemi oa oona; 'me peo e tsoa ka bongata. E 'ngoe e beha ha mashome a mararo, e 'ngoe ha mashome a tšeletseng, le e 'ngoe halekholo. Jesu Kriste o ne a rohake sefate sa feiga se sa beheng; a ba a ahlöla mohlanka ea senang thuso, ea sakang a hoeba ka talenta ea hae. Tsena, ke bopaki ba hore Jesu Kriste o rata ho fumana ho rōna bafokoli, litholoana tse itseng; eleng mesebetsi e loki-leng ea rōna, hobane ke ea Hae a inotši: "Le bopetsoe mesebetsi e metle ho Kriste Jesu." Mantsoe ana, a Moea o Halalelang, a bontša hore Jesu Kriste, ke Eena feela mohloli oa mesebetsi ea rōna e metle. 'Me e ka khona e be Eena feela qetello ea eona. Le hore re tlameha ho Mo sebeletsa, eseng joaloka bahlanka feela ba lefuoang; empa joaloka makhoba a lerato. Ke se ke tla hhalosa mehopolo ea ka.



69* Lefatšeng lena, ho na le mekhoa e 'meli ea ho busoa ke e mong; le ho ba tlas'a tsamaiso ea hae: Ke ho ba mosebeletsi oa hae, le lekhoba la hae. Ha ho boleloa mosebeletsi, ke hore motho o itlama ho sebeletsa e mong, ka nako e itseng. Ka moputso o reretsoeng hoo, kapa ka tlhopiso e itseng. Ha ho boleloa bokhoba, ke hore motho o tlas'a e mong hohang, ka bophelo bohle ba hae. Ebile o tlamehile ho sebeletsa mong'a hae, a sa lebelle leha ele moputso, leha ele tlhapiso. O tšoana le e 'ngoe feela ea liphooftlo tsa hae, tse ruiloeng. Eo mong'a eona, a nang le tokelo ea ho e bōlōkela bophelo, kapa ho e bolaea.

70* Joale re fumana hore, ho na le mefuta e meraro ea makhoba: makhoba a tlhaho, makhoba ka tlamello, makhoba ka boikhethelo. Libōpuoa tsohle ke makhoba a Morena Molimo, ka bokhoba ba tlhaho: Lefatše ke la Morena le tsohle tse ho lona". (Ps. 23). Lisatane le ba lahlehileng ke makhoba; ka tlhaloso ea bokhoba ba tlamello. Bahalaleli le ba lōkileng ke makhoba; ka tlhaloso ea bokhoba ba boikhethelo. Bokhoba ba boikhethelo bo bottle! Bo neha Morena Molimo tlottiso e kholo; hobane O talima pelo, O batla pelo ea motho. O bile O ipitsa Molimo oa pelo ea motho (Ps. 23, 26; Ps. 72, 26). Ho joalo hobane ka bokhoba bona, re ikhethela Molimo le tšebeletso ea Hae, ho feta tsohle; esita lehaeba re ne re sa tianngoe ke molao oa tlhaho.

71* Ho na le phapano e tletseng, mahareng a mohlanka le lekhoba;

1. Mohlanka ha a nehe mong'a hae, sohle seo a leng sona, le sohle seo a nang le sona. Ha a mo nehe tsohle tseo a ka iphumanelang tsona ka boeena, kapa ka e mong. Empa lekhoba le ineha ho mong'a lona ka ho tlala, seo le leng sona, tsohle tseo le nang le tsona, le tsohle tseo le ka li fumanang, ho se letho leo le ipolokelang lona.

2. Mohlanka o batla moputso oa mesebetsi, eo a e e-tselitseng mong'a hae. Empa lekhoba ha ho letho leo le ka le

batlang; leha le ka sebetsa ka cheseho e kholo, ka tsebo le ka matla 'ohle a lona.

3. Mohlanka a ka 'na a itsamaela, a siea mong'a hae ka nako eo a e ratang; kapa bonyane ha nako ea mosebetsi oa hae e felile. Empa lekhoba ha le na tōkelo ea ho siea mong'a lona, ka nako eo le ka e ratang.

4. Mong'a mohlanka, ha a na tokelo holim'a bophelo, le lefu la mohlanka oa hae. Haeba a ka 'molaea joaloka ha a ipolaela e 'ngoe ea liphooftlo tsa hae, a ka ba le molato oa polao ea motho. Empa mong'a lekhoba, ka molao, o na le matla a lefu le bophelo, holim'a lekhoba la hae. Hoo a ka le rekisang ho mang kapa mang eo a mo ratang; kapa, a le bolaea, joalokaha a ka ipolaela pitsi ea hae.⁽¹⁾

5. Hape mohlanka o mosebetsing oa mong'a hae, ka nakonyana e itseng. Empa lekhoba, ke kamehla eohle.



72* Har'a batho, ha ho ntho e etsang hore e mong, e be oa e mong ho feta bokhoba. 'Me kahoo har'a bakriste, ha ho letho le re etsang hore re be ba Jesu Kriste le ba Maria 'M'a Hae ea Halalelang, ho feta bokhoba ba lerato. Ka ho etsisa Eena Jesu Kriste, eo ka baka la ho re rata, a neng a inkele sebōpeho sa lekhoba. Le ka ho etsisa Movirigo ea Halalelang, ea neng a ipitsa lekhabunyane le lekhoba la Morena. Moapostola o ipitsa ka mokhoa oa hlompho: Lekhoba la Kriste. (Rom. 1; Gal. 1, 10; Phil. 1, 1; Tit. 1, 1).

Paulus ea halalelang, ka ho pheta mantsoe ana hangata, o bontša hore bokhoba ba rona ho Jesu Kriste, ha bo loantšane le mantsoe a Jesu ho Joannes (XV; 5.) Ka makhetlo a mangata, Mangolong a Halalelang, Bakriste ba bitsoa ma-

⁽¹⁾Ha ho motho leha a le mong, ka ho ea ka thuto ea Molimo, ea Molao oa Khale le o Mocha, ea nang le matla a ho bolaea e mong joaloka phoofolo. Feelia mona Louis-Maria o mpa a rata ho bontša mofuta oa boitšetleho ba rona le boemo ba rona ho Molimo, e le qetello ea rona, Maria e le tsela.

khoba a Kriste. Lentsoe lena la "Servus," ke lentsoe la selatine. (Henri-Marie Boudon, Archdeacon oa Evreux) Nakong tsa pele, le ne le sa bolele ho hong haese "lekhoba," joalokaha monna e mong ea tumileng a bolela. Hobane ho ne ho se na bahlanka ba kang ba kajeno. Batho ba ne ba sebeletsoa ke makhoba kapa makhoba a lōkōlōtsoeng. Hore re tle re seke ra ba ra salloa ke pelaelo ea letho, ka hore re makhoba a Jesu Kriste: Katekisima, ea Sebōka se Halalelang sa Trente, e bolela phatlalatsa ka mantsoe a sa hakeng. E re bitsa: "Makhoba a Jesu Kriste". "Mancipia Christe." Ha re se re boletse tsona tsena.

73* Ke re, re tlamehile ho ba ba Jesu Kriste; ho Mo sebeletsa, eseng joaloka bahlanka ba shebileng moputso. Empa joaloka makhoba a lerato, a inehelang ho Eena ka lebaka le le leng, la ho ba ba Hae feela qha. Pele ho Hlatsuo, re ne re le makhoba a satane! Hlatsuo e re entse makhoba a Jesu Kriste. Bakriste e ka khona e be makhoba a Jesu Kriste kapa a satane.

74* Jesu Kriste o ile a khetha Maria, hore a be le Eena. 'Me a seke a ba a arohana le Eena bophelong ba Hae, Le-fung, Letlötlong, le Boreneng ba Hae leholimong le lefatšeng. Ka baka lena, seo ke se buang ka Jesu Kriste ke sa behe moeli, ke se bua ka ho tšoana; empa ele ka mokhoa o mong, ka Maria Movirigo.

Ka grasia, Jesu o nehile 'M'ae ea Halalelang, litokelo tseo eleng tsa Hae ka tlhaho. "Tsohle tseo eleng tsa Molimo ka boleng, ke tsa Maria ka grasia." Ho rialo bahalaleli. Kaha Jesu Kriste le Maria, ba e-na le thato e tšoanang, le Matla a tšoanang; le teng ba na le babusuoa, le bahlanka le makhoba a tšoanang

75* Ka ho latela maikutlo a Bahalaleli le a batho ba baholo ba bangata, re ka italima, ra ba ra hla ra iketsa makhoba a lerato, a Maria Movirigo ea Halalelang haholo. Ele hore re tle

re be makhoba a Jesu Kriste ka ho tlala. Maria Movirigo ke tsela eo Moren'a rona, a neng a tle ho rōna ka eona; 'me e ntse e le tsela eo rōna, re tlamehang ho fihla ho Eena ka eona. Maria ha a tšoane le libopua tse ling, tseo, ekareng ka ho li khomarela, li ka re arohanyang le Molimo; bakeng sa ho re lebisa ho Eena. Takatso e kholohali ea Maria, ke ho re kopanya le Jesu Kriste, Mor'a hae. Le takatso e kholohali ea Mora, ke hore re tle ho Eena ka 'M'a Hae ea Halalelang. Ke ntho e mo thabisang e bileng e Mo hlomphang! Joalokaha ele ntho e ka thabisang 'me ea hlompha Morena, haeba e mong, ka ho rata ho ba mohlanka le lekhoba la hae ka tlalo, a ka iketsa lekhoba la Mofumahali. Ka mabaka ana, bo-Ntate ba Halalelang ba Kereke, le Bonaventura ea Halalelang; ba re: "Tsela e isang batho ho Morena oa rōna Jesu Kriste, ke Maria Movirigo."

76* Maria Movirigo ke Mofumahali, le Mophahameli oa leholimo le lefatše. Joalokaha Bahalaleli: Anseleme, Bernard, Bernardine le Bonaventura, ba bolela: "Tsohle, esita le Movirigo Maria, li ka tlas'a 'Muso oa Molimo. 'Me bonang! Tsohle, esita le Molimo, li ka tlas'a 'Muso oa Maria!" Ka baka lena, palo ea bahlanka le ea makhoba a Maria, e lekana le palo ea libōpuoa! Ana joale hase ntho e utloahalang, hore har'a makhoba a mangata hakale a qobello! Ho be le makhoba a mang a lerato, a ikhethelang Maria, ka boithatelo ba 'ona bo tletseng; hore e be Mofumahali oa bona? Khele! Batho feelsa esita le lisatane, li ka ba le makhoba a tsona, empa Maria a se ke a ba le 'ona, Eena! Ana morena oa lefatše, a keke a talima ele tlötlä hore Mofumahali, molekane oa hae, a be le makhoba ao a nang le tōkelo ea lefu le ea bophelo ho 'ona! Kaha hlompho le borena ba mofumahali, ele hlompho le borena ba morena! Na ha ho le joalo, ke ntho eo re ka e hopolang, hore Jesu Kriste, eo eleng ngoana ea lōkileng har'a bana bohle; Eena ea abelanang le 'M'a Hae ea Lehlohonolo, matla 'ohle a Hae; o tla utloa bohlōkō ho bona eena 'M'a Hae, a e-na le makhoba na? Na a ka hloloa ke Assuerues ka lerato la hae ho

Esthere? Le ke Solomone, ka hlompho ea hae ho Betsabee?
Ke mang ea ka buang leha e le ho hopola joalo!

77* Ao! Lesiba la ka le ntse le nkisa kae na? Ke ka baka la'ng
ke jang sebaka, ho paka 'nete e pepeneneng hakale?
Haeba batho ba sa rate ho ipitsa makhoba a Maria, hoo ho
etsa'ng? A ba ke ba iketse 'me ba ipitse makhoba a Jesu Kriste!
Ena ke taba e tšoanang leha ele makhoba a Maria. Hoba Jesu
ke ngoana le letlotlo la Maria. Sena, ke seo re se etsang hantle
haholo ka borapeli bona, boo ke seng ke tla bua ka bona.

**HLOHO EA BORARO: RE TLAMEHA HO IKHOHLOPA
BOBE, BOO RE NANG LE BONA.
MARIA O RE THUSA HO ETSA JOALO.**

78* Liketso tsa rōna tse ntlehali, li atisa ho silafatsoa le ho
senngoa ke tšekamelo ea bobe, bo leng teng ka ho
rōna. Ha metsi a matle a hloekileng, a tšeloa ka pitseng tse
nkhang hampe ke hlobo; kapa veine e tšeloa ka faking, e seng
e sentsoe ke veine e 'ngoe, e seng e ile ea e-ba kateng pele; e-
ba 'ona metsi a hloekileng kapa eona veine e ntle, li tla senye-
ha. Li nke kapele monkho oo o mobe. Ho joalo le teng, ha
Morena Molimo a tšela ka lipitseng tsa moea oa rōna, o
senyehileng ke sebe sa tlhaho, le ke libe tsa rōna; metsi a
leholimo a ligrasia tsa Hae, kapa veine e monate ea lerato la
Hae; hangata limpho tsa Hae lia senyeha. Ebile li silafatsoa ke
tomoso ea bobe; le ke likhore-khore tse chefo, tse siiloeng ke
sebe ka ho rōna. Liketso tsa rōna, esita le tse ntle haholo, tse
hlomphehang, li ntse li angoa ke litšila tse mpe tsa sebe. Ke
taba ea bohloko a hore re batle phetheho; e fumanoang feela,
ka boiphapanyo le Jesu Kriste. 'Me ka hona re hle re ikhōhlōpe
hohle ho bobe, ho ka ho rōna. Hoseng joalo, Morena a rōma,
Eena ea hloekileng ka mokhoa o se nang tekanyo, ea bileng a
hloileng le lethejana feela moeeng; o tla re teela thoko le
Eena, 'me a keke a ikopanya le rōna.



79* Ho hlōbōla botho ba rōna, re tšoanetse ho tseba ka
tlalo, le ka thuso ea leseli la Moea o halalelang, hore
botho boo ba rōna, bo senyehile. Le hore re hloka matla a ho
etsa letho le ka re thusang, ho phōlōsa moea oa rōna. Re
tšoanetse ho tseba hape bofokoli ba rōna linthong tsohle; ho
thekesela ha rōna ka nako tsohle, ho se tšoaneloe ke grasia efe
kapa efe ea Morena Molimo, le bokhopo ba rōna ba mehla.
Sebe sa batsoali ba rōna ba pele, se batlile se re senya ho-
hang! Se re lomosa, se kōkōmosa, se bile se putisa e mong le
e mong oa rōna! Joalokaha tomoso, e qala ka ho hlanyisa
hlama, eo e kentsoeng ho eona, e ntan'o e kōkōmosa, e be e e
bolise. Libe tseo re li entseng tse bolaeang kapa tse nyenyane,
le hoja li tšoaretsoe, li ile tsa eketsa litakatso tse mpe tsa rōna;
bofokoli ba rōna, ho se tsitse ha rona, le ho senyeha ha rona.
Tsa ba tsa re siela tšekamelo ea bobe, ka moeeng oa rōna.

'Mele ena ea rōna e senyehileng, hoo e bitsoang 'mele
ea sebe, ke Moea o Halalelang (Rom. 6.6). Ele hore 'mele oa
sebe o tl'o senngoe, ele hore re se hlole re sebeletsa sebe (Ps.
50.7). 'Mele ea rōna ke: 'Mele e emoletsoeng sebeng, e ötloang
sebeng, e sekametseng libeng tsohle; 'mele e tlas'a mafu a li-
kete-kete, 'mele e ntseng e tsoela pele ho senyeha, 'mele e
emereng mafu feela, chefo le ho bola.

Moea oa rōna, ka ho kopana le 'mele oa rōna, o imetsoe
ke litakatso tsa nama, hoo o seng o bitsoa nama: "Nama eohle e
senyehile". (Gen. 6. 12). Seo eleng sa rōna feela, ke boikhantšo
le bofou ba kelello, manganga a pelo, bofokoli le ho thekesela
ha moea, litakatso tse mpe, mabela a mabe le mafu a 'mele. Ka
tlhaho, re ikhantša ho feta pikoko! Re itšoarelletse ka lefatše ho
feta linqaqana, re litšila ho feta lipoli, re mōna ho feta linoha, re
meharo ho feta likolobe, re khannoa ke khalefo ho feta linkoe,
re botsoa ho feta likhofu, re fokola ho feta lehlaka! Re bile re
feto-fetoha habonolo ho feta le lesiba le tsokotsoang ke moea.
Ka ho rōna ha ho letho haese sebe le bofeela-felane; 'me re
tšoaneloa feela ke khalefo ea Molimo le ke mollo o sa feleng.

80* Na joale re ka makala ha Morena oa rōna a itse, mang kapa mang ea ratang ho Mo sala morao, o tlameha ho itebala le ho hloea bophelo ba hae? Le hore mang kapa mang ea ratang bophelo ba hae, bo tla mo lahlehela? Le hore mang kapa mang, ea tla hloea bophelo ba hae, o tla bo phōlōsa? Bohlale bo se nang qalo le qetello, Eena, ea kekeng a neha melao kantle ho mabaka; o re laela hore re itlhoe! Hobane ruri re hlile re tšoanetse ho hlouoa. Ha ho letho le tšoanelang lerato, joaloka Morena Molimol Ha ho letho le tšoanelang ho hlouoa, joaloka rōna!

81* Taba ea bobeli ke ena: Re tlamehile ho shoa ka nqeng ea botho ba rōna, ka tsatsi le leng le leng. Ke ho re, re tlameha ho tela mesebetsi ea moea le 'mele ea rōna; re tlameha ho bona joaloka ha re sa bone! Ho utloa joalokaha re sa utloe! Le ho sebelisa lintho tsa lefatše lena, joalokaha eka ha re li sebelise. (1 Cor. 7. 29-30). Sena ke sona, seo Paulose ea Halalelang, a se bitsang lefu la matsatsi 'ohle: "Quotedie morior" Ke shoa ka tsatsi le leng le leng". Ntle le hore tlhaku ea koro e oelang mobung e shoe, e itšalla e le inotši; 'me ha e bee letho la tholoana tse ntle".

Haeba re sa shoe ka nqa ka ho rōna, haeba lithapelo tsa rōna li sa re fihlise lefung lena le molemo, re keke ra beha litholoana tse monate. 'Me borapeli bohle ba rōna, etlaba ntho e senang thuso ho rōna. Mesebetsi eohle ea rōna e neng ele molemo, e tla silafatsoa ke boithati le boithatelo ba rōna. Ebile Morena Molimo ha a na ho sheba mahlabelo a maholo, le mesebetsi e metle eo re e entseng. Kahoo, mohla lefu la rōna, re tla iphumana re se na leha ele makhabane a moea, le haele moputso. Re tla bona hore, re hloka tlhasenyana feela ea lerato le hloekileng, le nehoang meeaa e shoeleng ka nqeng ea botho. Eo bophelo ba eona, bo seng bo patiloe le Jesu Kriste ho Molimo.

82* Taba ea boraro ke ena: Har'a litšebeletso tsohle, ho Maria Movirigo ea Halalelang, eo re tšoanetseng ho e khetha, ke eona e tla re thusa haholo ho shoa, ka nqeng ea

botho. Re 'ne re hopole hore tsohle tse benyang, hase gauda! Tsohle tse monate, hase mahe a linotši, tsohle tse bonolo ho etsoa, 'me tse etsoang ke ba bangata, hase tsona tse halale-tsang. Bophelong ba botho, makunutu a teng a re thusang ho etsa lintho tse ling kapele; habonolo le ka ntle ho tieho. Le teng, bophelong ba grasia, ho na le makunutu a re thusang, ho etsa mesebetsi ea bophelo ba Molimo kapele, hamonate 'me habonolo: Ke ho itlhōbōla botho ba rōna, hore re itlatse Molimo 'me re phethehe.

Tšebetso eo ke ratang ho e supa, ke lekunutu le leng le joalo la grasia, le sa tsejoeng ke bongata ba Bakriste. Le tsejoang feela ke ba seng bakae ba barapeli, le lateloang 'me le ratoang ke ba sehlotšoana, se senyenyane ho feta. Joale pele ke hlahisa borapeli bona, 'nete e 'ngoe ea bone ke ena, e tsoang ho eona ea boraro.

HLOHO EA BONE: RE HLOKA 'MUELLI, E, 'MUELLI OA RONA JESU KRISTE.

83* Erekaha ho atamela Molimo, ele ketso ea boikokobetsos, ho molemo ho ba le 'Muelli. Eseng re mo atamele ele rōna ka kotloloho. Kamoo ke seng ke tsoa bolela kateng, botho ba rōna bo senyehile. Ka baka lena, re sitoa ho itšetleha ka eona mesebetsi ea rōna, mafolo-folo a rōna le boitokisetso ba rōna; hore re tle re finyelle ho Molimo le ho mo thabisa. Ha ho pelaelo, mesebetsi ea rōna e lokileng, e na le ho silafala. 'Me e keke ea khahlisa Morena Molimo; hore a ikopanye le rōna 'me a re utloe. Morena Molimo o ne a bone ho se tšoanee, le ho hloka matla ha rōna; ka baka lena, o ile a re utloela bohlōkō! 'Me hore re tle re atamele mehauhelo ea Hae, o re file babuelli ba matla. Ho atamela ka seqo Khalalelo ea Hae, re se na 'muelli, ke ho hloka boikokobetsos le hlompho ho Morena Molimo; Eena ea phahameng 'me ea bileng a halalelang ka mokhoa o fetisisang. Ekaba ho hloka hlompho ho Morena enoa oa marena; hobane esita le ho morena feela oa

lefatše, kapa ngoan'a morena, ha re rate ho ba atamela ho se motsoalle ea ka re buellang.

84* Morena oa rōna Kriste ke 'Muelli, le Moemeli oa rōna oa Topollo ho Molimo, Ntat'ae. Ka Eena, re tšoanelang ho rapela le Kereke eohle e nyakallang leholimong, 'me e loanang lefatšeng. Ka Eena re atamela Bohlomphehi ba Molimo: Eo re sa tšoanelang ho hlaħa ka pele ho Eena! Haese ha re tšeħelitsoe re bile re apesitsoe ka meuno, ea Mora oa Hae. Joalokaha Jakobo a ne a tle ho ntat'ae Isaaka, a apesitsoe matħaloana a lipotsanyane, hore a tle a amohele hlohonolofatso ea ntat'ae.



85* Empa na ha re hloke 'muelli e mong, ho 'Muelli e Moholo oa rōna? Na tōka ea rōna e phethethile, hore e tle e re kopanye le Eena hose 'muelli? Jesu Kriste ke Molimo; 'me ka mekhoa eohle o lekana le Ntat'ae. Ka baka la Lerato la hae le se nang moeli, o ile a iketsa tšiea le 'Muelli oa rōna ho Molimo Ntat'ae. Ele hore a tle a nyehèle ho Eena, le ho re lefella melato ea rōna. Ka baka lena, na re se re lōkōlōtsoe ho nyenyefatsa hlompho le tšabo ea rōna, ho Botlotlehi le Bohalaleli ba Hae? Ha re phatlalatseng ka sebete le Bernard ea Halalelang re re: "Re hloka 'muelli e mong, ho Jesu 'Muelli oa rōna ka sebele. Maria ea tlōtlisehang, ke eena ea ka tšoarang mosebetsi ona oa lerato. Ke eena eo Jesu Kriste a tlileng ho rōna, ka eena. Ke ka eena re tlamehang ho ea ho Jesu Kriste." Haeba re tšaba ho atamela ka borōna Jesu Kriste, eo eleng Molimo; ka baka la ho hlompha borena ba Hae, bo senang tekanyetso; kapa ka baka la bofuma ba rōna, kapa libe tsa rōna, a re kopeng re sa tšabe; thuso le bobuelli ba Maria, 'M'a rōna. O mosa, o lerato, ha ho tlhekefetso; ha ho bothata ba letho ho eena, ha ho lifahla-mahlo tsa mahali-hali. Ha re 'mona, re bona e mong oa nama le masapo a rōna. Eena hase

letsatsi leo, ka ho fahla ha leseli la lona, le ka re pheqelang mahlo ka baka la ho fokola ha rōna. Ka bomonate le ka bonolo ba hae, o tšoana le khoeli e amohelang leseli la letsatsi; e le nolofatsang ho le lekanyetsa matlanyana a rōna a fokolang. O tletse lerato, 'me ha a nene mang kapa mang, ea tlang ho kopa bobuelli ba hae; Ieha motho eo ekaba moetsalibe ea joang kapa joang. Bahalaleli ba re bolella, ba re: "Haesale lefatše le le teng, ha ho e-s'o utloahale, hore motho o kile a tšepa Mofuhali oa rōna ea halalelang, 'me a tiisetra ho kopa thuso ea hae; eaba motho eo oa lahlua! O matla haholo, 'me thapelo tsa hae ha li e-s'o ka li hloka thuso. O hlaħa feela ka pele ho Mora oa hae, a kopa: "Hang Morena o s'a mo neha! Hang Morena o s'a amohela thapelo ea hae." Ka baka la lerato, Morena Molimo oa hloleha ke lithapelo, tsa 'M'a Hae ea ratehang ka ho fetisisa! Eena ea neng a mo sike popelong, 'me a mo antša letsoele la hae.

86* Taba tsena kaofela, li nkiloe ho Bahalaleli Bernard le Bonaventura. Ka polelo ea bona, re na le mehatelo e meraro, ho hloella ho Morena Molimo: Oa pele, o pel'a rōna haholo-holo, 'me o tšoanelang hantle matla a rōna, ke Maria: Ke eena moemeli oa rona ka lithapelo tsa hae. Ho ea ho Molimo Ntate, re tlameha ho feta ka Jesu Kriste: Ke Eena moemeli oa rona ka Topollo. Joale he, borapeling boo ke tla bo manolla kamoraonyana, tilhophiso ena e lateloa hantle haholo.


HLOHO EA BOHLANO: HO THATA HAHOLO HO RŌNA, HO BOLOKA LIGRASIA LE MATLOTLO, AO RE A FUMANENG HO MOLIMO; HO MOLEMO HO A BEHA TŠIRELETSONG EA MARIA MOVIRIGO

87* Ke taba e hlileng e leng thata-thata ha re talima bofokoli ba rona; ho hla re ka boloka ka ho rona ligrasia le matlotlo, ao re a fumaneng ho Morena Molimo. Ka mabaka ana: 1. Letlotlo lena la bohloko, ho feta leholimo le lefa-

tše, re le nkile ka lipitsana tse shoang feela! Ke ho re: Ka 'mele o senyehileng, ka moea o fokolang, o bileng o thekeselang, o tujoang le ho tsokotsoa ke mafeela-feelane.

00* 2. Lisatane tseo eleng masholu a qetileng, li ka 'na tsa 00 re nanarela re sa iketlile, tsa re falatsal Bosiu le mōtšeare li emetse nako ea tsona. Ka nako eohle, li ntse li potapota, li tsoma ho re harola le ho re hloholo, ka ho panya ha leihlo, ka sebe sa rōna; ligrasia tsohle le meputso eohle, eo re nkileng lilemo tse ngata ho e fumana! Bokhopo ba tsona, masene, maqiti le bongata ba tsona, li tlameha ho re nyarosa! Hore re se oeloe ke bomalimabe bona! Haholo ha re hopola hore, batho ba neng ba re hlola hole ka grasia, ba re feta hole ka makhabane, ba le pele haholo ho rōna ka maele, ba re phahametse hampe-mpe ka bohalaleli; ba ne ba qetelle hampe, ba falalitsoe, ba senyehetsoe. Ao! Ke lifate tsa Cidara ea Libano tse ngata hakaakang, ke linaleli tsa maholimo tse ngata hakaakang, tse tsejoang li ne li oe hampehali, phuhlalla; 'me ka motsotsoana, tsa senyeheloa ke bophahamo bola ba tsona; le ke ho khanya hola ha tsona! Ekaba phetoho ee ea litaba e hlahile kae? E ne ese ka hobane ba hlokile grasia, hobane grasia ha e k'e e be e hlokahale ho motho; ebile ka ho hloka boikokobetso. Ba ne ba tšepa matla a bona ho feta tšoanelo; ba ne ba hopola hore ba matla a lekaneng ho ipolokela matlotlo a bona. Ba ne ba ikhotše moea, ba itšepile! Ho lekanya hore ntloana ea bona e tiile; le hore likhetsana tsa bona li matla a lekaneng, ho boloka matlotlo a bohloko a grasia. Eile ea e-ba ka baka la boitšepo boo ba bona, bo patileng hloho (lehoja ho bona e ne eka ba itšetlehile feela, ka grasia ea Molimo); ha Morena ea lokileng haholo, a ba tlohela ba itsamaisa! 'Me a ba siea potong hore ba senyeheloe. Batho ba batho! Hoja ba ile ba tseba borapeli bo makatsang; boo ke seng ke tla bo phutholla hona joale! Ekabe eba ba ne ba behe matlotlo a bona, ho Movirigo Maria ea matla, 'me ea tšepahlang haholo. 'Me een, a ka be a ile a ba bolokela 'ona ka bo-tšepehi joalokaha eka ke phahlo ea hae.

89* Ho thata ho tsoela pele le ho tiisetsa botleng, ka baka la bokhopo ba lefatše. Metsotsong ena, lefatše le putile! Hoo ho bonahalang eka esitana le lipelo tse inehetseng borapeli, li keke tsa phonyohela khenathetso ea liretsese tsa Iona; bonyane ea lerole la Iona. Ke mohlolo ruri hore motho a eme a tiile, har'a noka ena e befileng, a sa nkuoe ke eonal Har'a leoatle lena le sefe, le sa mo metse; Kapa a sa bolaoe ke linokoane le masholu a leoatlel har'a moea ona o tletseng mafu, a sa hahlameloe ke 'onal Ke Maria Movirigo feela ea tšepehileng a inotši, ea sa kang a hloloa ke noha, ea etsang mohlolo onal Ho bao ba mo ratang ka lerato le tileng 'me la 'nete.



Ke 'nete hore motho ea balang buka ena, o hoheloa ke Maria, hoba e na le tsohle tse hloka halang. E hlakile, e tletse borapeli bo kholisang ho mang kapa mang. Ebile e ngotsoe ka bokheleke 'me e na le tšusumetso ea Moea o Halalelang. Buka ena ea Louis-Maria oa Montfort ke ea bohlokoahali Kerekeng.

*Frank Duff
Mohlomi oa Lebotho la Maria*

KHAOLO EA BORARO

KHETHO EA BORAPELI BA 'NETE, HO MOFUMAHALI OA RONA.

90* Joale ha re se re hhalositse linnete tsena tse hlano, ho hloka halala haholo ho motho, hore a tsebe ho khetha ka nepo, borapeli ba 'nete ho Maria Movirigo. Hobane hona morao tjena, ho se ho e-na lemekhoa e meng e ka lahlang motho habonolo; eka hoja e le borapeli ba 'nete. Satane, joaloka moloi oa balotsana, o se a 'nile a thetsa, 'me a lahlela meeaa e mengata liheleng; ka ho e neha borapeli bo fosahetseng ho Maria Movirigo. Le kajeno o ntse a bo sebelisa ka maqiti a hae a bosatane! Ho lahlala meeaa e meng e mengata hape. Ka ho e robatsa sebeng le ho e koeetsa, hore e lale libeng tsa eona. Ka ho e tšepisa pholoho, ka baka la lithapelonyana tse ling, tseo e 'nileng ea li etsa hampe; le ka mokhoa feela. Lesholu le lekang ho foroma chelete, le ithusa ka gauda le silevera feela; eseng ka chelete e katlase! Hobane e se na theko e kholo. Le eena Satane, ha a tšabe hakaakang borapeli bo bong, haese ho Jesu le Maria – Borapeli ho Sakramente ea Eukariste, borapeli ho Mofumahali oa rōna ea lehlohonolo. Hobane borapeli ho bona, ha bo bapisoa le borapeli ho ba bang, eka gauda le silevera ha li bapisoa le majoe a mang.

91* Kahoo, ke taba ea bohloko ka sebele, hore pele: Motho a tsebe pele litšebeletso tse fosahetseng ho Maria Movirigo, a tle a tsebe ho li qoba. Le hore a tsebe borapeli bo nepahetseng, a tle a tsebe ho bo sebelisa. Taba ea bobeli: Ke ho tseba hore na har'a litšebeletso, e 'ngoe e phethehileng, e mo thabisang, e nehang Morena Molimo letlotlo le leholohali; 'me e tsebang ho re halaletsa ho feta tse ling ke efe? Re tle re e khomarele.

HLOHO EA PELE: MATŠOAO A LITŠEBELETSO TSE FOSAHETSENG, LE BORAPELI BO NEPAHETSENG HO MOVIRIGO MARIA

1. Bachesehelli ba bohata, le litšebeletso tse fosahetseng, ho Mofumahali oa rōna ea Lehlohonolo.

92* Ke fumana ho e-na le mefuta e supileng ea borapeli ba bohata, le litšebeletso tse fosahetseng, ho Maria Movirigo. Ke ena: 1. Babelaeli. 2. Bo-ramatsoalo; 3. Baipontši, 4. Baikhohomosi; 5. Bo-Khahloane; 6. Baikaketsi; 7. Bonalana-tšooana.

1. Babelaeli

93* Bongata ba barapeli bana, ehlile ke bahlalefi ba ikhantšang, ba ikhotšeng moea, ba nang le borapelinyana bo itseng ho Maria Movirigo. Empa ba batla ba nyatsa-nyatsa litšebeletso tsa borapeli ho eena, tseo batho ba tloaetseng ho li etsa ho hlompha 'M'a Molimo. Lebaka-baka ke hobane litšebeletso tsena, li sa ee ka khopolo tsa bona. Ba batla ba sa lumele mehlolo le litaba tse ileng tsa ngoloa, ke bangoli ba 'nete. Kapa tsa fumanoa Kopanong tse kholo tsa Baitlami, tse pakang matla le mehauhelo ea Maria Movirigo. Baa belaela, ha ba bona motho a khumame pel'a Aletare, kapa setšoantšo sa Maria Movirigo; a ntse a ithapella Morena Molimo hona teng. Ba ba qosa ka sebe sa melingoana; joalokaha eka ba khumamela sefate kapa lejoe. Ba ithorisa ka ho re, haele bona, ha ba hlile ba ha batle borapeli bona bo hlahetseng kastle. Le hore ha ba tsamaee ba lumelaka litaba tsohle, le lipale tse boleloang ka Maria Movirigo. Ha u ka re u ba bolella lithoholetsa tse makatsang ka monate, tse rorisang Maria Movirigo, tse entsoeng ke bo-Ntate ba Kereke; ba tla u arabela ka ho re: Bo-Ntate bao, ba ne ba nkiloe ke bokheleke, ba eketsa litaba; kapa ho hhalosoa mantsoe a bona kahosele.

Mofuta osele ona oa batho ba ikhantšang, o tšoanelia ho tšajoa hampe haholo. Ebile o jala kotsi e senang phekolo, malebana le borapeli ho Maria Movirigo. Ka bolotsana ba ho re ba felisa liphoso, ke moo ba atlehang ho nyametsa ruri borapeli ba 'nete, lipelong tsa batho.

2. Bo-Ramatsoalo.

94* Bo-ramatsoalo ke bao ba tšabang ho tlottolla Mora, ka ho hlonepha 'M'ae. Ba tšaba ho soabisa Mora ka ho phahamisa 'M'ae! Ha ba utloisise hore re ka hlahisetra Maria Movirigo, tlottiso tse ntlehali! Tseo a li etselitsoeng ke bo-Ntate ba halalelang ba Kereke. Ke ntho e ba belaetsang ho bona sehlopha se seholo sa batho, se khumame pel'a aletare ea Maria Movirigo, ho feta se ka pele ho Sakramente e Halalelang. Eka hoja litšebeletso tsena li loantšana, kapa eka hoja bao ba rapelang Maria Movirigo, ha ba rapele Jesu Kriste ka eena Maria. Ha ba batle ho re utloa re ntse re bua hangata ka Maria, le hobesale re mo rapela hakana-kana.

Lipolelo tsa bona tseo ba li phetang kamehla ke tsena: "Molemo oa Lirosari tse ngata hakale, oa likopano tse ngata, oa litšebeletso tse etsetsoang Maria Movirigo, ke ofe? Lintho tsena li bontša booatla feela. Ke ho fetola borapeli ba 'nete, sesomo feela. Nka rata ho utloa batho ba nang le borapeli ho Jesu Kriste." (Empa ke re, ba atisa ho bitsa Lebitso la Hae, ba sa role katiba ea bona. Che, ke mpa ke bua sena ke feta!) "Re tlameha ho ea ho Jesu Kriste; ke Eena feela 'Muelli oa rōna. Re tšoanelia ho ruta batho Jesu Kriste; ke bona he, borapeli bo tiileng".

Ka nq'e 'ngoe, seo ba se bolelang se nepahetse! Empa kahobane ba se bua ho thibela borapeli ho Maria Movirigo; ke leraba le kotsi-kotsi la mano a "E-mobe", le nkileng sebopeho sa botle! Hobane ha ho nako eo re hlomphang Jesu Kriste ka qeto, ho feta ha re hlompha 'M'a Hae haholo. Hobane Maria feela, ele tsela e re isang qetellong ea seo re se batlang, eleng Jesu Kriste.

95* Kereke le Moea o Halalelang, li qala ka ho rorisa pele Maria Movirigo, li ntan'o rorisa Jesu Kriste: "U lehlohonolo har'a basali, le Jesu Ngoan'a popelo ea hao o lehlohonolo." Hase hore Maria o ka holimo ho Jesu, esitana leha ele ho lekana le Eena – Hoo e ka ba bokhelohi bo boholo. Empa, hore re tle re rorise Jesu ka tlalo eohle, ekakhona re rorise Maria pele. Re tlohele barapeli bana ba bohata le bo-ramatsoalo! 'Me re hoeletseng le bacheseheli ba 'nete ba Maria Movirigo, re re: "Oho Maria, u lehlohonolo har'a basali, le Jesu ngoana oa popelo ea hao o lehlohonolo."

3. Baipontši.

96* Baipontši ke batho ba etsang hore, borapeli ho Maria Movirigo, bo be liketsong tse kantle! Ba khahloang ke liketso feela tse bonoang kantle, hobane ke batho ba senang moea oa borapeli bo kahare. Ba tla etsa lirosari tse ngata ka potlako feela! Ba e'o utloa Missa e mengata ho se tlhokomelo ea letho! Ba kene mekolokong e mo hlomphang, ho se borapeli le letho. Ke batho ba kenang likopanong tsohle tsa mabotho a hae, ba sa fetole bophelo ba bona bo bobe. Ba sa ikhathatse ka letho ho loantša litakatso tsa bona tse mpe; ba sa leke ho etsisa Movirigo ea Halalelang haholo, mekhabong ea hae ea moea. Borapeling ba bona, ba ithatela feela se bonoang ka mahlo; 'me ha ba hloke hoo eleng moko oa borapeli! Haeba ba sa utloe bomonate ba pelo borapeling ba bona, ba hopola hore ha ba etse letho! Ba qala ho tsokotseha, le ho lahla tsohle! Hoseng joalo, ba etsa tsohle ka mohoalotso feela. Lefatše le tletse barapeli bana ba mofuta oa batho, ba nyekollang barapeli ba bang; ba itekang ka matla ho phetha borapeling bo kahare. Eleng seo ba se batlang, ba sa lahle boithompho bo kantle; bo tsamaeang kamehla le borapeli ba 'nete.

4. Baikhohomosi.

97* Batho bana ke baikhohomosi; ke baetsalibe ba fetohileng makhoba, a litšekamelo tsa bona tse mpe. Hape ke metsoalle ea lefatše! Bao ka ho ikuhumetsa ka lebitso le letle la Bakriste, le bacheseheli ba Maria Movirigo, ba patileng boikhantšo ba bona! Bokhonatha, tse hlabisang lihlong; botaho, bohale, bonyefoli bo bobe, lithohako, ho hloka toka ha bona, le tse ling tse joalo. Ba iphelela ka khotso har'a melemalo ea bona e mebe, ho se boiteko bo boholo ho itokolla ho tse joalo. Ka boitsepiso ba ho re ba cheshela Maria Movirigo; ka baka la hobane ba etsa Rosari, ba itima lijo ka Moqebelo! Kahobane ba kene Likopano tsa Rosari e Halalelang kapa tsa sekapulari. Kapa ka hobane ke litho tsa likopano tse ling, 'me ba apere seaparo sa Maria Movirigo. Kapa ba iholisa hore Molimo o tla ba tšoarela libe tsa bona! Le hore ba keke ba e-shoa ba e'so ipolele; le hore ba ke ke ba lahleha.

Ha u ka ba bolella hore borapeli bo joalo, ke sefi sa satane, le boikakaso bo kotsi e tšabehang, e ka 'nang ea ba bolaea, ba hana ho u kholoa. Ba araba ka ho re: Molimo o molemo 'me o mohau! Le hore ha a re etsetsa ho re lahlela liheleng! Hape le teng ha ho motho ea hlokang sebe; le hore ha ba tl'o shoa kantle ho boipolelo! Le hore ka nako ea lefu, ba bolela feela hore ke soabile; ho tla ba lekana! Hape ba bolela hore ke bachesehelli ba Maria Movirigo, ba bile ba roala sekapulari sa hae! Etsoe, ha ho letsatsi le fetang ba sa etse "Ntat'a rōna le Ahe Maria!" Ba supa ho mo hlonepha le hona ka botšepehi le ka boikokobetso; le hore ka mohlomong ba hle ba etse eona Rosari le "Thapelo ea Kereke" ea Maria Movirigo; kantle ho boitimo, le tse ling tse joalo.

Ho tšehtsa tsena tsohle tseo ba li bolelang, le ho itantella ho feta, ba tlisa litaba tseo ba li utloileng kapa ba li balileng, – kapa ke 'nete kapa ke mashano, ho bona hoa tšoanal Litaba tse bolelang kamoo, batho neng ba shoele sebeng se

bolaeang ba sa ka ba ipolela; ba neng ba tsosoe bafung, hore ba tle ba ee maipolelong! Kapa kamoo moea oa bona o neng o bolokoe ka mohlolo, 'meleng oa bona, ho fihlela ba ipolela! Kapa, kamoo ba neng ba fumane ho Morena Molimo, mototsong oa lefu la bona, soabo le tšoarello ea libe tsa bonal 'Me kahoo ba pholoha, ka mohau oa Maria Movirigo. Hobane na-kong ea bophelo ba bona, ba ne ba ile ba 'na ba etsa lithapelo, kapa liketso tse itseng tsa borapeli ho Eena. Le bona ba tšepa hore ba tla hlaheloa ke tse joalo.

98* Litaba tsohle tsa tumelo ea rona ea Bokriste, ha ho ntho e tšoanelang ho tšoeloa ka mathe, ho feta boikhan-tšo bona bo bobel! Re ka re re rata, 'me re hlonepha Movirigo ea Lehlohonolo, kannete joang? Ha ka libe tsa rona, kantle ho mohau le letho, re hlompholla ngoana oa hae Jesu Kriste? Re mo thakhisa, re mo hlabaka le ho mo tetetsa? Haeba Maria ka mohau oa hae, a itlama ho pholosa batho ba mofuta ona, etlaba o khothaletsa bobel! 'Me ebile o tlatsetsa hore ngoana oa hae a thakhisoel! Ke mang ea ka hlang a ba le sebete, ho hopola joalo?

99* Ke tiisa ke re, tšenyo e joalo ea borapeli, ho Maria Movirigo, boo kamorao ho ba Morena oa rōna Sakramenteng ea Eukariste, eleng bo botlehalo 'me bo halalelang ka ho fetisia, ke ntho e kang tlontollo e mpe ka ho fetisia! E kholahali 'me e thata ho tšoarello! Ha re sa bue ka kamohelo e mpe ea Eukariste.

Kea lumela hore hase hore, ha etlaba motho efela a ena le borapeli ba 'nete ho Maria Movirigo, hohang o tlamehile ho halalela, hoo a ke keng a etsa sebe leha se le seng! Lehoja e le ntho e lakatsehang. Empa bonyane ke ntho e tlamang (hlo-komela hantle seo ke tla se bolela) i. Ho ba le morero oa 'nete, oa ho qoba bonyane libe tsohle tse bolaeang, eleng tsona tse hlomphollang Maria Movirigo le Mora oa hae. ii. Ho ikitlaetsa ka matla, u tle u qobe sebe se bolaeang. iii. Ho kena likopanong

tsa mabotho a hae; ho etsa Rosari kapa lithapelo tse ling. Ho itima ka Moqebelo, le tse ling tse joalo.

100* Liketso tsena li hlahisa thuso ea mohlolo ho sokolla baetsalibe; leha ba ne ba se ba thatafetse pelo! Haeba mobali oa buka ena ea ka, ekaba e mong oa ba joalo, ea seng a tioletse ka leoto le leng ka selomong sa lihele; nka mo eletsa ho latela sena seo ke seng ke se boletse. Haeba a fela a phetha liketso tseno tse molemo, ho iphumanela ho Morena Molimo, ka lithapelo tsa Maria Movirigo, grasia ea ho soabela libe tsa hae le tšoarello ea tsona, le grasia ea ho hlola melemalo ea hae e mebe, etlaba ho lokile. Empa eseng hore a tle a iphelele ka khotso, bophelong bo bobe ba sebe, a sa re letho ka letsoalo le mo eletsang; ka mehlala ea Jesu Kriste le ea bahalaleli, le ka likeletso tsa Evangeli e Halalelang.

5. Bo-Khahloane.

101* Batho ba qea-qeang, ke ba chesehellang Maria Movirigo ka ho feto-fetoha le motšeare. Ka nako e 'ngoe baa tuka, ka moraonyana ba se ba bata. Ka mohlomong eka hoja ba ka mo etsetsa eng, empa ho se hokae, ba se ba fetohile. Ba qala ka ho etsa ketso tse ngata, ho Maria Movirigo. Ba kena Likopanong tsa hae tsa mabotho, empa ha ba boloke melao ea tsona ka botšepehi! Ba feto-fetoha joaloka khoeli; 'me ka-hoo joaloka eona khoeli, Maria o ba hatella tlas'a maoto a hae! Hobane ha b'a tiea, 'me ha ba tšoanele ho baloa har'a bahlanka ba Movirigo, enoa ea tšepahalang; bona ba nyantseng botše-pehi le ho tiea ha hae. Ho ka ba molemo ho se ikimetse ka bongatahali bono ba lithapelo le maiteko a borapeli, a mangata hakalo. Empa, ho molemo ke ho etsa tse seng kae ka lerato le ka botšepehi; re sa natse satane, lefatše le nama.


6. Baikaketsi.

102* Ho na le batho ba bang, baikaketsi ba sebele! Ba patang libe tsa bona le melemalo e mebe ea bona,

tias'a kobo ea Movirigo enoa ea tšepahalang. Ele hore ba tle ba hlahele mahlong a batho, eka ba lokile.

7. Baithati.

103* Hape, ho na le ba bang, baithati, ba mathelang thusong ea Maria Movirigo; hore feela, ba tle ba atlehe ho hlōla liketsong tsa bona! Ho qoba kotsi e 'ngoe e itseng, ho phekoloa lefung le itseng, kapa ho fumana molemo o mong oa bona feela! Hoseng joalo, ba ne ba keke ba ikhathatsa ka eena. Bana bohle ke barapeli ba bohatal! 'Me ba ba eo pelong ea Morena Molimo, le ea 'M'a rōna ea Halalelang haholo.



104* A re hlokomeleng ke hona, re se kene sehlopheng sa bakhanani, batho ba banyekolli; ba sa lumeleng le letho 'me ba nyatsang tsohle. Re se kene sehlopheng sa boramatsoalo, bao ka ho hlonepha Morena Jesu, ba tšabang ho inehela Maria Movirigo! Re se keneng sehlopheng sa bomponeng! Ba etsang hore borapeli bohle ba bona, e be ba liketso tse kantle feela. Re se kene sehlopheng sa baikhohomosi; bao ka bonokoane ba borapeli, bo fosahetseng ba bona, ho Maria Movirigo, ba ithetang har'a libe tsa bona. Re se keneng sehlopheng sa bo-khahloane! Bao ka baka la ho keqa, ba fetohang maitlhakisong a bona a borapeli; kapa ba a lahlang hohang, ha molekonyana e hla. Re se be sehlopheng sa baikaketsi! Ba keneng Likopanong tsa mabotho, ba roalang lipetja tsa Maria Movirigo; ele hore ba tle ba hlahele ba lokile. Qetellong, re se keneng sehlopheng sa bo-nalantašooanal Barapeli, ba mathelang ho Maria Movirigo, hore ba tle ba phekoloa mafung a 'mele, le ho iphumanelo melemo ea lefatše lena.

B. Borapeli ba 'Nete ho Mofumahali oa Rōna.

105* Haele mona joale, ke qetile ho pepesa le ho nyatsa borapeli bo fosahetseng, ho Maria Movirigo; ka bokhutšoanyane, ke tla bolela seo borapeli ba 'nete, bo leng sona. Ke bona: 1. Bo kahare. 2. Bo lerato. 3. Boa halalela. 4. Bo tiile. 5. Ha boa sheba tsa bona.

1. Borapeli ba 'Nete bo Kahare.

106* Borapeli ba 'nete ho Maria Movirigo bo kahare; ke ho re bo tsoa moeeng oa motho le pelong ea hae. Bo tsoaloa ke hlompho e kholo, eo re nang le eona malebana le eena; ke maikutlo a phahameng a boholo ba hae, le ke lerato ho eena.

2. Borapeli ba 'Nete bo Lerato.

107* Borapeli ba 'nete bo lerato, ke ho re bo tletse tšepo ho Maria Movirigo, tšepo ea ngoana ho 'm'ae ea tletseng lerato. Bo re khanna ho mathela ho eena malebana le tsohle, tseo re li hlokang, 'meleng le moeeng oa rōna. Re e-ea ka bolokolohi bo boholo, ka tšepo le ka lerato. Re kopa thuso ea 'M'a rona ka nako tsohle. hohle moo re leng teng, le holim'a lintho tsohle. Har'a lipelaelo, hore a re fe leseli; bopapatlelong ba rōna, hore a re busetse 'neteng; har'a meleko, hore a re inole; ho oeng, hore a re tsosel! Masithabelong a pelo, hore a re khotatse; makukunelong a moea, hore a re lokolle ho 'ona; lifapanong, litedkong le har'a masoabisano a bophelo, hore a re tšelise. Qetellong, har'a mahloko 'ohle a 'mele kapa a moea, lehaha la rōna la mehla ke Maria. 'Me ha re tšabe hore re ka tšoha re mo hlopha, kapa re soabisa Jesu Kriste.

3. Borapeli ba 'Nete boa Halalela.

108* Borapeli ba 'nete ho Maria Movirigo, boa halalela. Ke ho re, bo etsa hore re balehele sebe. Le hore re etsise makhabane a moea a Maria Movirigo; haholo-holo boikoko-

betso ba hae bo tebileng; tumelo ea hae e phelang, mamelo ea hae ea lesole, thapelo ea hae e sa khaotseng, boithapiso ba hae linthong tsohle; bohloeki ba hae ba leholimo, lerato la hae le khanare, mamello ea hae ea boshoela-tumelo; mosa oa hae oa mangeloi, le bohlale ba hae ba leholimo. Ana ke makhane a maholo a leshome, a Maria Movirigo ea Lehlohonolo ka ho fetisa.

4. Borapeli ba 'Nete bo Tiale.

109* Borapeli ba 'nete ho Maria Movirigo, bo tiile. Bo re matlafatsa ho etsa tse lokileng. Ebile bo re hanela ho tlohela habonolo, liketso tsa rōna tsa borapeli. Bo re etsa hore re be sebete ho loantša lefatše ka menyaka le likhathatso le litakatso tsa lona; esita le satane ka meleko ea hae. Motho ea nang le borapeli ba 'nete ho Maria Movirigo, ha a foto-fotohel Hase sefela-peloana, hase motho ea ngongorehang kapa ea boi. Hase ho re ha a sa etsa phoso, le hore maikutlo a tšeliso a tsamaeang le borapeli, ha a ke a fotoha. Empa ke ho re, haeba a oele, a tsohe hape, ka ho nanabetsa letsoho, a itšoarella ka 'M'a hae ea molemo. Haeba a lahleheloa ke bomonate bohle, le ke matšeliso a borapeli, hase ntho e mo utloisang bohloko le letho feela. Hobane mocheshelli oa 'nete, ea tšepahalang oa Maria, o phela ka tumelo ea Jesu le Maria; eseng ka maikutlo a botho.

5. Borapeli ba 'Nete ha boa sheba tsa Bona.

110* Borapeli ba 'nete ho Maria Movirigo, ha bo shebe tsa bona. Ke ho re motho ha a ipatlele tsa hae, empa o batla Molimo feela, ho 'M'a Hae ea Lehlohonolo. Bao ba nang le borapeli ba 'nete ho Maria Movirigo, ha ba sebeletse Mofumahali enoa ea phahameng, ka ho batla matlotlo kapa tse ka ba buseletsang. Kapa ka baka la molemo oo eleng oa bona feela, oa tsa lefatše kapa tsa bosafeleng; leha ele tsa 'mele kapa tsa moea. Empa ba mo sebeletsa feela, hobane a tšoane-

loa ke ho sebeletsoa, le Morena Molimo ka Eena. Ha ba hlile ha ba mo rate hobane a ba sitsa ka limpho tsa hae, kapa hobane ba lebeletse ho hong ho Eena; empa ke hobane ehlile a rateha! Ke ka hona ba mo ratang, ba bileng ba mo sebeletsang ka botšepehi, komellong ea moea le mahlomoleng. Joalokaha ba etsa litšelisong tsa moea, le chesehong e natefatsang pelo ea motho. Lerato la bona ho Eena Kalvaring, le tšoana le la *mohla mokete oa Bohali, Kana*. Ao, ba monate 'me baa khahleha, mahlong a Molimo le 'M'a Hae ea Lehlohonolo, barati ba joalo ba Mofumahali oa rona ea Lehlohonolol Ba sa ipatleleng tsa bona tšebeletsong ea bona, ho Eena! Ele hore etleebe sehlopha se seholo, ke ka baka lena, ke tšoereng lesiba la ka ho ngola pampiring mona; seo ka kattleho, ke 'nileng ke se ruta mapatlelong le likhutloaneng ka lilemo, mosebetsing oa ka ho ruta Evangel.



111* Ke se ke boletse tse ngata, holim'a Maria Movirigo. Empa ka baka la morero oo ke nang le oona, oa ho bōpa mohlanka oa 'nete oa Maria, le morutuoa oa sebele oa Jesu Kriste, ke sa tla bolela halelele. 'Me ka baka la ho hloka tsebo, bopepele, kapa bokhutšoanyane bona ba nako, ke tla siea tse ngata, ka mokhoa o kekeng oa qetoa.

112* Ao, ekaba mosebetsi oa ka o sebetsehile hantle hakaakang! Haeba bukana ena, e ka oela matsohong a moea o mong o hlomphehang! Oa ho tsoaloa ke Molimo le Maria! Eseng ka mali, kapa ka boithatelo ba nama; leha ele ka boithatelo ba monna! E ka mo koahollela, ea ba ea mo senolella, ka thuso ea grasia ea Moea o Halalelang, boholo le bohloko ba borapeli ba 'nete, 'me bo tiileng ho Maria. Boo, ke seng ke tla bo hhalosa hona joale. Haeba ke ne nka tseba hore mali a ka a silafetseng, a ne a ka thusa ho ngola holim'a pelo ea mobali, linnete tsena tseo ke li ngolang, holim'a

hlonepho ea 'Mè le Mofumahali oa ka ea monate, ea hlo-mphehang; eo har'a bana ba hae le makhoba a hae, ke leng oa qetello; ke ne ke tla sebelisa 'ona mali a ka, bakeng sa enke; ho ngola mantsoe ana! Ka tšepo ea ho fumana meea e babatse-hang; eo ka botšepehi ba eona ho maitekong ana, ao ke ntseng ke a ruta; e tlang ho lefella ho 'Mè, Moratuoa le Mofumahali; litšenyehelo tseo ke ileng ka mo etsetsa tsona, ka baka la ho hloka teboho le ho se tšepahale ha ka.

113* Kamehla ho ea ho ile, ke utloa ke ntse ke khannoa ke nyenyeletso e reng: Ke lumele ke be ke tšepe, sena se lutseng se tiile pelong ea ka. Seo ka lilemo tse telele, esaleng ke se rapella ho Molimo: Hore ekaba khalenyana kapa haufi-nyane, Maria Movirigo o tla ba le bana ba bangata; bahlanka le makhoba a mangata a lerato ho feta haesale! Le hore, ka mokhoa ona, Jesu Kriste Morena, Monghali oa me ea monate, o tla busa haholo ho feta pele, lipelong tsa batho.

114* Ke se ntse ke bona ho se pelaelo, hore libatana tse halefileng, li tla tla ka khalefo! Ho tla taböla li etsa litse-kana, ka meno a tsona a bosatane, buka ena! Hammoho le eena eo Moea o halalelang, o ileng oa mo sebelisa ho e ngola. Kapa bonyane, li tla e pata ka lefifing le khocheletsaneng ea mokotlana, hore e tle e se ke ea hlahela. Ebile li tla hlasela le ho hlorisao bao, ba tla e bala le ho e latela. Empa hoo ke'ng? Ke hantle haholo! Pono ena e ea nkhothatsa, ebile e nketsa hore ke lebelle katileho e kholo! Ke ho re ea lebotho le matla; la bahlabani ba sebete 'me ba bohale, ba Jesu Kriste; ba banna, le basali. Ba tla hlaho ho loantša satane, lefatše le botho bona bo senyehileng; metsotsong ea nako tseo tse mphehali ka ho fetisisa, tse tlang ho tla!

HLOHO EA BOBELI: MAITEKO A BORAPELI BA 'NETE, HO MARIA MOVIRIGO EA LEHLOHONOLO.

1. *Maiteko a Maholo, a Kahare le a Kantle.*

115* Ho na le maiteko a mangata a kahare, a borapeli ba 'nête ho Maria Movirigo, ka kakaretso a maholo ke ana:-

1. Ho mo hlompha ka hlompho e tšoanelang 'M'a Molimo, e bitsoang "Hyperdulia". Ke ho re: Ho mo sheba le ho mo hlompha ho feta bahalaleli bohole ba bang, joaloka sebabatso sa grasia! Le ea ka pele ho bohole, kantle ho Jesu Kriste, Motho ruri le Molimo ruri.
2. Ho inahana ka makhabane, litšitso le liketso tsa hae.
3. Ho boha boholo ba hae.
4. Ho mo neha liketso tsa lerato, tsa tlotsiso le teboho.
5. Ho mo rapela ka pelo eohle ea rona.
6. Ho inehela eena le ho ikopanya le eena.
7. Ho etsa mesebetsi eohle ea rōna, ka ho mo thabisa.
8. Ho qala mesebetsi eohle ea rōna, ho e ntsetsa pele, le ho e qetella ka eena, ho eena, le eena, bakeng la hae. Le hore re tle re etse ka Jesu Kriste, le bakeng la Jesu Kriste, qetello ea rōna. Boiteko bona ba qetello, re tla bo hhalosa hamorao.

116* Borapeli ba 'nête ho Maria Movirigo, bo sa na le mai-teko a mangata a kantle, ao har'a 'ona a maholo e leng ana:

1. Ho kena likopanong tsa hae, tsa mabotho a maholo le a manyenyane.
2. Ho kena Likopanong tsa hae tsa baitlami, tse neng li hlongoe ka ho mo hlompha.
3. Ho anetsa lithothokiso tsa hae.
4. Ho etsa liphomosetso; ho itima le ho etsa maiteko a kahare le a kantle a boithapiso, ka morero oa ho mo hlonepha.

5. Ho roala likhau tsa hae; joaloka Rosari, sekapulari, kapa ketane e nyenyane.
6. Ho etsa ka kelello, borapeli le ka boipotlo, Rosari e entsoeng ka likoto tse leshome le metso e mehlano, tsa Ahe Maria. Ka ho hlompha limisteri tse kholo tse leshome le metso e mehlano, tsa Jesu Kriste. Kapa ka ho etsa rosari ea likoto tse hlan. Eleng karolo ea boraro ea Rosari e tletseng. Ekaba ka ho hlompha limisteri tse hlan tsa Thabo, eleng: Peelo, Ketelo, Tsoalo ea Morena oa rona, Tlhoekiso, le Phumano ea Ngoana Jesu ka Tempeleng.

Ekaba ka ho hlompha Limisteri tse hlan tsa Mahloko, e leng: Tšiamo ea Lefu ka Serapeng sa Gethsemani; Chapuo ea Hae ke Pilato, Thoeso ea Mofapahloho oa Meutloa, Tjaro ea Hae ea Sefapano, le Thakhiso ea Hae Sefapanong.

Kapa ekaba ka ho hlompha Limisteri tse hlan tsa Letlötö, eleng: Tsoho ea Morena oa rōna, Nyolohelo ea Hae Leholidong, Theohelo ea Moea o Halalelang ka Pentekonta holim'a Baapostola, Nyollelo ea Mofumahali oa rōna Leholidong, le Thoeso ea hae ea Mofapahloho oa Letlotlo, ke Bapersonne ba Boraro bo Halalelang haholo.

Hape u ka 'na ua etsa rosari, ea likoto tse tšeletseng kapa tse supileng. Ho hlompha lilemo tseo ho utloahalang hore Maria Movirigo, o ne a li phele lefatšeng. Kapa ua etsa mofapahloho o monyenyane oa Movirigo ea Lehlohonolo; o entsoeng ka ho bala Ntat'a rōna hararo, le Ahe Maria ha leshome le metso e 'meli. Ho hlompha mofapahloho oa hae oa naleli tse leshome le metso e 'meli; ke ho re litšitso tsa hae. Kapa u ka etsa Thapelo ea Kereke ea Mofumahali oa rōna. E amohetsoeng kahohle 'me e etsoang Kerekeng ea Molimo. Kapa u ka etsa Lipesalema tse nyenyane, tse neng li etsoe ke mohalaleli Bonaventura ho mo hlompha; tse tletseng lerato le borapeli boo, u sitoang ho li etsa, bo sa u sisinye maikutlo. Kapa Ntat'a rona le Ahe Maria ha leshome le metso e mehlano,

ho hlompha menate ea thabo ea hae, e leshome le metso e mehlano. Ho etsa lithapelo tse ling, lifela tsa Kereke joaloka: Bo-Salve Regina, Alma Mater, Ave Regina Caelorum! Ka ho ea ka karolo tsa selemo ka Tšebeletso ea Kereke. Kapa ua etsa: Ave Maris Stella, O Gloriosa Domina, Magnificat! Kapa lithapelo tse ling tsa borapeli, tse fumanoang bukeng tsa lithapelo.

7. Ho bina lifela le ho etsa hore ba bang ba li bine, ho mo hlonephä.
8. Ho mo etsetsa koqamelo kapa hlompho, ka makhetlo a itseng. Ha ka nako eona eo, motho a ntse a pheta ha mashome a tšeletseng kapa ha lekholo, hoseng ho hong le ho hong; Ave Maria, Virgo Fidelis – Ahe Maria, Movirigo ea tšepeahalang." Ho iphumanelo ho Molimo, botšepehi ba grasia tsa hae letsatsi lohle, ka bobuell ba Maria. Le ho pheta joalo mantsiboea: "Ahe Maria, 'M'a Mohaul" Ho kopa ka eena, tšoarelo ho Molimo; ea libe tseo motho a li entseng tsatsing leo.
9. Ho ba motsamaisi oa Mabotho a hae a maholo; ho khabisa lialetare tsa hae. Ho khabisa litšoantšo tsa hae le ho li roesa mefapahloho ea tloltiso.
10. Ho jara litšoantšo tsa hae, kapa ho etsa hore ba bang ba li jare mekolokong. Le ho roala setšoantšo sa hae, ho ba seqobeletso se matla, ho loantša E-mobe.
11. Ho etsa litšoantšo tsa hae, kapa ho ngola lebitso la hae. Le hore tse na li behoe ka likerekeng kapa matlung, le lihekeng; khorong tsa metse e meholo, ea likereke le matlo.
12. Ho inehela eena ka mokhoa o moholo, o itseng.
- 117*. Ho na le maiteko a mang a mangata a halaletsang, a borapeli ba 'nete ho Maria Movirigo; ao Moea o Halalelang o 'nileng oa a nyenyeletsa meeaa e halalelang. U ka a fumana ka tlalo bukeng: "Paradise opened to Philafia." ka Ntate Barry, oa Sehlopha sa Jesu. Moo a bokeletseng boholo ba borapeli, boo bahalaleli ba neng ba iteka ka bona, ho hlompha Maria Movirigo. Ke borapeli bo thusang ka mokhoa

oa mohlolo, ho halaletsa meeaa ea batho! Ha feela, bo etsoa ka tšoanelo, ke ho re:—

- i. Ka morero o motle o lokileng, oa ho thabisa Morena Molimo feela. Oa ho ikopanya le Jesu Kriste, mohloli oa qetello ea rona; le ho khotatsa banab'abo rona.
- ii. Ka kelello, ka ho qoba metouto ea kaboomo.
- iii. Ka borapeli, ka ho se potlake, le ho phema bohlasoa.
- iv. Ka boipotlo, boitlhopharo bo rorisehang, bo hohelang.


B. Khetho ea Boiteko bo Phethehileng.

118* Empa ka mor'a tsena tsohle tseo ke tsoa li bolela, ke phatlalatsa ke sa qea-qee, hore lehoja ke batlile ke bala libuka tsohle, tse buang ka borapeli ho Maria Movirigo! Le hoja ke bile le ho buisana halelele, le ba halalelang haholo, ba bileng ba rutehileng haholo ba nako tsena; ha ke e-s'o utloe kapa ho bala boiteko ba borapeli ho Maria Movirigo, bo joaloka boo ke nang le bona ka kelellong ea ka! Bona bo qosang motho mahlabelo a maholohali, malebana le Molimo. Bo tehetseng kantle boithati ba rōna! Bo re bolokang hantle ho feta, ka botšepehi grasieng le grasia, ka ho rona! Bo re kopanyang ka phetheho e ntle ho feta, le habonolo le Jesu Kriste. Ke qetella ka ho re: Bo khahleha ho Morena Molimo ho feta, bo halaletsa moea ho feta, 'me bo na le thuso ho ngoan'abc rōna ho feta.

119* Erekaha boleng ba borapeli bona, bo le boemong bo kahare ba moea, boo moea o tšoanelang ho bo bopa; ha bo tl'o utloisisoa ka mokhoa o tšoanang, ke bohle. Ba bang – eleng bongata bo boholo ho feta – ba tla tšoara bokantle ba bona 'me ba sa ee tao. Ba bang, empa ba seng bakaenyana, – ba tla kena kahare ho bona; empa le teng ba tla emisa mohatelong oa pele. Ke bo-mang ba tla kena mohatelong oa bobeli? Ke bo-mang ba tla fihla ho oa boraro? Khabareng, ke bo-mang ba tla lula kahare ho bona, ho ba bophelo ba bona kamehla le kahohle? Ke eena feela eo, Moea oa Jesu Kriste, o

tla mo senolela lekunutu lena. Eena (Jesu) ka sebele, o tla tataisa moea o tsepahalang ho bona. Hore ho bona o phaelle mokhabo oa moea, grasia ka grasia, leseli ka leseli, ho fihlela ha o fetoha Jesu Kriste. Ho fihlela o fihla tlalong ea lilemo tsa hae ha a sa le lefatšeng, le letlötlong la hae leholimong.





KHAOLO EA BONE

**SEO BORAPELI BA 'NETE-NETE, HO
MARIA MOVIRIGO, BO LENG SONA.
kapa
BOINEHELO BO PHETHEHILENG HO
JESU KRISTE**

120* Erekaha phetheho eohle ea rōna, e fumanda ka hore re tšoane, re ikopanye re be re inehelo ho Jesu Kriste, hoa utloahala hore borapeli bo phethehileng, ke bona bo re etsang hore re tšoane le Jesu Kriste ka tlalo. Re kopane le Eena ka tlalo 'me re ikhethelo tšebeletso ea Hae, ka mokhoa o tletseng. Joale, Maria, har'a libōpuoa tsohle, ke eena ea tšoanang le Jesu Kriste ka phetheho eohle. Ka baka lena, borapeli bo kompanyang moea le Morena oa rōna Jesu Kriste; 'me bo etsang hore re tšoane le Eena qeto, ke borapeli ho Maria Movirigo, 'M'a Hae ea Halalelang. 'Me moea e tla ba oa Jesu Kriste, kamoo eleng oa Maria Movirigo kateng.

Ke ka hona, boinehelo bo phethehileng ho Jesu Kriste, ehlileng eleng bona boinehelo bo phethehileng, ba motho ea inehetseng Maria Movirigo. Eleng borapeli boo ke bo rutang. Ka ntsoe le le leng, re ka re: Ke nchafatso e qetileng, ea lipallo tsa Hlatsuo.

**HLOHO EA PELE: BOINEHELO BO PHETHEHILENG 'ME
BO TLETSENG, HO MARIA MOVIRIGO**

121* Borapeli bona ke boinehelo ba motho ka tlalo, ho Maria Movirigo. Ele hore motho e be oa Jesu Kriste ka tlalo, ka Maria.⁽ⁱⁱ⁾ Re tlameha ho mo neha:-

⁽ⁱⁱ⁾ Re ineha uena ka kelello ea rōna, ka 'mele oa rōna le ka borōna bohle ba rōna". (Joannes Damascene ea Halalelang).

1. 'Mele oa rōna, hammoho le matla a oona, le litho tsohle tsa oona.
2. Moea oa rōna, le matla 'ohle a oona.
3. Maruo 'ohle a rōna a kantle a hona joale, le ao re tla ba le 'ona ka nako tse tlāng.
4. Maruo a rōna a kahare le a moea, ke ho re, tokelo tsa rōna tsa meputso, makhabane a moea le mesebetsi e lokileng, e fetileng, ea hona joale le ea nako e tlāng. Ka ntsoe le le leng: Tsohle tseo re ka bang le tsona ka tlāhaho le ka grasia, le ka letlōtlo ka nako e tlāng. Re mo nehe tsena, re sa ipolokele leha ele sente; qoba ea moriri, kapa mosebetsinyana feela o motle oa rōna; re mo nehe tsona ka bosafeleng! Leteng re sa lebelle letho, le ho sheba moputso o mong, ka boinehelo ba rōna le ka mosebetsi oa rōna! Haese feela tlōtliso ea ho ba ba Jesu Kriste, ka Maria le ho Marial Lehoja ebe Mofumahali eo ea molemo, o ne a sa fane ho feta bohole, le ho tseba ho leboha ho feta libōpuoa tsohle! Athē 'nete ke hore o fana ho feta bohole, 'me o tseba ho leboha ho feta libōpuoa tsohle.

122* Re tšoanelā ho hīlōsa mona lintho tse peli, tse amannang le mesebetsi e molemo, eleng tefelo le moputso. Ka lentsoe le leng re ka re, mesebetsi e metle ea rōna, e na le matla a ho re lefella, a ho re rapella, le tōkelo ea ho re hlahise-tsa moputso. Matla a tefelo kapa a thapelo mosebetsing o lokileng, ehlile ke eona ketso e ntle e lefellang kotlo ea sebe. Kapa e fumanelang motho grasia e ncha, le letlōtlo le sa feleng. Joale, ka boinehelo bona ba rōna ho Maria Movirigo, re mo neha matla a mesebetsi ea rōna ea tefelo, le meputso ea mesebetsi eohle ea rōna e metle. Re mo neha meputso ea rōna, ligrasia le makhabane a rōna; eseng hore a fane ka tsona ho ba bang. (Hobane 'nete ke ho re moputso oa rōna, ligrasia le makhabane, li sitoa ho abelanoa. Ke Jesu Kriste feela, eo ka ho iketsa topollo ea rōna ho Ntat'ae, a bileng le matla a ho re abela litōkelo tsa Hae). Empa re mo neha tsona hore, Maria a re bolokele tsona, a li ngatafatse, a li ntlafatse,

joalokaha re tla hīlōsa hamorao. Re mo neha lītefelo tsa rōna, hore a fane ka tsona ho mang kapa mang eo a mo ratang; le bakeng la letlōtlo le leholo la Morena Molimo.

123* 1. Ka tsela ena, ha re fana ka matsoho a Maria, ka bona borapeli bona, re neha Jesu Kriste ka mokhoa o phethetileng ka ho fetisisa, tsohle tseo re ka mo fang tsona. Ho feta tseo a li fuoang ka borapeli bo bong, bofe kapa bofe; bo mo nehang karolo feela ea nako ea rōna, ea mesebetsi ea rōna e metle! Kapa karolo ea lītefelo, le ea liketso tsa boithapiso ba rōna. Ka borapeli bona, tsohle ho fannoé ka tsona; li bile li khethetsoe tšebeletso ea Morena Molimo. Esitana le tōkelo ea ho rera ka maruo a kahare a motho. Le ka lītefelo tseo motho a li etsang, ka mesebetsi e metle ea hae ea matsatsi 'ohle. – Eleng ntho eo, ho seng le Kopano ea Baitlami leha e le 'ngoe, e e etsang. Kopanong tsa Baitlami, Molimo re mo fa maruo a rōna a lefatše, ka kano ea Bofumanehi. Maruo a rōna a 'mele, ka kano ea Bohloeki; thato ea rōna, ka kano ea Mamelo. 'Me esita le bolokolohi ba rōna ka mohlomong, ba ho ea moo re ratang teng; ka kano ea ho se tsoele kantle ho matlo a Kopano. Empa leha ho le joalo ka likano tsena, ha re nehe Morena Molimo bolokolohi kapa tōkelo ea rōna, ea ho rera ka tlōtlo ea mesebetsi ea rōna e metle. Le hore ha re ikamohe kahohle-hohle, sona seo mokriste a se shebang ele seng sa hae, sa bohloko ka ho fetisisa. Eleng litōkelo tsa hae tsa meputso ea leholimo, le lītefelo tsa hae lefatšeng.

124* 2. Ka hona hoa utloahala, hore mang le mang eo ka boithatelo ba hae, a inehetseng Morena Molimo, 'me a ikentseng sehlabo sa Jesu ka Maria; a keke a hlōla a sa rera ka tlōtlo ea mesebetsi ea hae e metle, leha ekaba ho honyenyanyana feela. Mahloko 'ohle ao a a utloang, tsohle tseo a li nahanang, tse ntle tsohle tseo a li buang, a li etsang, ke tsa Maria. Ele hore eena Maria a tle a rere ka tsona, ka ho ea ka thato ea Mor'a hae; le bakeng la letlōtlo la Hae le leholo. Leha ho le joalo, boinehelo bona ha bo sitisise motho ka letho, ma-

lebana le litšoanelo tsa hae tsa bophelo; ba hona joale kapa tse tla ba teng kamorao. Joaloka litšoanelo tsa moprista, eo ka baka la mosebetsi oa hae, kapa ka baka la mabaka a mang, a tšoanelang ho lebisa ho motho e mong ea itseng, matla a lifestelo le lithapelo tsa 'Missa o Halalelang. Hobane boinehelo bona, bo etsoa ka ho hlompha tlhophiso e behiloeng ke Morena Molimo; le litšoanelo tse re tlamang tsa bophelo ba rōna.

125* 3. Le teng, hoa utloahala hore re inehela ka motsots o le mong, ho Maria Movirigo le ho Jesu Kriste. Ho Movirigo Maria, ele tsela e ntlehali eo Jesu Kriste, a neng a e khethé hore a tle a ikopanye le rōna, le ho re kopanya le Eena ka eona; le ho Moren'a rona Jesu Kriste, ele qetelo ea rōna. Eo ho Eena, re fumanang tsohle tseo re li hlokang; le seo re leng sona, Molopolli oa rōna le Molimo oa rōna.

HLOHO EA BOBELI: NCHAFATSO EA SEBELE EA LIPALLO, TSA HLATSUO E HALALELANG

126* Ke se ke boletse hore borapeli bona, bo ka bitsoa hantle haholo nchafatso ea 'nete, ea lipallo tsa Hlatsuo e Halalelang (n. 120). Mokriste e mong le e mong, pele ho Hlatsuo ea hae, e ne ele lekhoba la satane, hobane e ne ele oa satane. Hlatsuong, ka molomo oa hae kapa ka moemeli oa hae, mokriste o ile a latola satane ka mokhoa o pepeneneng. A lahla likhahliso tsa satane le mesebetsi ea hae. 'Me a ikhethela Jesu Kriste; ele mong'a hae le Morena oa hae ka tlalo. A iketsa lekhoba la lerato la Hae, le itšetlehileng ka Eena feelal! Ka boinehelo bona, re etsa ntho e tšoanang, re latola satane. (Joalokaha ho hhalositsoe Ketsong ea Boinehelo). Re latola lefatše, sebe le botho bo bobe ba rōna. Ebile re inehela Jesu Kriste kahohle, ka matsoho a Maria. Re bile re etsa ho fetang ka boholo, hobane hangata Hlatsuong, re bua ka molomo oa e mong; ke ho re oa moemeli oa monna kapa oa mosali, – 'me re ineha Jesu Kriste ka e mong! Athe ka borapeli bona, re etsa

seo ka borōna, ka boithatelo bohle, 'me ka tsebo ea seo re se etsang, le se tla latela kamorao ho moo.

Hlatsuong e halalelang, ha re inehela Jesu Kriste ka matsoho a Maria, bonyane ha re etse joalo pontšeng ea bohle. Hape ha re nehe Jesu Kriste, tlotlo ea mesebetsi ea rōna e metle. Ka morao ho Hlatsuo, re sala re lokolohile ho e abela mang kapa mang eo re mo ratang, kapa ho ipolokela eona. Empa ka boinehelo bona, re ineha Jesu Kriste ka mokhoa o pontšeng, ka matsoho a Maria. Re bile re mo fa tlötlo ea liketso tsohle, tsa rōna.

127* Thomas ea halalelang o re: Motho Hlatsuong, o ikana ka ho lahla satane, le likhahliso tsohle tsa hae. Kano ena ke e kholo-kholo 'me ea pele ho tsohle. Bahلالosi ba molao oa Kereke ba rialo. Kano ea pele-pele, ke eo re e etsang Hlatsuong. Empa leha ho le joalo, ke mang ea bolokang kano ena e kholo hakana? Ke mang ea phethang ka botšepehi lipallo tsa Hlatsuo e halalelang? Na e batla ese bakriste bohle ba fetohelang botšepehi boo, ba bo balletseng Jesu Kriste, Hlatsuong ea bona? 'Me ana joale, tlhokahalo ea botšepehi e aparelang lefatše, e ka hlahisoa ke'ng; kantle ho tebaloo ea lipallo le litšoanelo tsa Hlatsuo e halalelang? Le hore ho batla ho se le a le mong ea nchafatsang ka boeena, kutloano ena ea botšepehi e entsoeng ho Molimo, ka baemeli ba rōna.

128* Ena ke taba ea 'nete! Hoo, Seboka sa Sens, se neng se memiloe ka taelo ea Morena Louis Debonnaire oa France, ho tla phekola mefere-fere e neng e se le teng har'a bakriste; seboka sena se neng se fumane hore sesosa sa mantilha, sa ho senyeha hona ha lipelo tsa batho, ebile bolebalib seng bo le methapong! Le ho se tsebe litšoanelo tsa boitlamo ba Hlatsuo! Kahoo, ha sea ka sa fumana tsela e 'ngoe e ntle haholo, ea ho phekola bobe bona; ho feta ea hore bakriste ba khanneloe ho nchafatsa likano le lipallo tsa bona, tsa Hlatsuo.

129* Katekisima ea seboka se seholo sa Trent, eleng sehlaosi se tsepahalang sa seboka seo se halalelang; e khothaletsa baprista ho etsa joalo le bona, le ho khannela batho hore ba hopole ba be ba kholoe, hore ba tlameletso! 'Me ebile ba khethetsoe tšebeletso ea Morena oa rōna Jesu Kriste; joaloka makhoba, ho Molopolli le Morena oa bona.

130* Liboka tsa Kereke, bo-Ntate ba Kereke, le bolulo ba lita-
ba, li re ruta hore tsela e ntle haholo, ea ho felisa ho
hloka botšepehi ha bakriste, ke ho ba hopotsa litlamo tsa Hla-
tsuo ea bona. Le ho ba etsa hore, ba nchafatse lipallo, tseo ba
neng ba li etse hona mohla monene. Ka baka lena, ke ntho e
utloahalang hore rōna joale, re phethe taba eo ka mokhoa o
motle ka ho fetisial Eleng ka borapeli le ka boinehelo boo ba
rōna ho Moren'a rōna, ka 'M'a Hae, Maria Movirigo. Ke re ka
mokhoa o motle ka ho fetisia, hobane ka borapeli bona, re
nka tsela e phetheleng; ea boinehelo ba rōna ho Jesu
Kriste: Tsela eo, ke Maria Movirigo.

Karabelo ea Likhanyetso

131* Ha ho khanyetso e ka hlahisoang, ka ho re borapeli
bona ke ntho e nchal Kapa ka ho re ha bo hlokahale
hakaakang! Hase ntho e ncha, hobane Seboka sa Kereke, bo-
Ntate ba Kereke, le bangoli ba bangata ba khale le ba mehleng
ena, ba bua ka boinehelo bona, ho Moren'a rōna Jesu Kriste.
Kapa re ka re nchafatso ena, ea Likano tsa Hlatsuo e halale-
lang; ele se neng se etsua ho tloha khale-khale. Hoo, ba
bileng ba khothaletsang balumeli bohle, ho bo latela. Bo
hlokahala haholo, kaha re hlokomela hore mohloli o moholo,
oa mefere-fere eohle, ea boitšoaro bo bobe, le litholoana tsa
tahleho e sa feleng ea bakriste; li tsoa bolebalung le ho se na-
tseng borapeli bona.

132* Ba bang ba ka 'na ba nyatsa ka ho re, ere kahobane bo-
rapeli bona, bo re etsa hore re nehe Moren'a rōna, ka

matsoho a Maria Movirigo, mesebetsi eohle ea rōna e metle;
lithapelo, boithapiso le limpho tsa mohau; bo re sitisa ho
thusa meeaa ea batsoali ba rōna, metsoalle le bathusi ba rōna.

Mona, ke arabela' ka ho re: Pele, hase taba eo re ka e
kholoang hore metsoalle ea rōna, bang ka rōna le bathusi ba
rōna, ba ka ba le ho senyehelo; hobane rōna re chesehella
Morena oa rōna Jesu Kriste, le 'M'a Hae ea halalelang; 'me re
inehetse tšebeletso ea bona ka ho tlala. Ekaba ho nyelisa
matla a Jesu le Maria, le molemo oa bona! Bona ba tsebang
hantle haholo, mokhoa oo ba ka thusang metsoalle, bang ka
rōna le bathusi ba rōna, ka matlotlonyana a rōna a moea, kapa
ka tsela e 'ngoe. Taba ea bobeli, borapeli bona ha bo re sitise
ho rapella ba bang, leha ekaba ba phelang kapa ba shoeleng;
lehoja kabu ea mesebetsi ea rōna e metle, ele thatong ea
Maria Movirigo. Re ka re, ke ntho e tla re thusa ho rapela ka
tšepo e kholo ho fetal Morui, ka ho hlonepha morena oa hae,
ha a mo file maruo a hae 'ohle, a ka kopela metsoalle ea hae
thuso; ho eo morena oa hae, ka tšepo e kholo. Ruri ka sebele,
morena a ka thaba, ho bontša teboho ea hae ho motho eo ka
ho itlhobolisa tsohle, ka ho hlompha borena ba hae; a iqaqa-
fatsa ho mo ruisa! Sena ke seo re ka se buang, ka Moren'a
rōna Jesu Kriste le Maria Movirigo. Ba keke ba lumela hore ba
hloloe ka teboho.

133* Le teng ba bang ba ka 'na ba re: Haeba ke neha Maria
Movirigo tlotlo eohle ea liketso tsa ka, ho e abela mang
kapa mang eo a mo ratang, mohlaope, 'na ke tla tlameha ho
cha nako e telele Mollong oa Tlhoekiso. Khanyetso ena, e tsoa
boithating ba motho le booatleng, ba ho se tsebe ho fana ha
Molimo le ha 'M'a Hae ea halalelang; e fetoha maru a se nang
pula! Uena u hopola hore moea o chesehang, o mafolo-folo;
o nehang Molimo tsohle tseo o nang le tsona, o sa ipolokele le
lethonyana feela, ho fihlela o se o se na letho leo o ka
nehanang ka lona; o lakatsang letlotlo le puso ea Jesu Kriste
ka 'M'a Hae ea halalelang, 'me o iketsang sehlabo ho fumana

puso le letlotlo lena la Morena Molimo! U re'ng uena, kea botsa? U re moea oo o fanang, o nyenyefang boithati ba oona, o tla ahloloa bophelong bo tlāng? Kahobane o ile oa itela, oa ba oa fana hō feta ba bang? Le ho leka ka sebele, joalokaha re tla bona'hamorao! Jesu Kriste, Morena oa rōna le 'M'a Hae ea Lehlohonoto,, ba bontša moea oo ka tlalo limpho tsa bona, lefatšeng lena le bophelong bo tlāng.

134* Ka bokhutšoanyane, re tla ke re bue joale ka:

1. Mabaka a re khannelang ho nka borapeli bona.
2. Litholoana tse tsotehang, tse hlahisoang ka moeeng oa ba tšepahalang.
3. Maiteko a bona borapeli bona.

KHAOLO EA BOHLANO

MABAKA A RE KHANNELANG BORAPELING BONA

HLOHO EA PELE: KA BORAPELI BONA, RE INEHEDA TŠEBELETSO EA MOLIMO KAHOLE.

135* Lebaka la pele, ke le re bontšang bophahamo ba boine-helo ba rōna ho Jesu, ka matsoho a Maria. Lefatšeng mona, re sitoa ho fumana mosebetsi o phahameng ho feta ona, oa tšebeletso ea Morena Molimo. 'Me e monyenyane ho bohle har'a bahlanka ba Hae, o ruile ho feta marena 'ohle a lefatše! – Haese haeba le bona e le bahlanka ba Molimo. – Ana joale etlaba afe maruo, matla, le bohlomphehi ba mohlanka ea tšepahalang, ea phethehileng oa Morena Molimo, ea inehetseng tšebeletso ea Molimo kahohle, a sa ipolokele le lethonyana, ho ea kamoo matla a hae a ka mo jarang kateng? Ea joalo, ke lona lekhoba le tšepahalang; le tletseng lerato la Jesu, ka Maria. Lona le inehetseng tšebeletso ea Morena oa marena, ka 'M'a Hae ea halalelang haholo, 'me le sa itšielia le lethoana. Motho eo ke motho oa bohloko, ho feta gauda eohle ea lefatše, le botle bohle ba maholimo.

136* Likopano tse ling, mekhatlo le mabotho, a hlometsoeng ho hlompha Moren'a rōna Jesu Kriste le Maria Movirigo, 'me a bileng a etsa mosebetsi o motte hohle har'a bakriste; leha ho le joalo, ha li re etse hore re nehelane ka tsohle, re sa i-tšiele letho. Hobane li kopa litho tsa tsona, ho etsa mesebetsi e meng e itseng le maiteko a itseng. Empa, li ba siea ba lokolohile ho rera ka mesebetsi ea bona e meng, le metstoana e meng ea bophelo ba bona. Empa borapeli bona, bo re etsa hore re nehe Jesu le Maria, re sa itšiele le letho; mehopolohle ea rōna, mantsoe, liketso le mahloko, le metstoana eohle ea bophelo ba rōna. Ka tsela ena, leha re phaphame kapa re robetse, re e-ja kapa re e-noa; le har'a

mesebetsi e phahameng, kapa e eisehang ka ho fetisia; etlabesale ele 'nete, hore tsohle tseo re li etsang – leha re inahana kapa re sa inahane ka tsona, re li etsetsa Jesu le Maria ka matla a boinehelo ba rōna. 'Me hona ke 'nete, haese haeba pepeneneng, re fetotse boinehelo bona. A, taba e tšelisang, 'me e re kothatsang ruri!

137* Hape, joalokaha ke se ke boletse, ha ho boiteko bo bong, kantle ho bona bona, bo re hlobolisang habonolo boithatinyana ba borōna, bo ikenyang re sa hlokomele, esita le har'a liketso tsa rōna tse tlötlisehang ka ho fetisia. Grasia ena ea bohloko, morati oa rōna Jesu o re sitsa ka eona, ho re putsa! Ka baka la ketso ea bonatla le ea boitebalo ba rōna, ba ho mo fa tlötlo eohle ea mesebetsi ea rōna e metle, ka matsoho a Maria. Haeba, esitana le hona mona lefatšeng, a buseletsa halekholo bao, ka baka la ho mo rata, ba siileng maruo a bona a bonoang ka mahlo, a lefatše a senyang; ekaba o tla neha hamakholo a makae, bao ba entseng sehlabelo esita le ka maruo a bona, a kahare a moea!

138* Jesu, motsoalle oa rōna e moholo 'me ea monatenate, o inehela rōna a sa itšiele letho; ka 'mele le ka moea oa Hae, ka makhabane, ka ligrasia le meputso ea Hae. "O nthekile kaofela ha ka, ka ho inehela kaofela ha Hae." Ho rialo Bernard ea halalelang. Ana joale hase toka feela le teboho, hore re mo nehe tsohle tseo re nang le tsona? Ke Eena oa pele ea ileng a fana! A re faneng le rōna. 'Me bophelong bohle ba rōna, lefung la rōna, le ka bosafeleng, re tla mo fumana a nts'a fana ho feta. "O tla fana ho ba fanang."

HLOHO EA BOBELI: KA BORAPELI BONA, RE ETSISA JESU KRISTE LE MOLIMO KA SEBELE: RE ITEKA KA BOIKOKOBETSO.

139* Lebaka la bobeli, le re bontšang hore ke tōka le poello e kholo ho meeaa ea rōna, hore re inehela ka tlalo ka bora-

peli bona ho Maria Movirigo. Ele hore re tle re be ba Jesu Kriste, ka mokhoa o phethehileng haholo.

Morena enoa ea molemo, ha a ka a tsoafa ho ikoalla popelong ea Maria Movirigo, joaloka motlamua le lekhoba la lerato! Le ho ba tlas'a Maria, le ho mo mamela ka lilemo tse mashome a mararo! Ke sa pheta, ke re: Ke hona mona, moo kelellonyana ea botho e lahlehang; ha e leka ho fatisia boitšoaro bona, ba Bohlale bo ikentseng mothol Eo, hoja a rata, a ka beng a inehile batho ka Boena; empa ele mona a entse joalo ka Maria, Movirigo ea Lehlohonolo haholo! O ratile ho tla lefatšeng lena, eseng joaloka monna ea tiileng, ea seng a fihlile bonneng, ea ipusang kahohle! Empa, ka ho ba leseanya na la batho le fumanehileng, ka tlhokomelo le thuso ea 'M'a Iona ea Lehlohonolo, Maria. Bohlale bona bo senang tekanyetso, Eena ea neng a e-na le lerato le senang moeli ho tlötlisa Molimo Ntat'ae, le ho pholosa batho bohle, ha a ka a fumana tsela e khaoletsang kapa e ntlehalo, hore a tle a phethise morero ona oa Hae; ho feta eona ea hore, a ipehe tlas'a Maria Movirigo linthong tsohle! Eseng feela ka nako ea lilemo tsa hae tsa pele; ha a le lilemo li robeli, leshome, kapa leshome le metso e mehlano, joaloka ba bang; empa ka nako ea lilemo tse mashome a mararo. O ile a neha Molimo Ntat'ae letlotlo le leholo haholo, nakong ea tsamaiso le ea mamelo ho Maria Movirigo. Le ka holimo ho feta, leo a neng a ka mo neha Iona, hoja a qeta mashome a mararo a lilemo a etsa mehlolo; a ruta lefatše lohle, a sokolla batho kaofela. Hoja ho n'o ka ba molemo ka mokhoa o mong, a ka b'a entse joalo. Ao! Ana ke tlötliso e kaakang, eo re e nehang Morena Molimo, ha re ipeha tlas'a tsamaiso ea Maria 'M'a rōna, ka ho etsisa Jesu!

Kamorao ho mohlala ona o tsejoang, o mahlong a rōna, na re hloka kelello joang! Ha re hopola hore re ka fumana tsela e 'ngoe, e ntla, e khutšoanyane ho feta! Ea ho neha Morena Molimo tlötlo, ka boipeho ba rōna tsamaisong ea Maria, ka ho etsisa Mora oa hae Jesu Kriste!

140* Ka bopaki ba boitšetleho boo re tšoanelang ho ba le bona, ho Mofumahali oa rōna ea Lehlohonolo; a re ke re ikhopotseng seo ke seng ke buile ka sona. Ha ke ne ke supa mehlala eo re e behetsoeng ke Molimo Ntate, Mora le Moea o Halalelang; malebana le tsamaiso ea rōna, ho Maria 'M'a Molimo. Molimo Ntate, o ne a fane ka Mora oa Hae; le joale o sa ntse a fana ka Eena ka Maria! O iketsetsa bana ba Hae ba mo ratang, ka Eena Maria feela! Ebile o fana ka ligrasia tsa Hae, ka eena Maria feela! Molimo Mora, ka botho ba hae, o ne a bopeloe lefatše lohle, ka eena Maria feela! Ka matsatsi 'ohle o ntse a bopjoa 'me a tsoaloa ka eena Maria feela, ka tlatsano ea Moea o halalelang. Hape ke ka eena Maria feela, a abang meputso le makhabane a Hae. Moea o Halalelang o bopile Jesu Kriste, ka eena Maria feela! O ntse o bopa litho tsa 'mele oa bohloko, le ho fana ka limpho le litšitso tsa Oona, ka eena Maria feela. Joale, haeba re sa foufala moeeng, ka morao ho mehlala e mengata 'me e matla, eo re e bontšoang ke Boraro bo Halalelang, re ka hla ra fosa joang ho se sebelise Maria! Ra se inehelo ho eena joang, le ho itšetleha ka eena ho ea ho Molimo, le ho iketsa sehlabelo ho Eena?

141* Litemana ke tsena, tse tsoang polelong tsa bo-Ntate ba Kereke, tseo ke li khethileng ho tiisa seo, ke qetang ho se bolela hona joale:

1. "Maria o na le bara ba babeli: E mong ke Motho-Molimo; ha e mong e le motho feela. Maria ke 'M'a e mong, ka tsoalo ea nama; le 'M'a e mong, ka tsoalo ea moea!" (Mohal. Bernard le Origen)

2. "Eena ke thato ea Molimo, ea batlang ho re fumana ka tlalo ka Maria. Ha ho le teng ho rōna tšepo kapa grasia kapa neho ea pholoho, re tsebeng hore mpho tsena, li tla ho rōna ka Maria." (Moh. Bernard)

3. "Lineho tsohle, makhabane le ligrasia tsa Moea o Halalelang ka sebele, li abuoia ka matsoho a Maria! Ho bao a

ba ratang, ka nako eo a e ratang, ka mokhoa oo a o ratang; le ka tekanyo eo a e ratang!" (Moh. Bernardine)

4. "Erekaha u n'u sa tšoaneloe ke ho fuoa letho, tsohle li ile tsa nehoa Maria! Ele hore ka eena, u tle u fumane tsohle tseo u li hlokang." (Moh. Bernard)

142* Bernard ea halalelang, o re bolella hore Morena Molimo, ka ho bona hore ha re tšoaneloe, ke ho amohela ligrasia tsa Hae matsohong a Hae, o li neha Maria! Ele hore re tle re fumane ka Maria; tsohle tseo Morena Molimo a ratang ho re fa tsona. Hape Morena Molimo, o fumana e le tlötliso ho Eena ha a amohela, ka matsoho a Maria; liteboho, hlompho le lerato, tseo re tšoanelang ho li hlahisa ho Eena, ka baka la limpho tsa Hae. Ha ho ka nqa e 'ngoe, ke tōka hore re etsise Morena. "Ele hore grasia e tle e boele ho mofani oa eona, ka tsela eo a tiileng ka eona." Ho rialo Bernard ea halalelang.

Sena ke seo re se etsang, ka borapeli bona. Re inehela tšebeletso ea Maria Movirigo ka borōna, le ka tsohle tseo re nang le tsona. Ele hore Morena oa rōna a tle a amohele tlötliso le teboho, tseo re tlamehang ho mo fa tsona, ka bobuelli ba Maria. Re hlile re iphumana re sa lokele leha ele ho tšoanela, hore re ka atamela Bohlomphehi bo se nang moeli ba Hae, ka bothoana ba rōna! Ka baka leo, re sebeliseng bobuelli ba Maria Movirigo 'M'a Molimo.

143* Hape-hape, borapeli bona ke ketso e tebileng ea boikokobetsol! Eleng bokhabane boo Morena Molimo, a bo ratang ho feta makhabane 'ohle a mang! Moea o iphamisang, o kokobetsoa ke Morena Molimo; athe moea o ikokobetsang o phahamisa Morena Molimo. "Molimo o nena baikhohomosi" (Jakobo 4.6). Haeba u ikokobetsa, u lumela hore ua tšoanela ho hla ka pele ho Eena, le ho mo atamela; Eena, oa theohal! O ikokobetsa ka ho tla ho uena, ho iketla ka moeeng oa hao! A ntse a u phahamisa, le hoja u iphumana u sa tšoanele! Empa, haeba u atamela Morena Molimo, u sa iphu-

manele 'muelli, Molimo o tla u balehela! 'Me u ke ke ua mo fumana. Oho, Morena Molimo o rata hakaakang boikokobetso ba pelo! Ke boikokobetsong bona ba mofuta oo, boo Borapeli bona, bo re lebisang boikokobetsong bona boo. Hobane bo re ruta ho se atamele Moren'a rōna, le kamohla ka borōna; le hoja a le bonolo, a le mohau hakaalo! Empa kamehla, ho sebelisa bobuelli ba Maria Movirigo ea halalelang haholo. Leha ekaba ho ea hlahka pele ho Eena, ho bua le Eena, ho mo atamela, ho mo fa letho le leng le itseng; kapa ho ikopanya le ho inehela tšebeletso ea Hae.

HLOHO EA BORARO: LITHOLOANA TSE TSOTEHANG, TSA BOINEHELO BO PHETHEHILENG HO MARIA MOVIRIGO.

1. *Maria o inehela Lekhoba la Hae ka Lerato.*

144* Lebaka la Boraro: Maria Movirigo, 'M'a Mosa le 'M'a Mohau, ha a rate ho haisoa ka lerato le ka ho fana. Ha a bona hore moea o inehile eena kahohle-hohle, ho mo hlompha le ho mo sebeletsa; o itlhobolisitse tsohle tsa oona tsa bohloko, hore o tle o mo khabise; joale le eena o ineha moea oo ka phetheho eohle, le ka mokhoa o kekeng oa hlalo-soal Maria o mo kenya har'a boliba ba ligrasia tsa hae; o mo khabisa ka meuno ea hae; o mo phahamisa ka matla a hae; o mo bonesetsa ka mahalima a hae; o mo hotetsa ka lerato la hae; o mo abela makhabane a mang a hae a moeal! O iketsa 'muelli, tšiea ea hae le tsohle tsa hae, ho Jesu Kriste. Ka bo-khutšoanyane re ka re: Erekaha ea inehetseng Maria, e se ele oa Maria kahohle-hohle; le eena Maria o joalo ho eena motho eo. Ha re bua ka mohlanka enoa oa 'nete le ngoana oa bohloko oa Maria, re ka bolela seo mohalaleli Joannese, Moevangelista, a neng a se bue ka mohlanka enoa oa 'nete le ngoana oa bohloko oa Maria. Re ka bolela seo Mohalaleli Joannese Moevangelista, a neng a se bue ka boeena, maleba-na le Maria. Ha a re: O ne a mo nka e le tsohle tsa hae!

145* Joale haeba a tsepahala, boinehelo bona bo hlahisa moeeng oa hae boinyeliso bo boholo; ho se itšepe ka letho, ho itlhoea ka tlalo, hammoho le tšepo e kholo le boitahlelo bo tletseng, ho Maria Movirigo, Mofumahali oa hae ea molemo. Ho tloha joale ha a sa tšepa *matla a hae, likhopolo tsa hae, meuno, makhabane le mesebetsi ea hae e metle!* Hoba erekaha a se a li entse sehlabelo sa secheso ho Jesu, ka 'Mè enoa ea mosa, o se a e-na le ntlo e le 'ngoe feela ea pokellelo, moo ho bokelletsoeng matlötlo 'ohle a hae. Ha a sa le ka ho eena; hobane ntlo eo maruo a hae a bokelletsoeng ho eona, ke Maria Movirigo.

Ka baka leo, o atamela Moren'a rōna, a se na tšabo ea makhaba kapa ea bo-ramatsoalo! Empa o mo rapela ka lerato le ka tšepo e kholo. Ebile o na le maikutlo a tšoanang le a mo-cheseli le mohialefi Moitlami Rupert. Eo, ha a hopola katleho ea Jakobo holim'a lengeloi, leo a neng a betana le Iona, a neng a bue mantsoe ana a monate ho Maria Movirigo. A re: "Oho Maria, Khosatsana ea Ntate, uena 'Mè ea se nang sekoli, oa Molimo ea ikentseng Motho, Jesu Kristel Ke rata ho betana le motho enoa, Lentsoe la Molimo! Eseng ka lihlomo tsa meuno ea ka; empa ea hao, oho 'Mè ea ratehang!"

Oho batho, ruri re matla, re linatla pel'a Moren'a rōna Jesu Kristel! Ha re hlometse ka meuno le ka bobuelli ba 'M'a Morena Molimo; ea hlotseg Ea holimo-limo, ka lerato la hae! Kamoo Augustinus ea halalelang, a bolelang kateng.

2. *Maria o hloekisa Mesebetsi e metle ea rōna, oa e khabisa le ho e etsa hore e amohelehe ho Mor'a hae.*

146* Erekaha, ka borapeli bona, re fana ka liketso tsohle tsa rōna tse ntlo, ho Moren'a rōna, ka 'ona matsoho a 'M'a Hae ea halalelang; Mofumahali enoa ea tletseng lerato, oa e

hloekisa, a e ntlaufatse; 'me a e etse hore, e amohelehe ho Mora oa hae, Jesu Kriste!

1. O e hlakola sekoli sohle sa boithati ba rōna, le khomarelō e sa hlokomeleheng ea rōna ho libōpuoa; e kenang esitana le kahare ho mesebetsi e metle ea rōna, re sa elelloel e ho elelloal Hang-hang, hoba li fihle matsohong a hae a bohloeki bo khaphatsehang, a bileng a tletse mahlohonolo! 'Ona matsoho ana ao le ka mohla, a sakang a tšoara letho le lebe, leha ele ho lula ka botsoal! 'Ona matsoho ana a hloekisang tsohle, tseo a li amang! Hang-hang feela a tlosa limpho tseo a li filoeng, tsohle tse maphemphē, tse senang botle bo phethetileng.

147* 2. O li ntlaufatsa ka ho li khabisa ka meuno, le makhabane a hae: Molemi oa mofutsana, ha a rata ho etsa setsoalle le morena, le ho fumana molemo ho eena, o ea ho mofumahali ho mo neha apole – Eo eleng maruo 'ohle a hae; – ele hore a tle a e nehe Morena. Mofumahali, hoba a amohele mphonyana ena e sa tsebisahaleng, matsohong a mofutsana eo oa batho, ke moo a behang apole ena, sekotlolong se setle se seholo sa gauda! 'Me ebe joale o e hlahisa ka mokhoa ona, ka pele ho morena. Ke re joale, le hoja apole eona ka boeona, e ne ele ntho e sa tšoanelang ho fuoa morenal Empa ka baka la sekotlolo seo sa gauda seo e behiloeng ho sona; le ka baka la motho ea e hlahisang, e tlabā mpho e tšoanelang Borena bo Boholo.

148* 3. Maria Movirigo o neha Jesu Kriste mesebetsi ea rōna e metle, hobane ha a ipolokele letho la seo a se nehoang; kaha ese eena qetello ea rōna. Ka botšepehi bo sa foseng, o fetisetsa tsohle ho Jesu. Haeba re mo fa letho, ho hang re se re file Jesu! Ha re mo rorisa re mo neha tlötliso, kapele-pele eena o rorisa Jesu le ho mo neha tlötliso. Joaloka mohla monene, ha a ne a rorisoa ke Elizabetha ea halalelang, le kajeno ho ntse ho le joalo! Ha re mo rorisa, re mo lebohela, eena o bina sefela sa hae: "Moea oa ka o tlötlisa Morena".

149* 4. Leha mpho ea mesebetsi ea rōna e metle, e ka fumaneha, le ho qaqafala joang kapa joang ka pele ho Mohalaleli oa bahalaleli, Morena oa marena! Maria Movirigo o etsa hore e amohelehe, ho Jesu Kriste! Ha rōna ka borōna, ka ho itšetleha ka meuno le melemo ea rōna, re hlahisa mpho ho Jesu, o ee a e talimisise! 'Me hangata o ee a e hane, ka baka la sekoli sa boithati ba rōna! Joalokaha a ne a hane mahlabelo ale a Bajodi; a neng a tletse boithatelo ba bona. Empa ha re mo neha hohong ka matsoho a hloekileng, a se nang koli a moratuoia le 'M'a hae Maria, re mo hlahi ka mokhoa oo a sitoang ho hana ka oona. Ha a sa sheba mpho hakaakang o mpa a sheba 'M'a Hae ea mosa, ea e hlahisang! Ha a sa ikhathatsa ho e qamakisisa moo e tsoang teng, empa hore na ke mang ea e tlisang! Maria ha a khesoe, le kamohla o le mong, empa kamehla o amohela hamonate ke Mora oa hae! Ka baka leo, Mora o amohela ka thabo eng le eng, eo eena 'M'ae a e hlahisang, leha ekaba kholo kapa ea e-ba nyenyane! Ho lekane hore Maria a hlahise letho 'me Jesu o se a e nkile, a e amohetse. Ena ke keletso e utloahalang, eo Bernard ea halalelang, a e nehileng bao a neng a ba rupela tseleng ea phetheteho: "Haeba u rata ho neha Morena Molimo letho le leng, hlokombela hore u nehelane ka lona, ka matsoho a thabisang haholo 'me a tšoanelhang a Maria, ntle le haeba u rata hore e hanoel!"

150* Joalokaha re se re bone, na hase mokhoa oo ba banyenyane ba lefatše lee, ba tsamaisang litaba malebana le ba baholo ba lōna? Joale grasia eona ha e tl'o re ruta, ho etsa ntho e tšoanang malebana le Morena Molimo! Eena ea re phahametseng ka mokhoa o kekeng oa lekanyetsoa, eo mahlong a Hae re leng ka tlase-tlase ho kokoanyana! Haholo ha re hopola hore re na le 'muelli ea matla hakana, hoo le ka mohla a sa furalloeng! Ea mafolo-folo hoo, a bileng a tsebang makunutu 'ohle, a ho hlola pelo ea Morena Molimo! Ea mosa 'me ea lerato hakana, hoo a sa tsebeng ho nena mang kapa mang! A ka ba monyenyane kapa a ba khopo joang kapa joang!

Kamorao ho mona, ke hona ke sa tla bua ka papiso ea 'neta ea linnete tsena, tabeng ea bophelo ba Jakobo le Rebeka.

HLOHO EA BONE: BORAPELI BONA KE TSELA E NTLEHALI, EA HO NEHA MOLIMO TLÖTLISO E KHOLO HAHOLO

151* Lebaka la bone: Borapeli bona, ha bo sebelisoa ka botsepeli bohole, ke tsela e ntle ea hore matla a mesebetsi eohle ea rōna e metle, a tle a sebelisoe bakeng la ho neha Morena Molimo letlotlo le leholo. Ea sebeletsang sepheo sena se phahameng, o fumanoa seoelo (le hoja bohole re tlamehile ho etsa joalo). Lebaka ke hobane re sa tsebe mosebetsi oo ka oona, re ka nehang Morena Molimo tlōtlo e kholo; kapa ke hobane re se na takatso ea ho etsa joalo. Empa, erekaha Maria Movirigo, eo re mo nehang tlōtlo le mopuso oa liketso tsohle tsa rōna, a tseba ka tlalo, moo Morena Molimo a ka nehoang tlōtlo e kholo, 'me eena a bile a sebeletsa sepheo sena kamehla! Mohlanka oa 'neta oa Mofumahali enoa ea molemo, ea inehetseng tšebeletso ea hae ka ho tlala joalokaha re boletse! A ka tiisa ka sebete, a re, mehopolo le mantsoe, le tlōtlo ea liketso tsohle tsa hae, e sebelisoa ho neha Morena Molimo tlōtlo e kholo hali! Ntle lehaeba a fetotse boinehelo ba hae. Na ho ka ba le ntho e 'ngoe e tšelisang ho feta eona ee, ho eena ea ratang Morena Molimo feela, ho se seo a se shebileng? Ea behileng letlotlo la Morena Molimo le litakatso tsa Hae, ka pele ho tsa hae?

HLOHO EA BOHLANO: BORAPELI BONA BO HULELA MOTHOKOPANONG EA HAE, LE MORENA OA RONA JESU KRISTE.

152* Lebaka la bohlano: Borapeli bona ke tsela e bonolo, e khutšoanyane, e phethehileng, e otlolohileng; ea ho fihlela kopano ea moea le Morena oa rōna Jesu, ele phetheho ea Bakriste.

1. Borapeli bona ke tsela e Bonolo.

Ke tsela e bonolo: Ke tsela eo Jesu Kriste a neng a e bule ho tla ho rōna! 'Me eo ho eona, ho seng tšetiso ea letho ho fihla ho Eena! Ke 'neta hore re ka 'na ra fihlela kopano ea moea oa rōna le Molimo, ka tsela tse ling. Empa etlaba ka lifapano tse ngata ho feta, le ka mafu a sa tsejoeng; ka mathata a mangata a mang, ao re ke keng ra a hlola habonolo. Re tla tšoanelo ho feta har'a mafifi a bosiu bo botšo! Har'a ntoa tse tšabehang le mefeelo ea lefu! Holim'a makoliopo a lithaba, har'a meutloa e tsunyang! Le ho pomahanya mahoata a nyarosang! Empa tseleng ea rōna ea Maria, re itsamaela hantle ka khotso le ka bonolo.

Ke 'neta hona mona, re na le lintoa tse boima, tseo re tšoanetseng ho li loana; le mathata a maholo ao re tšoanetseng ho a hlola. Empa, 'Mè le Mofumahali enoa ea tletseng lerato, o etsa hore a be haufi-ufi, pel'a bahlanka ba hae ba tšepahalang! Ho ba bonesetsa har'a lefifi la bona, ho ba etlola lipelaelong tsa bona! Ho ba matlafatsa har'a matsoalo a bona! Ho ba tšehetra ntoeng le mathateng. Ha e bapisoa le litsela tse ling, ho batla Jesu Kriste; tsela ena ea Maria ea senang sekoli, ke tsela ea lirosa le ea linotši! Ho na le bahalaleli ba bang, bao lehoja ba le sehlotšoana feela; joaloka Ephrem ea halalelang, Joannes Damascene, Bernard, Bernardine, Bonaventura, Francis oa Sales, ba halalelang le ba bang, ba neng ba nke tsela ena e monate ho ea ho Jesu Kriste. Hobane Moea o Halalelang, Monyali ea tšepahalang oa Maria, o ne o ba bontše eona ka tšitso e itseng ea grasia, ea Oona. Empa bahalaleli ba bang, ba etsang palo e kholo ho feta, le hoja ba ne ba e-na le borapeli ho Maria Movirigo, ha ba ka ba kena, kapa ebile hanyenyane feela, ka tsela ena. Ke ka hona ba ileng ba tlameha ho feta har'a mathata a boima 'me a kotsi ho feta.



153* Mohlomong mohlanka oa Maria, o tla mpotsa a re:
“Ke ka baka la’ng ha bahlanka ba tsepahalang, ba ‘Mè enoa ea molemo, ba hlile ba utloa bohloko? Nka re kannete, ho feta ba mo cheshellang hanyenyane feela na? Baa nyatsuo, baa hlorisoa, baa etseletsoa, batho ba sitoa ho iphapanyetsa bona! Kapa hoseng joalo, ba phela lefifing le kahare, le mahoatateng a kahare a moea! Moo ho senang le lerotholinyana feela la phoka ea leholimol Haeba Borapeli bona ho Maria Movirigo, bo etsa hore tsela e isang ho Jesu Kriste, e be bonolo haholo; ke’ng haele moo ba hlorisoa ho feta bohole?”

154* Ke arabela ka hore: Ho joalo ke ’nete, hore bahlanka ba tsepahalang haholo ba Maria Movirigo, erekaha ele baratuo ba hae ba baholohali; ba fumana ho eena ligrasia tse kholo; le litšitso tse tsoang leholimong, eleng lifapano. Empa le teng ke tiisa hore, ebile ke bona bahlanka bana ba Maria, ba jarang lifapano tsena ka bobebé bo fetang! Ka moputso o moholo ho feta, le ka letlötłö le leholo ho feta! Ntho e ka thibelang tsoele-pele ea motho e mong hangata, kapa esita le ho mo lihela tsietsing, hohang, e keke ea ba sitisa; empa e tla thusa hore ba hatele pele! ‘Mè enoa ea molemo, ea tletseng grasia le noesetso ea Moea o Halalelang, hoba a ba batlele tsona lifapano tsena; o li ina ka tsoekereng ea letsoele la hael! Le ka nonetsong ea lerato la hae le hloekileng! Bahlanka ba hae ba li metsa hamonate, joaloka litholoana tse hlabosehang; lehoja ka botsona li ne li hlile li baba hampel! Ebile ke khopolo ea ka hore mang kapa mang, ea ratang ho phela ka chesho le ka borapeli ho Jesu Kriste; ho mamella lihloriso, le ho jara lifapano tse boima, kapa a li jara ka lerato le ka phehelo; a keke a etsa joalo ha a se na borapeli, bo tletseng lerato ho Maria Movirigo; eo eleng bomonate ba lifapano. Joalokaha motho a keke a ja litholoana tse tala, tse sa thapisoang ka tsoekere; haese ha a iqobella ka tiisetso, e kekeng ea qeta nako e telele.

2. Borapeli bona ke tsela e khutšoanyane.

155* Borapeli bona, ho Maria Movirigo ea Lehlohonolo, ke tsela e khutšoanyane ho fumana Jesu Kriste! Ke hobane e sa re khelose lekote kapa ke hobane, joalokaha ke sa tsoa bolela, re tsamaea ho eona ka thabo e kholo le ka bonolo; le ka sehlahlo se seholo haholo! Re hatela pele haholohali ka nako e khutšoanyane, ka ho mamela le ho itšetleha ka Maria; ho feta nako ea bophelo bohle ba rōna, ka ho itšetleha ka lerato la boithati le ka boitšepo ba rōna. Hoba motho oa mamelo, ea ipehileng tsamaisong ea Maria Movirigo. ‘M’ a Molimo, o tla tsanyaola litlholo tsa hae tse kholo holim’ a lira tsa hae. Ke ’nete hore lira tsa hae, li tla leka ho mo khina mehatong ea hae; ho mo sutumeletsa morao kapa ho mo lihela selomong! Empa ka thuso, tlatsetso le tsamaiso ea Maria, a keke a oa leha ele ho chechela morao, kapa ho lieha. O tla hatela pele ka mehato ea seqhobane ho ea ho Jesu Kriste; ka eona tsela ela eo – joaloka ha re se re boletse, – Jesu a neng a tle ho rōna ka eona. Ka ho habeletsa ha seqhobane, le hona ka nako e khutšoanyane.

156* Ak’u ntjoetse, ke ka baka la’ng ha Jesu Kriste, a ile a phela lilemo tse khutšoanyane hakaale, lefatšeng? Empa le teng e batlile e e-ba kaofela ha tsona, a li phetseng ka ho tsamaisoa ke ‘M’ a Hae le ho mo mamela? Lebaka ke lena: Jesu, ka ho phetheha ka nako e khutšoanyane, o ile a phetha nako e telele! E telele ho feta ea Adama, eo a neng a tlile ho lefela melato ea hae; lehoja Adama a phetse lilemo tse makholo a robong! Jesu Kriste o phetse nako e telele, hobane ka ho mamela Molimo, – Ntat’ae, o phetse a tsamaisoa ke ‘M’ a Hae ‘me a kopanya moea oa hae le eena. Lebaka le boleloa ke Moea o Halalelang ha o re:

1. Eo ea hlomphang ‘M’ aæ, o joaloka ea ipokellelang tlötlö e kholo; ke ho re ea hlonephang Maria, ‘M’ a Hae! Esita le ka ho ipeha tsamaisong ea hae le ho mo mamela linthong

tsohle, o sa tla èna ka ho fetisal Hobane ka tsatsi le leng le le leng o nts'a bokella Letlötłö. Ka ho ea ka lentsoe lena la mohlalefi oa khale, ha a re: "Ea hlomphang 'm'ae, o tšoana le ea ipokellelang letlötłö!"

2. Ka tlhaloso ea mantsoe ana a Moea o Halalelang: "Boqheku ba ka bo ka mohaung oa popelo." (Pesalema 91, 11). Ke ka popelong ea Maria, e kileng ea kopela hare, ea ba ea beleha motho ea phethehileng (Jeremia 31, 22). 'Me e bileng le hona ho jara Eo maholimo le lefatše, li sitoang ho mo fupara leha ele ho mo kopa! Ke bua ke re: Ke ka popelong ea Maria, moo ba banyenyane ba fethang banna le basali ka leseli, ka khalalelo, ka maele le ka bohlale! Le hore teng re fihlela tlalo ea lilemo tsa Jesu Kriste, ka nako e khutšoanyane!

3. Borapeli bona ke tsela e Phethehileng.

157* Borapeli bona, ho Mofumahali oa rōna ea Lehloholo, ke tsela e phethehileng ho ea ho Jesu Kriste, le ho ikopanya le Eena. Hobane Maria Movirigo 'M'a Molimo ke eena ea phethehileng har'a libōpuoa tsohle, 'me ke eena ea halalelang ka ho fetisal! Hape Jesu Kriste, ea tlileng ho rōna ka mokhoa o tletseng, ha a ka a khetha tsela e 'ngoe ea leeto le leholo, le bileng le hlollang la Hae! Ea holimo-limo, Mositakutloisiso ea motho, Mophahamela-tsohle, Ea-teng kamehla; o ikhethetse ho tla ho rōna, libokoana tsa lefatše, mafeela-feelane, ka mokhoa ofe?

Ea-holimo-limo o theohetse ho rōna ka Moikokobetsi, Maria; ka Bomolimo, ka phetheho eohle! A sa senyeheloe ke letho la Bomolimo le Bohalaleli ba Hae! Le rōna mafeela-feelane a batho, re tšoanelia ho hloella ho Ea-holimo-limo ka phetheho ea Bomolimo; re sa tšabe letho, ka Eena Maria. Mosita-kutloisiso ea motho, Ea-sa-kopjoeng, o itumelletse hore a kopjoe! 'Me a sikoe ka tlalo eohle ke Maria, ea ikentseng

e monyenyan 'me ea ikokobelitseng! A sa senyeheloe ke letho la boholo ba hae, bo kekeng ba kopjoal Kahoo, re tšoanelia ho itumella hore re pepjoe, re be re tsamaisoe kahohle le ka tsohle; ho se khanano ea letho, ke Moikokobetsi, Maria.

Mophahameli oa tsohle o re atametse, a ikopanya ka tlalo le rōna, a sa lahleheloe ke letho la Bohlomphehi ba Hae! A ikopanya ka mokhoa o tletseng le botho ba rōna, ka eena Maria! Kahoo, re tšoanelia ho atamela Molimo, le ho ikopanya ka tlalo le ka khomarello, le Bohlomphehi ba Hae ka Maria, re sa tšabe ho raheloa thoko le Eena.

Khabareng, Eena eo eleng Ea-teng, o ikhohotse ho tla ho se leng sieo! Le ho etsa hore se-sieo ebe Molimo! Hoba ke Eo-e-leng-Ea-teng. 'Me o phethile sena ka katleho, ka ho ineha Letlōbo le hloekileng Marial Le ka ho mo mamela ka mekhoa eohle! A sa senyeheloe nakong ea tsoalo ea Hae, ka ho sala e ntse ele Eena-Ea-teng; haesale ka bosafeleng! Ka mokhoa o tšoanang, le rōna mafeela-feelane, ka Maria, re ka ba joaloka Molimo ka grasia le ka letlötłö! Ka hore re ineha eena 'M'a rōna ka tlalo le ka phetheho eohle! Hoo re seng letho ka borōna empa re leng tsohle-tsohle ho eenal! Re sa tšabe hore re ka tšoha re ithetsa.

150* Haeba ke ne nka betleloa tsela e 'ngoe e ncha, ho ea ho Jesu Kriste, tsela e batalalitsoeng ka meuno eohle ea bahalaleli! Ea khabisoa ka makhabane 'ohle a boshoelatumelo ba bonal! Hape ea ba ea bonesetsoa le ho ntlafatsoa ka khanya le botle ba mangeloi! Ke re: Leha mangeloi 'ohle le bahalaleli kaofela, ba ne ba ka behoa tseleng eo, ho tataisa, ho sireletsia le ho matlafatsa bao ba ratang ho tsamaea ka eona; kannete-nete, ke tiea ke hlapanya! Ke bua 'nete feela, ke re: Ho e-na le eona tsela eo e ntlehali, ke ne ke tla inkela tsela e senang sekoli ea Maria! Tsela e senang sekoli kapa lethejana! E senang sebe se etsoang ke motho kapa ke tlaho! E senang moriti leha ele lefifi! 'Me haeba – joalokaha e le 'nete – Jesu monthati oa me, a e-tla ka letlötłö khetlo la bobeli lefatšeng, ho

tla busa, hotleng ha Hae; h'at'l'o khetha tsela e 'ngoe esele, ho eona ena ea Maria 'M'a Molimo! Eo ka eena khetlo la pele, a neng a tle ka katileho le ka phethetho eohle. Phapano mahareng a ho tla ha hae la pele le la qetello, ke hore lekhetlo la pele le ne le patehile, athe la bobeli le tla ba le letlōtlō le khanya! Empa bobeli a phethethile; hobane bobeli etlaba ka Maria. Ao, ke re batho! Mona ke misteri, Tšita-kelello e sa utloisisoeng! "Mona maleme 'ohle a ke a khutse!"

4. Borapeli bona ke tsela ea 'nete.

159* Borapeli bona ho Mofumahali oa rōna, ke tsela e ntle e senang kotsi ho ea ho Jesu Kriste; le ho fumana phe-
theho ka ho ikopanya le Eena:

1. Ke tsela ea 'nete, hobane borapeli bona boo ke bo rutang; hase ntho e ncha. Ke ba mehleng ea boholo-holo. Moprista Boudon (Mohlalefihali ea shoeleng ka bohalaleli, le Mongoli oa libuka tse ntle tse ngata); bukeng ea hae holim'a borapeli bona, e bitsoang: "Bokhoba bo Halalelang ho 'M'a Molimo ea Babatsehang", o re nako ea qaleho ea bona, hase ntho e ka nehoang ka bottalo. Leha ho le joalo lekhlong la bosupa, refumana hore bo ne bo le teng Kerekeng ea Molimo. (Morena ea borapeli Dagobert le Mopapa Joannes VII, (701-707); ba ne ba iketse makhoba, ka boinehelo ba Borapeli bona).

Mohalaleli Odilon, Mookameli oa baitlami mane Cluny, ea phetseng lilemong tsa bo-1040, ke e mong oa pele naheng ea France, ea neng a inonya pepeneneng ka bona borapeli bona; kamoo re balang kateng bophelong ba hae.

Mokardinal le Mohlalefihali Petrose Damiane, o bolela hore ngoan'abo ea lehlohonolo, Marino, ka selemo sa 1060, o ne a iketse lekhoba la Maria Movirigo, ka pele ho motsamaisi oa moea oa hae; ka mekhoa e hapang ruri. Hobane o n'a roala ropo molaleng oa hae! A bile a ichapa, a ba a fana ka cheletana!

A e siea holim'a aletare, ele pontšo ea borapeli le boinehelo ba hae, ho Mofumahali oa rōna. Ka nako eohle ea bophelo ba hae, a tsoela pele ho tsepahala borapeling ba hae. Hoo nakong ea lefu la hae, a neng a fumana lehlohonolo la ho eteloa le ho tselisoa ke Mofumahali enoa ea lerato! Le ho amohela molomong oa hae, tsepiso ea paradisi! Ele moputso oa bohlanka ba hae.

Cesarius Bolandus, le eena o bolela lessole le neng le tumile le bitsoang Vautiere de Birbaka, oa habo Khosana ea Louvain. Leo le Iona, ka selemo sa 1300, le neng le etse boinehelo ba Iona ho Maria Movirigo.

Borapeli bona, bo ne bo lateloa ke ba bang ba bangata, ka lekunutu. Ho fihlela lekhlong la leshome le metso e supileng, ha bo qala ho etsoa pepeneneng ea bohle.

160* Ntate Simon de Rojas, oa kopano ea Boraro bo Halalelang, bakeng la pholoso ea Batlamuo; mokhothatsi oa borena oa Filippi oa Boraro, ke eena ea neng a bo phatlalatse hohle Spaine le Germane. 'Me ka thuso ea Filippi oa Boraro, a bo fumanela liteselo-tefelo tse kholo ho Mopapa Gregory XV; bakeng la bao ba bo latelang. (Khos, Ferdinand II, a na a bo etsa ka pele ho Lekhotla la hae, ka selemo sa 1640).

Ntate De los Rios, oa kopano ea Augustinus ea Halalelang, ka tlatsano le motsoalle e moholo oa hae de Rojas, o ile a inehela ho bo anetsa ka polelo ea molomo le ka libuka, hohle Spaine le Germane. O ngotse buka e kholo e bitsoang: "Hierarchia Mariana." Eo ho eona, ka bohalaleli le ka bohlalefi, a hlilosang tsa boholo-holo, bokhabane le ho tiea ha borapeli bona (Ba lumelloa ke Babishopo ba Malines, Canbrai le Ghent).

Bo-Ntate ba Ma-Theatine, lekhlong la leshome le metso e supileng, ba ile ba bo hloma Italy, Sicili le Savoy.

161* Ntate Stanislaus Phalacius oa Kopano ea Jesu, a na a bo hloma ka katileho e kholo mane naheng ea Mapole. (Morena Vladisla oa Poland, a na a bo nka ha a le mane Louvain. A ba a kopa bo-Ntate ba Jesu, ho bo ruta naheng ea hae.)

Ntate de Los Rios, bukeng ea hae eo re tsoa bua ka eona, o hlahisa mahosana a marena, likhosatsana le mafumahali, marenana le Bakardinale ba mebuso e mengata, ba neng ba bo nkile.

Cornelius a Lapide, ea tsejoang haholo ka borapeli le ka bohlalefi ba hae bo tebileng, o ne a nehoe mosebetsi oa ho hlahloba borapeli bona, ke Babishopo le bahlalefi ba bangata, litabang tsa Molimo. 'Me kamorao ho tlhahlobo ea hae e butsotitseng, a bo roris ka thoholets e tšoanelang borapeli ba hae. 'Me ba bang ba bangata har'a bo-tumahole, le bona ba mo sala morao.

Bo-Ntate ba Kopano ea Jesu, baitlami ba chesehellang tšebeletso ea Maria Mofumahali oa rôna ea Lehlohonolo kamehla, lebitsong la mabotho a Cologne, ba kile ba hlahisa bukana holim'a borapeli bona: ("Bokhoba ho Movirigo, Cologne 1634); ka pele ho Morena Ferdinand oa Bavaria, eo e neng ele eena Moarkabishopo oa Cologne ka nako eo. Eena a a e ananelia, a bile a lumella hore e hatisoe. A ba a etsa ka matla ho khothaletsa baprista bohle le baitlami ba sebaka sa hae, ho etsa ka matla 'ohle a bona, hore ba bone hore borapeli bona bo tiileng; bo tsejoa kahohle naheng ea hae.

162* Mokardinale de Berulle, eo lebitso ia hae le hopoloang ka hlompho e kholo Fora; o n'a sa tsotelle liketselletso le litlhoriso tse hlabisang lihlong, tseo bahanyetsi le batho ba inehetseng tsona, ba neng ba mo tuba ka tsona. Ba ne ba mo qosa ka ho re ke morata-tse-ncha le motho ea tletseng tumelamasaoana. Ba ngola taba ka morero oa ho mo senya lebitso! Ba ba ba e hlahisa lipampiring ka ho mo etselletsal! Hape ba ba ba inehela, kapa nka hla ka re, satane a ba sebelisa ele mahla-

hana a hae; ho leka ka mamene-mene a likete, ho thibela kanafalo ea borapeli bona naheng ea Fora. Empa monna enoa ea phahameng, ea halalelang, a b'a arabela liketselletso tseo tsa bona *ka boiphapanyo*. *Haele litlhahiso tse neng li hlahile* pampiring ea ketselletso, tsona a li arabela ka ho ngola bukana; eo ka eona a ileng a ba tsietsa hampe a ba phetholal Ka ho ba bontša hore borapeli bona, bo itšetlehile holim'a mohlala oa Jesu Kriste; holim'a litšoanelo tsa rôna malebana le Eena, le holim'a lipallo tseo re li entseng Hlatsuong e Halalelang! Haholo-holo o ne a ba koale molomo, ka ho hlahisa lebaka lena la qetello. Le bontšang hore boinehelo bona ho Maria Movirigo, eo ka eena re inehang Jesu Kriste, hohang ha bo fapane ka letho le nchafatso ea lipallo tsa Hlatsuuo. O nehane ka litlhaloso tse ntle haholo holim'a borapeli bona, tse ka fumanoang hona bukeng eo ea hae.

163* Bukeng ea Ntate Boudon, re bala bongata ba Bapapa ba ileng ba bo ananelia; bahlalefi litabeng tsa Molimo, ba ileng ba bo hlahloba, litlhoriso tseo borapeli bona bo ileng ba feta tlas'a tsona 'me ba li hlola! Bongata ba batho ba ileng ba bo nka, ho se Mopapa leha a le mong ea bo hanelang! Kannete, ha ho kamoo bo neng bo ka nyatsua kateng, ho sa qhaqholloe metheo ea Bokriste.

Joale rea bona kamoo thuto ena, e seng ntho ea boiqapelo feela kateng. 'Me haeba ke mona e sa qaphaka, lebaka ke hobane ke ntho ea bohloko, bo kekeng ba utloisoa le ho sebelisoa ke mang le mang.

164* 2. Borapeli bona ke tsela e otlolohileng, ho ea ho Jesu Kriste. Hobane ke sebopaho sa Mofumahali oa rôna ea Lehlohonolo, ho re tobisa ho Jesu. Joalokaha ele sebopaho sa Jesu Kriste, ho re otollela ho Molimo-Ntat'ae, ea se nang qalo le qetello. Ho se be motho ea phelelang moea, eo ka phoso a ka hopolang hore Maria ke tshitiso ho eena, ho fumana kopano e halalelang ea moea oa mokriste le Molimo oa hael! Ho ka etsahala joang, hore Maria ea fumanetseng

batho bohle, hammoho le motho ka mong, grasia ho Morena Molimo, ebe a ka sitisa moea ho fumana grasia e kholo, ea boikopanyo ba moea le Molimo oa oona? Ho ka hla ha etsahala joang, hore Maria ea khaphatsehang ke ligrasia, eena ea ikopantseng 'me ea fetohileng ntho e le 'ngoe le Molimo, hoo Molimo a bileng a tlameha ho inkela botho ho eena, ebe joale ekaba tshitiso ho moea, ho ikopanya ka phetheho le Molimo oa oona?

Ke 'nete hore tlamahano le libopua tse ling, lehoja li ka halalela kamohlomong, li ka 'na tsa liehisa kopano ena e halalelang le Molimo. Empa ha ho joalo ho Maria Movirigo! Eseng joalo, ke sa rialo joalokaha ke se ke 'nile ka bolela, 'me nke ke ka ba ka khathala ho bolela. Lebaka le leng le etsang hore ke ba seng bakaenyana feela, ba fihlelang phetheho ea lilemo tsa Jesu Kriste lefatšeng, ke hobane Maria eo e ntseng e le 'M'a Molimo le monyaluoa oa Moea o Halalelang, haa boptjoa ka tšoanelo ka pelong tsa bona. Mang kapa mang ea ratang ho fumana perekisi e butsoitseng 'me e bopehileng hantle haholo, pele o tšoanelo ho ba le sefate sa eona. Mang kapa mang ea batlang ho ba le tholoana ea bophelo, eleng Jesu Kriste, o tlameha ho ba le sefate sa bophelo eleng Maria. Mang kapa mang ea batlang ho bona Moea o halalelang o sebetsa ka ho eena, o tšoanelo ho ba le Monyaluoa oa Oona pele. Eena ea tšepahalang 'me ea kekeng a arohana le oona lekhale, Maria Movirigo 'M'a Molimo! Eo ka eena Moea oa Molimo o bopang o bileng o behang litholoana, joaloka ha ke se ke boletse.

165* Ikholise he ke hona hore Jesu Kriste, ea sa arohaneng le Maria, u tla mo fumana ka phetheho e fetang, ka boholo ba Hae, ka matla a Hae, ka mesebetsi ea Hae le ka Bomolimo ba Hae; ho feta leholimong le ho libopua tsohle tse teng lefatšeng. Jesu u tla mo fumana joalo, ho ea kamoo u tla sheba Maria lithapelong tsa hao, boikeellong ba hao, like-tsong tsa hao le mahlokong a hao. Bonyane lehaeba ese ka ponon ea tjamelano, e mpe e be ea leihlo la moleka, ea tsebo ea

hore o teng. Maria Movirigo 'M'a Molimo ea ikepetseng ho Morena Molimo, a keke a khina kopano e halalelang ea moea le Molimo. Ebile ha ho e-s'o be le sebopua ho fihlela joale, ebile ha se sa tla ba teng, se tla re thusa ka katleho e kholo ho feta Maria Movirigo, mosebetsing ona o moholo oa rōna. Ka baka la ligrasia tseo a tla re fa tsona ho re atlehisa – joalokaha mohalaleli a boletse: Ha ho ea ka tlaloang ke khopolo ea Morena Molimo haese ka Maria. (Mohalaleli Germanus oa Conantipole). Kapa le ka baka la ho sireletsoa ke Eena, ho lithetso le lifi tsa E-mobe."

166* Moo Maria a leng teng, satane ha a eo! E 'ngoe ea pontšo tse senang ho lahla motho le kamohla, ho tseba hore re tsamaisoa ke Moea oa Molimo, ke ho ba le chesheloa 'nete ho Maria. Ka ho mo hopola hangata le ho bua ka eena. Mohalaleli Germanus o re: "joalokaha pefumoloho ele bopaki bo tletseng, ba hore 'mele ha oa shoa, ho hopola Maria khafetsa le ho mo rapela hangatanyana, ke bopaki bo tletseng ba hore moea oa rōna, ha o na sebe se bolaeang."

167* Maria a inotši o thuhakantse bokhelohi bohle! Kamoo re bolelloang kateng ke Kereke, ka tsamaiso ea Moea o Halalelang: Lehoja bahanyetsi ba ka hanyetsa, mohlanka le mochesheli ea tšepahalang oa Maria, le kamohla a keke a oela, leha ekaba bokhelohing kapa thetsong! Nka re, bonyane, bokhelohing ba 'nete! E, a ka 'na a oela phosong ea ho se tsebe; a hopola hore lengeloi le lebe, ke lona le tsoang ho Molimo – Lehoja le teng e ntse ele ka thata ho feta ba bang – Empa kapele haholo, o tla elella taba ena! 'Me a keke a itšatalatsa ka ho kholoa le ho tiisa, hore seo a se lumetseng ke 'nete.



168* Ka hona ke re mang kapa mang, ea batlang ho tsoela pele tseleng ea phetheho, le ho fumana Jesu Kriste ruri, kannete le ka tlalo a sa tšabe boithetso; eleng se hlahelang hangata batho ba inehetseng thapelo: "Ka pelo ea hae eohle, le ka moea o mafolo-folo!" A hle a inkele borapeli bona ho Maria Movirigo. Boo mohlomong ho fihlela joale, a neng a e-s'o bo tsebe. A ikenele tseleng ena ea borena, eo ho fihlela joale a neng a sa e tsebe; empa eo joale ke 'montšang eona: "Ke le bontša tsela ea se-hata-khosil!" Ke tsela e butsoeng ke Jesu Kriste, Bohlale bo ikentseng motho, Eena Hloho ea rōna a inotši! Litho tsa Hae li ke ke tsa kheloha, ka ho e sebelisa.

Ke tsela e bonolo ka baka la nala ea ligrasia, le noonetso ea Moea o Halalelang, tse e tletseng! Ka ho e tsamaea ha re khathale, kapa ho boela morao. Ke tsela e khutšoanyane e re fihlisang ho Jesu Kriste. Ke tsela e phetheleng, eo ho eona ho senang seretse kapa lerole; leha ele tšilanyana feela ea sebel! Qetellong, ke tsela e otlolohileng e re lebisang ho Jesu Kriste, le bophelong bo sa feleng. Es a re ise ka nq'ena kapa ka nq'ane; empa e sa leng e re otlollela pele feela, ho se letho le ka re lahlang. A re inkeleng tsela ena he, ba-heso; re tsamaee ho eona nyene le bosiu, bo fihlela re fihla botlalong ba lilemo tsa Jesu Kriste.

HLOHO EA BOTŠELELA: BORAPELI BONA, BO RE NEHA BOLOKOLOHI BO BOHOLO, BA MOEA.

169* Lebaka la botšeleta: Boiteko ba borapeli bona, bo re neha bolokolohi bo kahare bo boholo – Bolokolohi ba bana ba Molimo – ho bona ba bo latelang ka botšepehi! Ere-kaha, ka borapeli bona, re fetoha makhoba a Jesu Kriste, re inehela Eena ka tsela eona ena, ho se letho leo re itšielang lona. Morena enoa ea molemo o re putsa ka baka la bokhoba ba rōna ba lerato, boo re ipehang ho bona:

1. O tlosa ho rōna matsoalo 'ohle a mabe a ho hloka khotso. Le a tšabo ea letsoalo, le ka qotetsang moea oa rona, la o etsa motlamuoia la ba la o ferekanya.

2. O sarolla pelo ea rōna ka tšepo e halalelang ho Molimo, a re etse hore re mo talime, ele Ntat'a rona ka sebele.
3. O re bululela ka moea oa lerato la Hae, la bana ho 'M'a bona; le behang tšepo eohle ea rōna ho Eena.

170* Ke sa emise ho paka linnete tsena ka mabaka, ke tla ke ke hlahise mona taba ea 'nete e etsahetseng. Eo ke e balileng bophelong ba 'Mè Agnes oa Jesu, moitlami oa Dominic ea Halalelang; oa Ntlo oa Langeac, Auvergne. Ea hlokahetseng ka selemo sa 1634, ka bohalaleli bo pontšeng.

Nakong eo a neng a sa le lilemo li supileng feela, 'me a hlopheha habohloko ke mathata a moea, a utloa lentsoe le 'molellang hore: "Haeba a rata ho lokolloa makaqabetsing 'ohle a hae, le ho sireletsoa ho lira tsohle tsa hae; a potlake a iketse kapele-pele lekhoba la Jesu, le la Maria, 'M'a Hae ea Lehlohonolo. Hang hoba a fihle hae, a b'a se a ineha kaofela ha hae ho ba lekhoba la Jesu le 'M'a Hae. Lehoja ho fihlela nakong eo, a n'a sa tsebe le letho la borapeli bona. A fumana ketane ea tšepe, eo a ileng a itlama ka eona thekeng. 'Me a e roala joalo ho fihlela lefu la hae! Kamora' ketso ena ea hae, mathata 'ohle le matsoalo a hae a nyamela ruri! A ba le khotso e kholo le bolokolohi ba pelo. Taba ena ea mo neha leseli la ho ruta ba bang ba bangata, borapeli bona. Bao le bona ba neng ba tsoele pele haholo ho bonal Har'a bona ebile Ntate Olier, Mothehi oa Seminari ea mohalaleli Sulpice. Ba bang ebile baprista ba bangata le barutua ba Seminari eo. Ka tsatsi le leng, Movirigo ea Lehlohonolo, a itlhahisa ho eena 'Mè Agnes! A ba a mo roesa ketane ea gauda molaleng! Ele bopaki ba thabo ea Mofumahali oa rōna; ha eena 'Mè Agnes, a ikentse lekhoba la Mora oa hae le la hae." Eaba Cecilia ea Halalelang, ea neng a e-na le Mofumahali oa rōna, o re ho 'Mè Agnes: "Ho lehlohonolo makhoba a tšepahalang a Mofumahali oa Lehlimo, hobane ba tla iketla bolokolohing ba 'nete: "Oho Maria, ho u sebeletsa ke bolokolohi!"

HLOHO EA BOSUPA: KA BORAPELI BONA, RE BUSELETSABANAB'ABO RONA HAHOL.

171* Lebaka la bosupa: Lebaka le leng le re susumeletsang ho nka borapeli bona, ke molemo o moholo oo banab'abo rōna ba o fumanang ka bona. Ka borapeli bona re etsa ketso e fetisisang ka bophahamo, ea lerato la Molimo. Kaha re mo neha ka matsoho a Maria, tlotlo eohle ea bohlokoaa maruo a rōna; eleng moputso oa mesebetsi eohle ea rōna e metle, ea litefelo le lithapelo tsa rōna. Re sa itšiele leha ele moputso oa khopolo e ka bang 'ngoe e lokileng; kapa bohlokoanyana bo bong bo itseng. Re lumetse hore tefelo e 'ngoe le e 'ngoe eo re tla e etsa, kapa eo re se ntse re e entse, ho fihlela motsotso oa lefu la rōna; e tlameha ho sebelisoa ka ho ea ka thato ea Mofumahali oa rōna, ho sokolla baetsalibe kapa ho lopolla meeaa e Qalong ea Tlhoekiso.

Na ketso eona eo ho banab'abo rōna, hase ketso ea lerato le phethehileng? Na hoo hase ho ba eena moratuaa oa 'nete oa Jesu Kriste, ea tsejoang ka lerato la hae? Na hase tsela e ntle ea ho sokolla baetsalibe, ho se tšabo ea boikakaso? Le ea ho lopolla meeaa e Tlhoekisong, ho se boikhathatso bo boimahali, haese ho phetha mesebetsi ea mehla e re tlamang ea bophelo ba rōna?

172* Ele hore re tle re bone bohlokoaa ba ketso ena, re tšoanelaa ho utloisiaa kamoo eleng ntho e kholo kateng, ho sokolla moetsalibe kapa ho inola moea Tlhoekisong: Ke ntho e boholo boo molemo oa bona, o ke keng oa lekanngoa! E boholo bo fetang popo ea leholimo le lefatše! Hobane ka eona, re etsa hore moea o rue Morena Molimo (ka kopano ea oona le Molimo). Lehoja ebe ka borapeli bona, re ne re ka lopolla esita leha ekaba moea o le mong Tlhoekisong, kapa ra sokolla moetsalibe a le mong feela ka bophelo bohle ba rōna; na ho ne ho ke ke ha lekana, hore bo khanne motho e mong le e mong, ea nang le lerato la Molimo hore a bo nke?

Empa re tlameha ho tseba hore, ka baka la ho feta ka matsoho a Maria, mesebetsi eohle ea rōna e metle, e fumana phaello ea bohloeki, 'me kahoo, phaello ea moputso, ea litefelo le ea lithapelo tsa kopo. Ebile ke ka hona li nang le matla a ho lopolla meeaa e Tlhoekisong, le a ho sokolla baetsalibe ho feta hole; hoja li sa ka tsa feta ka matsoho a hloekileng, a fanang a Maria. Bonyenyane boo re bo nehelanang ka Maria, ka baka la ho hlobolisoa boithatelo ba rōna, le hoba bo e-tsoa leratong la Molimo feela, ho se boipatlelo ba tseo eleng tsa rōna, kannete bo fetoha thapelo e matlahali; ho nolofatsa khalefo ea Morena Molimo, le ho re fumanela mohau oa Hae. Ke ntho e bonolo hore lefung la motho ea ileng a tšepahala borapeling bona, a iphumane a sokolotse baetsalibe ba bangata; a ntšitse meeaa e mengata Tlhoekisong, ka liketso feela tsa mehla tsa bophelo ba hae. Etlabaa thabo e kaakang kahlong ea hae! A letlötö le fetisisang ka bosafeleng!

HLOHO EA BOROBELI: BORAPELI BONA, KE TSELA E RORISEHANG, EA HO PHEELLA.

173* Lebaka la borobelii: Qetellong, ho hlileng ho re khanang, nka re ho feta tsohle, ho inkela borapeli bona ho Maria Movirigo, ke hobane ele tsela e tsotehang ea ho pheella bokhabaneng; le ho tšepahala kamehla. Hoba u ka re lebaka ke'ng, ha bongata ba basokolohi ba baetsalibe, bo sa atlehe? U re ke'ng, ha re phakisa ho oela sebeng habonolo hakaale? Lebaka ke lefe? Ha sehlopha se seholohali har'a balumeli, bakeng sa ho tsoela pele bokhabaneng ba ho atleha botteng, le ho iphumanea phaello ea grasia tse ngata tse ncha; empa se atisa ho lahleheloa le ke bonyenyane ba grasia, kapa ba bokhabane boo se nang le bona? Bobe bona, ho ea kamoo ke seng ke 'nileng ka bolela; bo tsoa 'neteng ea hore lehoja motho a senyehile hakana, a fokola hakana, a bile a tsokotseha hakana, leha ho le joalo motho o ntse a itšepa; a itšetleha ka matla a hae! A bile a ikholoa hore o na le matla a ho ipolokela hantle, letlotlo la ligrasia tsa hae; bokhabane le

meuno ea hae ea leholimo! Ka borapeli bona, tsohle tseo re li ruileng, re li siea matsohong a Maria, Movirigo ea tšepehang. Re mo khetha ho ba mosireletsi kahohle, oa matlotlo 'ohle a rōna a tsa tlhaho le tsa grasia. Ke botšepehi ba hae boo re bo tšepileng; ke matla a hae ao re itšetlehileng ka 'ona, ke mohau le lerato la hae tseo re ikemisitseng ka tsona. Ele hore a tle a sireletse, a be a eketse makhabane le meuno ea rōnal! A sa tsotelle lisatane, nama le lefatše; tse batlang ho re falatsa tsona. *Joaloka ngoana ho 'm'a hae, mohlanka ea tšepehalang ho Mofumahali oa hae, re re ho eena Maria:* "Hlokomela, 'Mè, tse behiloeng kalosong ea hao! 'Mè ea mosa le Mofumahali ea ratehang, kea lumela hore ho fihlela joale, ke amohetse ho Morena Molimo ka borapeli ba hao, ligrasia tse bongata boo ke neng ke sa bo tšoanele, ka mesebetsi ea ka! Bomalimabe bo nthutile hore ke jere tlötlo ena, ka pitseng e kume-kume hampe haholo! Le hore ke fokola hampe-mpe! Ke sekatana feela, hore e be nka e boloka ka bo-'na! Ke mohlankanya feela ea sa tsebisahaleng! Kea u kopa hle 'Mè, mpolokele tsohle tseo ke nang le tsona. Ke re ka matla a hao le ka botšepehi ba hao, u mpolokele tsona. Haeba u nkalosa, ha ho letho leo ke tla le lahla; haeba u ntšoara ka tsoho la hao, nke ke be ka oa! Haeba u ntshireletsa, ha ho sera se tla nketsa letho."

174* Bernard ea halalelang o bua ka mantsoe a nchocho ho re khothaletsa, ho nka borapeli bona. Ha a re: "Ha Maria a u tšoere, u ke ke ua oa! Ha a u tataisa, u ke ke ua khathala! Ha a u sirelelitse, ha u hloke ho tšaba letho! Ha a le mohau ho uena, u tla pholoha." Empa Bonaventura ea halalelang, eka hoja a hhalosa ka mantsoe a chorileng ho feta: "Movirigo ea Lehlohonolo, ha a tiisoa feela ka tlalo ea Bahalaleli; empa ebile ke eena ea tiisang bahalaleli, hore bo tlalo boo bo se fokotsehe! O tiisa makhabane a bona hore a se balehe; o tiisa meuno ea bona hore e se senyehe; o tiisa ligrasia tsa bona hore li se ke tsa lahleha; o fasa lisatane hore li se hlahise kotsi; o rapela Mora oa Hae hore a se otle baetsalibe!"

175* Movirigo ea Lehlohonolo haholo, ke eena Movirigo eloa ea buselelitseng ka botšepehi ba hae, litšenyehelo tsa ho se tsepahale ha Eva, ea sa mamelang! Ebile bao ba itšetleheng ka Maria, o ba fumanela botšepehi le pheello ho Morena Molimo. Mohalaleli e mong o mo tšoantša ka tšepe ea likepe, e bitsoang ankora. Joaloka tšepe eo, Maria o tiisa ka thata 'me oa pholosa, har'a leoatle lena le befileng la fatše lena! Moo batho ba shoang ka bongata, bona ba sa itšoarellang ka ankora ena e matla! "Re tlama meeaa tšepong ea hao, joaloka tšepe e tiileng ea ankora!" O rialo mohalaleli Joannese Camascene. Bahalaleli ba pholohileng ba ile ba itlamella ka thata; le ho tlamella ba bang ho Maria, hore ba tle ba pheelle botteng. Ho lehlohonolo hasekete, Bakriste ba itlamellang ka Maria ka botšepehi bohle. Le ka khomarello, joaloka tšepong e tiileng ea ankora. Sekhahla sa lifefo tsa lefatše lena, se keke sa ba khoehlisa mangole; leha ele ho hloibila matlötlo a bona a leholimo. Ho lehlohonolo bao ba kenang ka ho eena, joaloka arekeng ea Noe! Metsi a moroallo oa sebe a khamang lihlophahali, a keke a ba hlahisetsa kotsi! Hobane Maria o re, eena le Bohlale ba Molimo: "Ba sebetsang ka ho 'na ho ipholosa, ba keke ba etsa sebe." Bana ba sa tšepehaleng ba Eva ea malimabe, ba lehlohonolo ha ba ipapisa le Maria, 'Mè ea tšepehalang! Maria, ea tšepehalang kamehla 'me ea sitoang ho itatola! 'Me ea ratang kamehla bao ba mo ratang, eseng feela ka lerato la pelo empa ka le mafolo-folo, le behang litholoana. Ka ho ba boloka kamehla tlas'a bongata ba ligrasia; hore ba se oele ke mokhathala, oa ho nyebella ho ikitlaelletsa botteng. Le ho se felloe ke tšepe ea ho tiisetsa grasieng, ea Mor'a hae.

176* Ka ho khannoa ke lerato feela, 'Mè enoa ea molemo ka-mehla, o amohela se behoang matsohong a hae. Ebile ha a se a ile a amohela joalo se behiloeng paballong ea hae, o tlangoa ke molao oa tōka, ka ho ea ka kutloano ea tse behoang paballong ea e mong; hore a re bolokele tsona li sa angoe ke letho. Ka mokhoa o tšoanang, le motho ea tlamehileng ho

mpolokela ka thata lipondo tse sekete, tseo ke li behileng tshireletsong ea hae. Hoo haeba li ka lahleha ka bohlasoa ba hae, a tlamehang ho li ntša ka tōka. Empa hase ntho e ka bang teng, hore letho leo re ka le sieang paballong ea Maria ea tšepehang, le ka senyeha ka bohlasoa ba hae! Lehholimo le lefatše li ka feta, ho e-na le hore Maria a be bohlasoal! 'Me a seke a tšepeha ho bona ba mo tsepileng.



177* Bana ba Maria, nthoana tsa batho, bofokoli ba lona ke bo hlomolanang! Ho tsokotseha ha lona ho matla ruri! Ebile botho ba lona bo senyehile qeto! E, kea lumela, le bopiloe ka letsopa le senyehileng la bana ba Adama le Eva: Ithuteng lekunutu lena leo ke le rutang lona; lekunutu le sa tsejoeng; ke batla ke re: Ke bohle Bakriste, esitana le ke bachesehehi ba baholo!

Le se sied ligauda le mabenyanane a lona ka khetsaneng tsa lona, tse seng li phuntsoe masoba ke moea o litšila, o le falalitseng. Mekotlanyana ena ea lōna, e menyenyane haholol! Ea fokola ho boloka tlötlo ea bohloko, 'me e kholo hakaalo.

Le se tšelete metsi a hloekileng a bonaletsang a seliba, pitsaneng tse nkhang hampe, tse silafalitsoeng ke sebel! Lehaeba sebe se se ne se tsoe ho tsona; empa monkho o mobe o nts'o setse, 'me metsi a tla senngoa ke oona. Le se tšelete veine ea lōna e hlabosehang hamonate, ka meqomong ea khale, e neng e tšoere veine e senyehileng. Le eona e tla senyeha le hore e ka 'na ea tšoha e qhalana.

178* Bakhethuoa ba Molimo, lehoja lona le se le ntse le nkutloisia; empa ke hona ke sa tla bolela phatlalatsa: Sekeng la bolokela gauda ea lerato la lona la Molimo, mabenyanane a bohloeki ba lona, le metsi a ligrasia tsa lona tsa leholimo, kapa liveine tsa meuno ea lona, le makhabane a

lona, mokotleng o tabohileng! Setoaba sa khetsi se phunye-hileng, kapa moqomo o nkhang hampe o senyehileng, joaloka lona! Ho seng joalo, masholu a tla le falatsa! Lisatane tse le lisang bosiu le motšeare, li chehile motsotsoana feela o ka li lumellang, hore li fele li le hloibile! Ho seng joalo, le tla silafatsa lineho tsohle tse ntlehali tsa Morena Molimo! Le li senye ka monkho o mobe oa boithati, oa boitšepo le oa boikakaso.

Behang ka sefubeng le ka pelong ea Maria, matlötlo 'ohle a lōna; ligrasia tsohle le makhabane. Ke eena pitsa ea grasia, pitsa ea hlompho, pitsa ea khalalelo le ea borapeli! Haesale Molimo ka sebele sa Hae, ka liphethetho tsohle tsa Hae, a ipata ka pitseng enal E fetohileng pitsa ea grasia ho bohle, ba qoelang har'a boliba ba ligrasial! E fetohile pitsa e hlomphehang le terone ea hlompho, ea likhos i tse kaholimolimo tsa bosafeleng! Ke pitsa ea borapeli, lehae la ba khabileng ho feta bohle ka molemo, ka grasia le ka bokhabanel! Ke qetella ka ho re: E fetohile pitsa ea maruo a kang a ntlo ea gaudal! Pitsa e matla a kang tora ea Davidal! Pitsa e hloekileng joaloka tora ea ivori!

179* Oho, o lehlohonolo hakaakang, motho ea nehang Maria tsohle! Ea itšepelang Maria feela ho tsohle le bakeng sa tsohle! 'Me ea ileng shoii, ke Marial! Ke oa Maria kahohle le Maria ke oa hae kahohle. Le eena joaloka Davida, a ka bua ka tšepo a re: "Maria ke 'mopetsoel!" Kapa hammoho le morutuo ea ratuoang oa Morena, a re: "Maria ke mo nkile e le tsohle ho 'na!" Kapa hammoho le Jesu Kriste ha a re: "Tsohle ke tsa hao, oho Marial! 'Me tsohle tsa hao ke tsa kal!"



180* Haeba mohanyetsi ofe kapa ofe, ka ho bala sena, a ka ba le ho hopola hore kea eketsa, le hore ke nkiloe ke moea o senang tekanyo oa bochesehehi, a sono motho oa

bathol! Hoba ha a nkutloisise, ka baka la hobane ele motho oa nama, ea sitoang ho latsoa tseo eleng tsa moea! Kapa ka baka la ho ba motho oa masaoana, o sitoa ho amohela Moea o Halalelang! Kapa kahobane a ikhantsa, a nyatsa tsohle, joale o s'a nyelisa; a bile a ahlola eng kapa eng eo a sa e utloisiseng. Empa meeaa e sa tsoaloang ka mali kapa ka nama, leha ele ka boithatelo ba motho; empa e tsoetsoeng ke Molimo le Maria, e ea nkutloisia. Ebile e utloa monate ke sena, seo ke se bolelang. Le 'na ke ngolla bona!

181* Leha ho le joalo, ke re: Lehoja nkile ka bua ka tse ling tse kathoko hanyenyane, bohole ke rata ba utloe ba be ba utloisise; ekaba bahanyetsi, ekaba ba lokileng: Hore Maria 'M'a Molimo, erekaha a tšepeha ho feta bohole ba bōpiloeng, a bile a fana ho feta bohole har'a libōpuoa! Ha a lumele le kamohla, hore a hloloe ka lerato le ka ho fana! 'Me ebile joalokaha monna e mong ea halalelang a boletse: "Ha u mo fa lehe, eena o tla u fa khomo!" Ke ho re, bakeng sa mphonyana eo a e nehoang, eena o fana ka tse kholo, tseo a li fumaneng ho Morena Molimo. Kahoo, haeba moea o inehela eena o sa itšiele letho, le eena o ineha moea oo a sa itšiele letho! Haeba feela moea oa boikakatsi o le sieo ho motho. A mpa a leka ka matla 'ohle a hae, ho ipokellela bokhabane ba moea, le ho hatella fatše litakatso tsa botho.

182* Ba leseng he, bahlanka bana ba tšepahalang ba Maria Movirigo, ba bue ka sebete le mohalaleli Joannese Damascene, ba re: "Ha ke e-na le tšepo ho uena, oho 'M'a Molimo, ke tla pholoha! Ha ke le tlás'a tšireletso ea hao, ha ke tl'o tšaba letho! Ha ke tlatsitsoe ke uena, ke tla loantsa lira tsa ka, ke li qhale! Hobane ho ba le borapeli ho uena, ke ho ba le libetsa tsa pholoho; tseo Morena Molimo a li fang bana, bao a bātlang hore ba pholohé."

KHAOLO EA BOTŠELELA

REBECCA LE JAKOBO KE SETŠOANTŠO, SE TŠOANTŠITSENG BORAPELI BONA BIBELENG

183* Moea o Halalelang o re neha Mangolong a Halalelang, setšoantšo se setlehalis a linne tsohle, tseo ke li ngo-tseng malebana le Maria Movirigo; malebana le bana ba hae le bahlanka ba hae. Ke nalane ea Jakobo, ea neng a fumane hlohonolofatso ea ntat'ae Isaaka, ka tlhokomelo le bohlale ba 'm'ae.

Ke ena nalane, kamoo e phetoang kateng ke Moea o Halalelang. Kamorao ke tla beha litlhaloso tsa eona.

HLOHO EA PELE: REBECCA LE JAKOBO.

1. Nalane ea Jakobo.

184* Hoba Esau a rekise ka boholo ba hae ba tsoalo, ho Jakobo, Rebecca, 'm'a bona, ka baka la lerato le leholohali ho Jakobo; lehoja lilemo tse telele li ne li se li ile tsa feta, kamorao ho ketsahalo eo, empa eena ka bohlale bo makatsang, bo tletseng khalalelo le misteri ka nako e le 'ngoe; o kile a boela a fumanela Jakobo lehlohonolo leo, la mpho ea boholo ba tsoalo. Isaaka, ka ho eleloa boqheku ba hae, 'me ka ho rata ho hlohonolofatso bana ba hae pele a e-shoa, a bitsa Esau eo e neng e le thatohatsi ho eena. A ba a mo laela hore a ke a e'o mo tsomela phootsoana tsa naha, a tl'o hlaphola! A tle a tsebe le ho mo hlohonolofatso. Rebecca kapele-pele, a loma Jakobo tsèbè, holim'a se ntseng se etsahala! A ba a mo laela hore a e'o lata lipotsanyane tse peli, har'a mohlape. Joale hoba a li nehe 'm'a hae, Rebecca a lokisetsa Isaaka lekholtloane leo a tsebileng hore le tla lumellana le 'metso, oa monna-moholo! A ba a apesa Jakobo liaparo tsa Esau, tseo a neng a 'moloketse

tsona. A mo thata matsoho le molala, ka matlaloana a lipotsanyane! Ele hore monna-moholo ea neng a se a foufetse, etlere ka ho utloa lentsoe la Jakobo, a tle a kholoe hore ke Esau ngoan'abo; ka baka la matlaloana a matsohong a hae! Efela ka ho makatsoa ke lentsoe, leo a neng a hopola hore ke la Jakobo, Isaaka a re a atamele haufi le eena. Joale hoba a ame matlaloana a boeanyana ao matsoho a Jakobo a neng a thatiloe ka 'ona; a bua a re: "Kannete haele lentsoe ke lentsoe la Jakobo; empa matsoho ke matsoho a Esau!" Joale, hoba monna-moholo a je, 'me hoba a ake Jakobo; a nkheloe ke monko o monate, oa linonetso tsa likobo; eaba oa mo hlohonolofatsa! A ba a 'miletsha mahlohonolo a phoka ea leholimo, le manoni a tsa lefatše! A mo etsa morena oa banab'abo! A ba a qetella hlohonolofatso ka mantsoe ana: "Ho rohakehe ea u rohakang, 'me ho hlohonolofale ea u hlohonolofatsang".

Isaaka, motsotsoana, a sa tsoa qeta mantsoe ana, Esau a be a kena ka sekotlolo, sa seo a tsoa se bolaea naheng koana! Ele hore ntat'ae kamorao, a tle a mo hlohonolofatse. Mohalaleli oa boholo-holo a nyaroha ke ho makala, ho kekeng ha hhalosoa, ha a elella se etsahetseng! Empa bakeng sa ho etsolla seo a se entseng, eaba oa se tiisa! Ka ho elella hore monoana oa Molimo, o teng tabeng tseo. Joale ho ea kamoo Mangolo a Halalelang, a re bolellang kateng, Esau a qala ho ntša seboko hlohonolo, ka khalefo e bohloko! Le ho qosa ngoan'abo ka boeki. A etsa lerata le tšabehang! A bile a botsa ntat'ae hore na, o n'a e-na le hlohonolofatso e le 'ngoe feela na? Ka ketso ena, Bo-Ntate ba Kereke, ba re bolella hore, o ne a tšoana le bona bana bao, ka ho rata ho kopanya Molimo le lefatše, ba lakatsang ho iketla ka matšeliso a lefatše le a leholimo hammoho.

Isaaka, ka ho sisimosoa ke liboko tsa Esau, a ba a qetella a mo nehile hlohonolofatso; empa hlohonolofatso ea tsa lefatše! A ntse a 'mehile tlas'a ngoan'abo. Ka baka la taba ena, Esau a ba le bora ba sehloho ho Jakobo, hoo a neng a

emetse feela hore ntat'ae a pate hloho, a tle a 'molae. Esita le eena Jakobo o ne a keke a phonyoha lefu la hae, hoja 'm'a hae ea mo ratang Rebecca, a se mo phemise Iona; le teng ka maleba-leba le ka keletso tsa hae tse ntle, tseo a neng a mo nehe tsona, 'me le eena Jakobo a li latela.

2. *Tlhaloso ea Nalane ea Jakobo.*

185* Pele ho tlhaloso ea nalane ena e ntlehal! Re tlameha ho tseba hore, ka ho ea ka bo-ntate ba Kereke, le lihlosi tsa Mangolo a Halalelang, Jakobo ke setšoantšo sa Jesu Kriste le sa bohle bakhethuoa. Ha Esau ele setšoantšo sa balahlehi. Re tšoanelia feela ho hlahloba boitšoaro ba bona ba babeli, 'me re tla iphumanela ele rōna.

Esau, Setšoantšo sa Balahlehi.

1. Esau, moholoane, o n'a le matla, ele seqhenqha sa motho! A nepa ka seqha sa hae, motsu o sa oeles fatše! Ho tsomeng, a le lehlohonolo le makatsang.

2. Hae, o n'a re feela qobacha! 'Me ka ho itšepela matla le bohlale ba hae, o n'a itšebeletsa ntle koana.

3. O n'a sa ikhathatse ho thabisa 'm'ae Rebecca, 'me a sa itube ka letho malebana le eona taba ena.

4. O n'a le meharo, a rata lijo. Hona hoo, a na beng a rekisa boholo ba hae ba tsoalo, sekotloloana sa moroho!

5. Joaloka Kaine, o n'a le mona hampe-mpe ho ngoan'abo Jakobo, a mo hlorisa ka mokhoa o hlomolanang.

186* Boitšoaro ba kamehla ba balahlehi.

1. Ba itšepela matla a bona feela, le bohlale ba bona ho tsa lefatše. Ba hatetse pele haholohali, ba bohlale-hlale! 'Me ba na le leseli le makatsang linthong tsa lefatše. Empa ke litholo feela, batho ba sa tsebeng letho ho tsa leholimo! Ka mabaka ana:

187* 2. Ba re qobacha feela hae, ka matlung a bona! Ke ho re ka moeeng oa bona; oo eleng lehaè la 'nete le kahare. Leo Molimo a le etselitseng motho e mong le e mong, ho lula ho Iona, ka ho etsisa eena Molimo: Hobane Morena Molimo kamehla o ka ho Eena, Bomolimong ba hae. Balahlehi ha ba rate khutso le bophelo ba moea, ba borapeli bo kahare! Ba arohaneng le lefatše, ba sebetsang ka moeeng oa bona ho feta kantle, ba ba sheba ele lihole; baikaketsi, libōpuoanyana tse kentseng hloho ka 'metheng!

188* 3. Balahlehi ha ba itoutise ka letho, malebana le borapeli ho Maria, 'M'a bakhethuoa. Ke 'nete hore ha baa mo jara ka pelo! Ka mohlomong baa mo roris, ba re baa mo rata! Ebile ba inonya ka borapeli bo bong bo itseng ho mo hlompha! Empa kantle ho mona, ba sitoa ho utloisia hore a ratoe ka le sisitseng, la ngoana ho 'm'ae! Hobane ha ba na Iona le joalo, le kang la Jakobo. Maiteko a borapeli ao bana *le bahlanka ba hae ba tsepahalang, ba mo etsetsang 'ona ho hapa lerato la hae, balahlehi baa a nyatsa!* Hobane ba re borapeli bo joalo ha bo hlokahale hohang, ho pholosa moea oa motho! Le hore ho lekane hore Maria, a seke a jaroa ka pelo! Le hore ho seke ha nyelisoa pontšeng, borapeli boo a bo etsetsoang. Balahlehi bana, ba hopola hore ba thabisa Maria Movirigo. Ba hopola hore baa mo sebeletsa, ka ho bala le ho peteketsa lithapelonyana tse ling ho mo rapela, ho se lerato la letho ka ho bona malebana le eena; leha ele hore ba ka iteka, ho fetola liketso tse mpe tsa bona.

189* 4. Balahlehi ba rekisa tōkelo ea bona ea tsoalo, ke ho re, boiketlo ba bosafeleng, sekotloloana sa moroho; eleng maiketlo a lefatše. Baa ja, baa bapala, baa tantša le tse ling tse joalo! Ba raha leoto ho se boikhathatso joaloka eena Esau, ho ipeha boemong bo tia ba fumanela hlohonolofatso, ea Ntat'a bona ea maholimong. Ka ntsoe le le leng: Ba inahanelia lefatše feela! Ba ithatela tsa lefatše feela! Ba bua ka lefatše feela! Ba sebeletsa Iona feela, le menate ea Iona! Ele

hore ba tle ba iketle ka nakoana ea motsotsoana feela. Hore ba tle ba fumane thoriso ea motsotsoana feela, e sekotoana sa lejoe le besitsoeng. Le ka ba lesehla kapa la e-ba lesoeu, ba tla rekisa grasia ea bona ea hlatsuo, kobo ea bona ea bohloeki, le lefa la bona la leholimo.

190* 5. Qetellong, balahlehi kamehla, ha ba batle bakhethuoa. Ba ba tuba kamehla ka sephiring le pepeneneng! Ba fumana bakhethuoa ele moqeqeko ho bona! Baa ba nyelisa, baa ba nyekolla, baa ba tlaka, baa ba rohaka, baa ba senyetsa; baa ba thetsa, baa ba qaqaftsa; baa ba tsoma le ho ba etsetsa: "Ncoe-ncoe nkhono-thupal!" Ha bona balahlehi ba ipokellela maruo, ba ithabisa, ba fumane litulo tse phahmeng mesebetsing! Ba iphumantša maruo, ba itheneketsa, ba phela hamonate lefatšeng.

Jakobo, Setšoantšo sa Bakhethuoa.

191* 1. Jakobo, moena, o n'a fokola 'meleng, a le molemo, a bile a e-na le khotso ho bohle. O n'a atisa ho itulela hae hore a tle a thabise 'm'ae Rebecca, ea neng a mo rata haholo. Ha a n'a tsoela kantle, e ne ese ka boithabiso ba hae, leha ele ho tsepahalang ba hae! Empa e ne ele ho mamela 'm'ae feela.

192* 2. O n'a rata 'm'ae hae a mo hlonepha. 'Me hona, e ne ele Iona lebaka le mo khannang, hore a itšalle hae, pel'a 'm'ae. Ntho e neng e mo thabisa ka ho fetisisa, e ne ele ho bona: "'Mè ke eo!" Ntho efe kapa efe e neng e ka soabisa 'm'ae, o ne a e qoaea esale pele-pele! Le ho leka ka matla 'ohle a hae, ho etsa tsohle tse mo thabisang. Tsena tsohle kaofela, tsa 'na tsa eketsa lerato la Rebecca ho ngoana oa hae.

193* 3. Linthong tsohle, o n'a mamela 'm'ae hae ea ratehang! A mo mamela ka tlalo ho tsohle, ka sehlahlo se se nang tieho, ka lerato le se nang koma-komo. Hang ka ho panya ha leihlo, moshemanyana Jakobo, ka ho bona takatso ea

'm'ae, o n'a matha ho mo thusa. O n'a kholoa tsohle tseo 'm'ae a 'molellang tsona, a sa batle mabaka! U ka hla ua bona ka taba ea 'm'ae, ha a re a e'o lata lipotsanyane tse peli; a mo tlisetse tsona ho tla lokisetsa ntat'ae Isaaka lijo. Jakobo ha a ka a araba ka ho re: "E le 'ngoe e tla lekana motho ea mong, ho ja." Empa ntle ho khang a ea, a phetha kamoo a bolelloang kateng ke 'm'ae.

194* 4. O n'a e-na le tšepo e kekeng ea lekanngoa ho 'm'ae! Erekaha a n'a sa tšepe masenenyana a hae, o n'a itšetleha feela ka tlhokomelo le tshireletso ea 'm'a hae. Ho tsohle tseo a neng a li hloka, o n'a e-ea ho eena, a kopa keletso ea hae, lipelaelong tsohle tsa hae. U ka bona haere ha a botsa 'm'ae hore na, ntat'ae ha a tl'o mo rohaka bakeng sa ho mo hlohonolofatsa? A mo lumela a bile a mo tšepa ha a re, ke eena ea tla rohakeha bakeng sa hae.

195* Taba ea qetello, o n'a leka kamoo a nang le matla kateng ho tšoana le 'm'ae, ka makhabane a moea ao a neng a bona ho eena. Ehlile eka lena, e ne ehlile ele le leng, la mabaka a neng a mo salisa hae hakana! Hore a tl'a fele a etsise 'm'a hae ea lokileng hakana! Le hore a tle a qobe mekhatlo e mebe, e senyang boitšoaro bo botle. Ka tsela ena, a iphuma-nela lehlohonolo, la ho hlohonolofatsoa habeli, ke ntat'ae ea ratehang haholo.

196* Ke bona boitšoaro ba kamehla, ba bakhethuo.

1. Ba itšalla hae le 'm'a bona. Ke ho re, ba rata khutso le bophelo ba moea bo kahare. Ba khothaletse thapelo ka ho etsisa 'M'a bona Maria Movirigo! Le ka ho ba le eena kamehla; eena eo botle ba hae bohle bo leng kahare. Eo, nakong eohle ea bophelo ba hae, a neng a iphelela ka khutso le ka thapelo. E, ke 'nete kamohlomong ba ka 'na ba bonoa ba le kantle, har'a batho ba masaoana, empa ke ka ho mamela thato ea Morena, le ea 'M'a bona ea ratehang; ho phetha litšoanelo tsa bona tse ba tlamang tsa bophelo.

Lehoja ba ka fumana katleho e totobetseng, ea mesebetsi ea bona e kantle, empa bona ba ithatela eo e kahare, eo ba e sebetsang moeeng oa bona hammoho le Maria Movirigo. Hoba moo ba sebetsa mosebetsi oa mantlha oa phetheho, oo e meng mesebetsi, ha e bapisoa le oona, eleng mesebetsi ea mantloaneng! Ebile ke ka hona, ha bana babo bona le likhaiseli, ba tlolaka le mesebetsi e kantle *ka matla, ka mafolo-folo*, le ka katleho e kholo, ba hapa maikutlo le pelo tsa batho; bona ba tsebang ka leseli la Moea o Halalelang, hore ke ntho e tlottlehang ho feta, e ntlehali haholo, e bileng e thabisang ka ho fetisia, ho sala ba patiloe khutsong le Jesu Kriste, Sesupiso sa bona; ka mamele e tletseng ho 'M'a bona Marial Ho feta ho etsa, ka matla a bona, limakatso tsa tlhaho le tsa grasia har'a lefatšel! Joalokaha bo-Esau le balahlehi ba bangata ba etsa. Letlotlo la Molimo le maruo a batho, li tšoanelo ho fumanoa tlung ea Maria.

Oho Morena Jesu, li rateha hakaakang litabernakele tsa hao, Morena! Serobele se iphumanetse ntloana moo se tla itulela teng; le letsibana-khoroana sehlaha, bakeng la malinyane a lona! Na o lehlohonolo motho ea ahileng tlung ea Maria! Moo Uena Morena, u bileng oa pele ho ikahela teng! Tlung ena ea bakhethuo, motho o fumana thuso e tsoang ho Uena Morena! 'Me ka pelong ea hae, o iketsetsa lihatelo le lipahamo tsa makhabane 'ohle; ao ka 'ona a hloe-lhang phethehong hona khutlong sena sa lillo. "Li rateha hakaakang, litaberbakele tsa hao, oho Morena!"

197* 2. Bakhethuo ba rata Maria ruri ka lerato le sisitseng, joaloka 'M'a bona ea molemo. Ba mo hlonepha kannete joaloka Mofumahali ea molemo oa bona. Ha ba mo rate feela ka molomo empa kannete! Ha ba mo hlonephe feela ka lipuo, empa ke ka pelo le ka moea oa bona 'ohle. Joaloka Jakobo, ba balehela tsohle, tseo ba tsebang hore li ka mo soabisa. 'Me ka mafolo-folo, ba iteka ka tsohle, tseo ba hopolang hore o tla li thabela. Le ho mo etsa hore a ba rate ho feta.

Ha ba mo tlisetse ele motho, lipotsanyane tse peli feela, joalokaha Jakobo a ne a etse ho Rebecca. Empa ba mo neha 'mele le moea oa bona le tsohle tsa tsona; tse neng li tšoantšitsoe ka lipotsanyane tse peli tsa Jakobo. Ba etsa joalo:

1. Hore Maria a ba amohele ele ba hae.
2. Hore a ba shoese ka nqeng ea sebe le ea bobona. A ba buhe, a ba tlose letlalonyana lena la bona; ke hore boithati ba bona! Ele hore ba tle ba hlahe ba rateha ho Jesu Mor'a hae. Eena ea batlang hore metsoalle le barutuoa ba Hae, ebe batho bao feela ba shoeleng ka nqeng ea bobona.
3. Hore a tle a ba lokise ho ba lijo tse hlabosang, tsa Ntat'a bona ea Leholidong! Ho neha Molimo tlotlo e kholo ka ho fetisisa, tlotlo eo Maria a e tsebang ho libopua tsohle!
4. Le hore ka tlhokomelo le ka lithapelo tsa hae, 'mele le moea eona, ha li se li hlakotsoe litšileng tsa tsona tsohle; li shoele ruri! Li mumutsoe li bile li lokisitsoe hamonate! Li tle li fetohé sekotlolo se hlabosehang sa lekholtloane, ho Ntat'a bona ea Maholidong; 'me se tšoanelang hlohonolofatso ea Hae. Na, hase bona boitšoaro ba bakhetuoa bona boo? Bao ka ho rata ho paka lerato le sebete, la 'nete ho Jesu le Maria, ba thabelang, 'me ba bileng ba etsang boinehelo ba bona bo phethehileng, ho Jesu ka Maria; ka borapeli boo re bo rutang mona?

Balahlehi ba itlatlarietsa ka ho re ba rata Jesu! Le hore le Maria baa mo rata, baa mo hlonephä! Empa ha ho lerato la 'nete le letho, ho Jesu le Maria! Ho bona hore ha ba tšoane le bakhethuoa, balahlehi ha ba rate Jesu le Maria, ho lekaneng! Hoo, ba ka ba etsang nyehelo ka 'mele oa bona le ka matla 'ohle a bona, le ka moea oa bona; hammoho le litakatso tsohle tsa oona.

198* 3. Bakhethuoa ba tlas'a tsamaiso ea Mofumahali oa rōna ea Lehlohonolo. 'Me ba mo mamela ele 'M'a bona ea ratuoang, ka ho etsisa Jesu Kriste! Eo, ka lilemo tse

mashome a mararo a metso e meraro, tseo a li phetseng lefatšeng, a qetileng mashome a mararo, ka ho ipeha tlas'a tsamaiso e tletseng ea 'M'a Hae ea Halalelang, ka ho tlötlisa Molimo – Ntat'ae. Bakhethuoa baa mo mamela, ka ho latela likeletso tsa hae, joalokaha Jakobo a ne a latela likeletso tsa 'm'ae Rebecca. Ea neng a re ho eena: "Mor'a ka, latela likeletso tsa ka!" Kapa joaloka basebeletsi, ba mokete oa bohali Kana; bao Mofumahali oa rōna, a neng a re ho bona: "Tsohle tseo Mor'a ka, a tla le bolella tsona, le li etse." Ka baka la mamelo ea hae ho 'm'ae, Jakobo, re ka re ka mohlolo, a fumana hlohonolofatso! Lehoja a n'a sa tšoanelia ho ba le *eona ka ho ea ka litaba*. Ka ho latela keletso ea Mofumahali oa rōna ea Lehlohonolo, basebeletsi ba mokete oa bohali ba Kana, ba ile ba hlomphuoa ka mohlolo oa pele, oa Jesu Kristel! Eo ka thapelo ea 'Mè enoa ea Lehlohonolo, a neng a fetole metsi veine. Ho tla 'ne ho be joalo, ho fihlela bofelo ba lefatše. Bohle ba tla fumana hlohonolofatso, ea Ntat'a bona ea Maholidong; ba hlomphuo ka mehlolo ea Morena Molimo. Ba tla fuoa ligrasia tsena, hafeela ba e-na le mamelo e tletseng ho Maria. Ha bo-Esau bona, ba lahleheloa ke lihlohonolofatso tsa bona! Ka baka la ho hana ho tsamaisoa, ke Movirigo ea Lehlohonolo.

199* 4. Bakhethuoa ba na le tšepo e kholo, holim'a molemo le matla a 'M'a bona ea ratuoang, Movirigo ea Lehlohonolo ka ho fetisisa. Ba kopa thuso ea hae nyene le bosiu! Ba mo talima ele naleli *ea bona!* *Hore a bone litsietsi le bohloki ba bona*. Ba khomarela letsoele la hae la mohau, le la kutloelo-bohloko, hore ka lithapello tsa hae, ba iphumanele tšoarelo ea libe tsa bona. Le hore, har'a mathata le lipelaelo tsa bona, ba 'ne ba latsoe bomonate ba letsoele la hae. Ka tsela ea tsa leholimo, ba ikakhela sefubeng sa hae, se tletseng lerato 'me se hloekileng, se senang tšila ea sebe! Ho sona ba ipata teng le ho ithoballa. Hore ba tle ba hotetsoe, ka mollo oa lerato la hae le hloekileng! *Ba tle ba hloekisoe esitana le koling ea bona e fokolang*. Hore teng, ba tle ba fumane Jesu Kriste ka

talo. Eena ea itulelang moo e le teroneng, ea botlotlehi bohole ba Hae. A boiketlo bo fetisisang: "Le se hopole leha ele hanyenyane, hore ho lula sefubeng sa Abrahama ho monate, ho feta ho lula sefubeng sa Maria! Seo Morena a ileng a beha terone ea Hae ho sona." Ho rialo Moitlami Guerrie.

Balahlehi bona, ka ho itsepela matla a bona, ba ja makhapetla a lifariki, le ngoan'a lehlaso, ba iphepa ka mobu joaloka linqanqana! Ba ithatela tse kantle feela, tse bonoang ka mahlo. Ha ba na tatso ea letho, ea bomonate ba pelo ea Maria. Boitsetleho le tšepo eo bakhethua, ba e utloang ho Maria Movirigo, 'M'a bona ea ratuoang, balahlehi ha ba li utloe; ke re, ie ietho! Ba bomalimabeng ba ho rata, ho 'na ba lapela lintho tse kantle. Hobane ha ba batle ho latsoa bomonate, bo seng bo lokisitsoe kahare ho bona, le kahare ho Jesu le Maria. Joalokaha mohalaleli Gregori a bolela: "Rona ba malimabe, tlala ea rōna, ke ho rata tse kantle."

200* 5. Taba ea qetello, bakhethua ba latela tsela tsa Maria Movirigo, 'M'a bona ea ratuoang. Ke ho re, baa mo etsisa! 'Me ka mokhoa ona, ruri ba lehlohonolo, ba bile ba chesehela ka 'nete! Ebile ba na le pontšo e kekeng ea thetsa le ka mohla, hore ba tla pholoha. Hobane 'Mè enoa ea lerato, o re ho bona: "Ho lehlohonolo bao ba itekang ka makhabane a ka! Bao ka thuso ea grasia ea Molimo, ba tsamaeang mehla-leng ea bophelo ba ka. Ba lehlohonolo nakong ea bophelo ba bona lefatšeng lena! Ka baka la bongata ba ligrasia, le bomonate boo ke ba abelang bona! Ka baka la ho tlala ha ka, ka bongata bo boholo, ho feta ba bang; bao ba sa nketsiseng ka ho tlala. Ba lehlohonolo lefung la bona le monate, le nang le khotsa! 'Me leo hangata, ke atisang ho ba teng ho lona; hore e tle e be 'na ka sebele, ea ba isang thabong e sa feleng. Hobane, ha ho e-s'o be le a le mong ea kileng a lahleha, oa bahlanka ba ka ba lokileng! Bao bophelong ba bona, ba neng ba ikitlaetsa ka makhabane a moea oa ka.

Balahlehi bona, ba malimabe bophelong ba bona, lefung la bona, le ka bosafeleng! Hobane ha ba etsise makhabane a Maria Movirigo. Ba ikhotsofatsa ka ho kena mabothong a hae ka mohlomong; ka ho bala lithapelo tse ling ho mo hlompha, kapa ka ho etsa borapeli bo bong bo kantle.

Oho Movirigo ea Lehlohonolo, 'Mè ea ratehang haholo! Ba lehlohonolo hakaakang, ka ho nkuoa ke bomonate boo ke bo utloang pelong ea ka! Ke sa pheta ke re: ba lehlohonolo, hakaakang! Bao, ka ho se latele borapeli bo fosahetseng ho uena, ba latelang boitšoaro ba hao ka botšepehi; likeletso le litaelo tsa hao. Empa ba malimabe 'me ba rohakehile hakaakang, batho bana! Bao, ka ho senya borapeli ho uena, ba sa bolokeng melao ea Mora oa hao!

HLOHO EA BOBELI: MARIA MOVIRIGO EA LEHLOHONOLO, LE MAKHOBA A HAE A LERATO.

201* Joale ke ena mesebetsi ea lerato, eo Maria Movirigo 'M'a rōna ea monate-nate, har'a bo-'m'a bana bohole, a e etsetsang bahlanka ba hae ba tšepahalang; ba inehileng eena ka tsela ela eo ke e hhalositseng, le ka ho ea ka setšoantšo sa Jakobo:

I. Oa ba Rata.

"Ke rata bao ba nthatang". (Maele 8: 17)

1. O ba rata hobane ele 'M'a bona oa 'nete: Joale 'm'a ngoana kamehla, o rata ngoan'a hae, tholoana ea topollo ea hae.
2. O ba rata ka lerato la teboho, hobane ba mo hlahisetsa lerato le nang le mesebetsi e metle! Eena eleng 'M'a bona ea ratuoang haholo ke bona.
3. Erekaha ele bakhethua, oa ba rata hobane ba ratoa ke Molimo: "Jakobo ke mo ratile, 'me ke hloile Esau". (Rom. 9: 13)

4. O ba rata hobane ba ikabetse tšebetso ea hae kahohle-hohle; 'me kahoo, ba fetohile kabelo le lefa la hae.

202* O ba rata ka le sisitseng! Le sisitseng ho feta la bo-'m'a bona bohle, ba bokelletsoeng hammoho, lefatšeng lohle. Haeba ho b'o ka etsahala, ho kenya pelong ea mosali a le mong, bakeng sa ngoana a inotši oa hae, lerato la tlhaho la bo-'m'a bana bohle ba lefatšeng, bakeng sa bana bohle ba bona; ha ho pelaelo lerato la mosali eo, e ka ba le leholo ka ho fetisal Empa 'nete ke hore, Maria o rata bana ba hae, ka le matla ho feta leo mosali eo, a neng a ka rata ngoana eo oa hae, ka lona.

Maria ha a ba rate feela ka maikutlo, empa o ba rata ka mesebetsi ea hae. Joaloka lerato la Rebecca ho Jakobo, esita le ho feta moo. Lerato, la Movirigo ea Lehlohonolo, ho bana ba hae, le mafolo-folo, lea sebetsa. 'Mè enoa ea lerato, eo Rebecca e neng ele setšoantšo sa hae feela, seo a se etsetsang bana ba hae, ho ba fumanela hlohonolofatso ea Ntat'a bona ea Maholimong, ke sena:

203* 1. Joaloka Rebecca, o aloza ka hlokolosi, metsotsa ea ho ba etsetsa molemo, ho ba phahamisa le ho ba ruisa. Erekaha a bona hantle haholo, ka Molimo, tsohle tse lokileng le tsohle tse mpe; a bona ketsahalo ea tsohle tse ntle le tse mpe, mahlohonolo 'ohle le lithohako tsohle tsa Molimo; o raka liketsahalo tse tleng ho tla! Ele hore a qobeletse bahlanka ba hae, ho tse ngata tse mpe; le ho ba sitsa ka litlhohonolofatso tse ngata. Haeba ho n'o e-na le lehlohonolo le leng, le ka oelang motho, leo motho a ka iketsetsang lona ho Molimo, ka phethiso e tšepahalang ea mosebetsi o mong o phahameng; ha ho pelaelo Maria Movirigo, lehlohonolo leo, o tla le fumanela e mong oa bana le bahlanka ba hae, ba ratuoang. 'Me o tla mo fumanela grasia, ho phetha mosebetsi oo, ka botšepehi bo botle haholo. Mohalaleli o re: "Ke eena ea phethang mesebetsi ea rōna".

204* 2. Joalokaha Rebecca a entse ho Jakobo, o ba neha likeletso tse ntle: "Mor'a ka, latela likeletso tsa ka". (Gen. 27; 8). Har'a likeletso tse ngata, o ba khothaletsa hore ba mo tlisetse lipotsanyane tse peli; ke hore 'mele oa bona le moea oa bona! Ba li nehele tšebeletso ea hae, hore a tl'a tsebe ho ba etsa lekhotoane le monate, la Morena Molimo. Le hore ba tle ba tsebe ho boloka tsohle, tseo Jesu Kriste, Mor'a hae, a li rutileng ka mantsoe le ka liketso tsa Hae.

Haeba e se eena ka sebele sa hae, ea nehelanang ka likeletso tsona tsena, etlaba ka thomello ea mangelo. A fumanang ele hlompho e kholahali, le nyakallo ea 'nete! Ho ka a e-tla lefatšeng ka taelo ea Maria, ho tla thusa bahlanka ba hae ba tšepahalang.

205* 3. Ha re se re mo tlisetse, re bile re mo abetse 'mele le moea oa rōna, le tsohle-tsohle tsa tsona, ho se letho le setseng; o etsa'ng ka tsona, 'Mè eo ea molemo? O etsa seo Rebecca oa boholo-holo, a neng a se etse ka lipotsanyane tse peli, tseo Jakobo a neng a mo tlisetse tsona.

1. Oa li bolaal! Ke hore o li etsa hore li shoe, ka nqeng ea bophelo ba Adama oa khale.
2. Oa li buhal! A li mumule letlalo la tsona la mehla. Ke ho re: Litšekamelotsoa bona tsa botho, boithati ba bona, boithatelo le khomarello efe kapa efe, ho libōpuoa tsa lefatše.
3. O li hloekisa mamphemphe, litšila le libe tsa tsona.
4. O li lokisetsa letlötli le leholo la Morena Molimo! Le hore li tle li latsoehe ho Eena. Erekaha eena feela a le mong, a tseba ka tlalo ho hlabosehang, le ho nehang Morena Molimo tlötlö e kholo, ke eena feela a inotši, kantle ho phoso efe kapa efe, ea lokisang 'mele le moea oa rōna. Hore li tle li lokele tatso e phethehileng, le tlötli e patehileng ea Bomolimo, bo se nang pheletso.

206* 4. 'Mè enoa ea molemo, ha a se a amohetse nyehelo e phethehileng ea borona, ka ho ea ka borapeli boo ke buileng ka bona; 'me ha a se a re hlobolisitse liaparo, tsa rōna

tsa khale, oa re hlatsoa joale! 'Me a re etse hantle, hore re tle re hlahe re tšoaneleha! Ha re hlaha ka pele, ho Ntat'a rōna ea maholimong.

1. O re apesa ka tse ncha, tse hloekileng, tsa bohloko! Liaparo tse tšasitsoeng ka linoko tsa Esau, mojalefa. Ke ho re, Jesu Kriste, Mor'a hae. Tse matleng a hae, tseo a li bolokang ka tlung ea hae, hobane ke motšoari oa tlōtlo le seabi sa meuno eohle, le makhabane 'ohle a Jesu Kriste, Mora oa hae. O fana ka tsona, le ho li abela mang kapa mang eo a mo ratang; ka nako eo a e ratang le ka tekanyo eo a e ratang; joalokaha re se re ile ra bolela pele.
2. O koahela molala le matsoho a bahlanka ba hae ka matlaloana a lipotsanyane, tseo a seng a li bolaile a ba a li buha! Hoo ke ho re, a ba khabisa ka meuno le moputso oa liketso tsa bona. Ke 'nete hore o bolaea tsohle tse mpe, le tse sa phethahalang; oa li hloekise ka ho bona. Empa ha a lahle leha ele ho qhala letho le lokileng, leo grasia e le entseng ka ho bona. Tse joalo oa li boloka, oa li eketsa hore ka tsona a tle a khabise, a tiise molala le matsoho a bona! Ke ho re, o ba matlafatsa ho jara joko ea Moren'a bona (joko e jaroa molaleng). Le hore ba tle ba tsebe ho sebetsa tse hlollang, ho tlōtlisa Morena Molimo, le ho pholosa meeaa ea banab'abo bona.
3. Liaparong le likhabisong tsena, o eketsa linonetso le botle bo bong bo bocha, ka ho li apesa ka meuno le makhabane a hae ka sebele. Tsena, ke tseo a neng a ba siele tsona, mohla lefu la hae. Taba ena ke eo re ithutang eona, ka 'Mè e mong oa moiitami, ea hlokahtseng lekhlong le fetileng ka bohalaleli; a neng a e rutoe ka tšenolelo. Ke ka baka lena bohole ba lelapa la hae, ke ho re, bahlanka bohole ba hae le makhoba 'ohle a hae, ba fahlantšitseng liaparo tsa bona, ka tsa 'M'a bona Maria, le tsa moholoane oa bona Jesu Kriste, Mora oa Maria. "Bohole ba ntlo ea hae, ba apere ka ho fahlahantša!" Ka baka lena, ha ba hloke

ho tšaba ho bata ha Jesu Kriste ho reng bjoa, joaloka leholo! *Balahlehi bona ba hatsetseng, ba senang le khoejana thekeng, ke ho hloka* meuno ea Jesu Kriste le ea Maria Movirigo; ba tla sitoa ho mamella mohatsela oo.

207* 5. Khabareng Maria o ba fumanela hlohonolofatso, ea Ntat'a bona ea Leholidong. Lehoja hantle-ntle, ka hobane ele ba morao-rao le batholuoa feela; ba ne ba sa tšoaneloe ke eona. Joale ka liaparo tsa bona tse ncha, tsa bohlokohali, tse nkhang monko oa ho jeoa ke monate, ba khabile moeeng le 'meleng oa bona! Ka ho khahleha, ba atamela ka tšepo e kholo malaong a Ntat'a bona *ea Maholimong. Outloa lentsoe la bona la boetsalibe! O ama matsoho a bona a thatiloeng ka matlaloanal* O utloa lephoka le monate la monko oa liaparo tsa bona. Ka thabo o itjella se monate seo Maria, 'M'a bona a mo lokiselitseng sona. 'Me o hlokomela hore ba na le meuno le monko o monate oa Mora oa hae le oa Maria, 'M'a Hae ea Lehlohonolo.

1. O ba fa hlohonolofatso e fahlahaneng, hlohonolofatso ea phoka ea Leholido. Ke ho re grasia ea Molimo, eo e leng peo ea letlotlo la leholimo: "Molimo o re hlohonolofatse ka mahlohonolo 'ohle a moea ho Kriste Jesu!" Le ka hlohonolofatso ea manoni a tsa lefatše! Ke ho re Ntate enoa ea molemo o ba thusa ka bohobe ba bona, ba tsatsi le leng le leng. Le ka bongata bo lekaneng, ba tsa maruo a fatše lena.

2. O ba etsa marena holim'a bana ba bo-bona, eleng balahlehi! Hase hore borena ba bona bo hlahela kamehla, lefatšeng lena le fetang, leo hangata balahlehi ba busang ho lona. "Ke bone ea khopo a phahamisitsoe haholo 'me a kaka-sitsoe joaloka Cedara ea Libano!" (Pesalema 36: 35). Empa leha ho le joalo, borena ba bona ke ba 'nete! Ebile bo tla hlahela hantle fatšeng le tlang ka bosafeleng. Moo ba lokileng, ho ea kamoo re bolelloang kateng ke Moea o Halalelang, ba tla busa lichaba ba li laele. (Bohlale 3: 8).

3. Bomolimo bo hlomphehang, ha bo khotso ka ho ba hlohonolofatsa feela, bona le maruo a bona! Empa bo hlohonolofatsa bohle ba ba hlohonolofatsang, bo bile bo rohaka bohle ba ba rohakang, ba ba hlorisang!

II. Oa ba hlokomela.

208* Mosebetsi oa bobeli oa lerato, oo Mofumahali oa rōna a o etsetsang bahlanka ba hae ba tsepahalang, ke hore o ba fumanela tsohle tseo ba li hlokang; 'meleng le moeeng oa bona. O ba apesa ka ho fahlahantša liaparo tsa bona, joalkaha re se re boletse. O ba fepa ka lijo tse hlabosehang ka mokhoa o makatsang, tse tsoang tafoleng ea linoni ea Molimol! O ba neha Bohobe ba Bophelo hore ba bo je, boo a bo phehileng: "Itlatseng ka litholoana tsa ka!" (Eccli. 24: 26) O re: "Bana ba ka ba ratehang, itlatseng ka litholoana tsa ka; ke ho re, ka Jesu Kriste, Tholoana ea Bophelo, Eo ke le tliselitseng Eena lefatšeng!" O rialo hape: "Tlong le je bohobe ba me, eleng Jesu Kriste. Le noe le veine ea lerato la Hae, eo ke e tsoakileng ka lebese la letsoele la ka!" Erekaha Maria ele mtsaara-tlotlo, le seabi sa limpho le ligrasia tsa Ea-holimo-limo, karolo e 'ngoe e ntle, e ntlehali ka sebele, o e beha kathoko! Hore a tle a fepe 'me a phelise bana ba hae le bahlanka ba hae ka eona. Ba nontsoa ka Bohobe ba Bophelo, ba noesoa veine e otlang bavirigo! (Zak. 9; 17). Ba nkela sefubeng sa hae! Ke ka bobebe bo makatsang ba jarang joko ea Kriste, hoo ba batlang ba sa utloe boima ba eona, ka baka la oli ea borapeli bona boo a e nolofatsang ka bona.

III. Oa ba Tsamaisa.

209* Mosebetsi oa boraro oa Mofumahali oa rōna, oo a o etsetsang bahlanka ba hae ba tsepahalang, ke ho ba tsamaisa le ho ba rupela ka ho ea ka thato ea Mor'a hae. Rebecca o n'a tsamaisa moshanyana Jakobo. A bile a mo

neha likeletso tse ntle hangatanyana; ho mo fumanela hlohonolofatsa ea ntat'ae. Kapa ho mo pholosa boreng le tlhorisong ea ngoan'abo Esau. Maria, Naleli ea Leoatle, o sesisetsa bahlanka bohle ba hae ba tsepahalang, lebopong la pholohol! O ba bontša litsela tsa bosafeleng; o ba thibela hore ba se tšohe ba e-ea ka tsela tse kotsil! O ba tataisa ka letsoho la hae litseleng tsa ho loka. Ha ba batla ba e-oa, oa ba tšoara; haeba ba oele, oa ba tsosa. Haeba ba etsa phoso, o ba khalemela joaloka 'M'a bona ea ba ratang. Esitana le ho ba shapa ka lerato la botsoali ba hae. Na u re ngoana ea mame lang Maria, 'M'ae ea mo hlokamelang, eo e leng motsamaisi oa hae ea se-lihali, a ka lahleha tseleng ea pholohol? "Ha u mo latela u ke ke ua lahlehal!" Ho rialo mohalaleli Bernard. U seke ua tšoaroa ke tšabo ea hore ngoana oa 'nete oa Maria, a ka thetsoa ke satane, eaba o oela bokhelohing! Moo Maria a leng teng, moea o litšila le lithetso tsa oona, kapa bakhelohi le mano a bona, ba ke ke ba fumanoa: "Ha Maria a u tšoere u ke ke ua oa!" Ho rialo Bernard ea halalelang.

IV. Oa ba Sireletsa.

210* Mosebetsi oa bone oo Mofumahali oa rōna, a o etsetsang bana le bahlanka ba hae ba tsepahalang, ke ho ba qobeletsa le ho ba sireletsa lireneng tsa bona. Ka tlhokomelo le ka boiteko ba hae, Rebecca o ne a lopolle Jakobo likotsing tsohle tse neng li mo kopetse hare; haholo-holo lefung la mtsoho a Esau, ngoan'abo. Joalokaha ho n'o bonahala hantle hore o n'a tla 'molaea; hobane o n'a mo hloile haholo, a bile a le mona ke eena. Joaloka ha Kaine a n'a hloile Abel ngoan'abo. Maria, 'Mè ea ratehang oa bakhethua, o ba pata tlas'a mapheo a hae a tshireletso, joaloka khoho ha e pata litsuonyana tsa eona. O bua le bona, oa inyenye fatsa hore a tle ho bona ka lerato la hae, o iphapanyetsa mefokolo ea bona. Ho ba sireletsa ho phakoe le manong, oa ba oka-okela, ebile o tsamaea le bona joaloka lethathama la bahlabani ntoeng. Na

motho, ea potapotiloeng ke seholpha se itokisitseng hantle, sa bahlabani ba likete tsa lekholo, a ka tšoha na? Mohlanka ea tšepahalang oa Maria, erekaha eena a potapotiloeng ke tširele-tso ea Maria, le ke matla a borena bo boholo, ha a hloke ho itšosa ka letho. 'Mè enoa ea molemo, Khosatsana ena e matla ea Leholido, kapele-pele a ka romela boieane ba mangelo, ho thusa e mong oa bahlanka ba hae! Ho keke ha utloahala hore mohlanka ea tšepahalang oa Maria, ha a mo tšepele, a ka hloloa ka baka la bokhopo, le bongata ba matla a lira tsa hae.

V. Oa ba Rapella.

211* Taba ea qetello, le mosebetsi o moholo-holo oa bohlano, oo 'Mè enoa ea lerato a o etssetsang bachese-heli ba hae ba tšepahalang, ke ho ba buella ho Mor'a hae! Ho mo nolofatsa ka lithapeloa tsa hae! Ho ba kopanya le Eena ka tlamahano ea tlama-thata, le ho boloka kopano eo.

Rebecca o n'a laele Jakobo ho atamela malaong a ntat'ae. Eaba Mopatriareka enoa oa mo ama, a mo sika sefubeng sa hae, a ba a mo aka ka thabo! Ke ho khotsofatsoa le ke khora ea lijo tse lokisitsoeng hantle, tseo Jakobo a ileng a mo tlisettsa tsona. Joale hoba a utloe monko o monate oa lia-paro tsa hae, ka thabo e kholo, a hoa, a re: "Utloang monko oa mor'a kal! Eka monko o monate oa tšimo e tšoetšoethang; eo Morena a e hlohonolofalitseng!" Tšimo ena e tletseng, eo monko oa eona o thabisitseng pelo ea ntat'a hakana-kana, hase tšimo efe kapa efe haese oona monko-monate, oa meuno ea makhabane a Maria; eo eleng tšimo e tšoetšoethang grasia, eo ho eona Molimo-Ntate a jalileng tihaku ea koro e tsoalang bakhethuo; ke ho re Jesu, Mora a inotši oa Hae.

Ana o amoheleha hakaakang ho Jesu Kriste, Ntat'a lefatše le tlang, ngoana ea nonelitsoeng ka monko oa Maria! Oho, lehlohonolo! Kamoo ngoana eo a potlakeloang ho kopanngoa le Jesu Kriste, le hona ka tlamahano ea lesika – motlama-thata! Empa ena ke taba eo re seng re buile ka eona, le hona halelele.

212* Ho feta moo, ha Maria a se a bokeletse mahlohonolo a hae, holim'a bana le bahlanka ba hae ba tšepahalang, ha a se a ba fumanetse tlhoholofatso ea Ntat'a rōna ea Maholimong, le kopano ea bona le Jesu Kriste, o ba boloka ho Jesu Kriste, le Jesu Kriste ka ho bona. Oa ba aloisa, o ba hllokomba bosiu le motšeare; esere ba lahleheloa ke grasia ea Molimo, ba oela lichehong tsa lira tsa bona: "O boloka bahalaleli phethehong ea bona!" Ebile o ba etsa hore ba phehelle, joalokaha re se re boletse, ho fihlela ba fihla leholimong.

Ke ena he, tlhaloso ea setšoantšo se seholo sa boholo-holo; sa bakhethuo le sa balahlehi. Setšoantšo se sa tsejoeng, se bileng se tletseng limisteri ka mokhoa o maka-tsang!

LITHOLOANA TSE HOLLOWANG KA BOTLE,
TSE HLAHISOANG KE BORAPELI BONA,
ka
MOEENG O TŠEPAHALANG HO BONA.

213* Uena ngoan'eso ea ratehang, nkhloeo ha ke re litho-
loana tsena tse latelang li tla ba teng moeeng oa hao;
haeba feela u tšepahala maitekong a kahare le a kantle a
borapeli bona, boo ke tla u bontša bona:

Tholoana ea Pele: Boitsebo le Boinyeliso ba rōna.

Leseling leo Moea o Halalelang o tla u neha Iona ka
Maria, monyaluoia oa Hae ea tšepahalang, u tla tseba khorula
e litšila e kahare ho uena. U tla tseba ho hloka matla ha hao
malebana le mosebetsi ofe kapa ofe o motle, oo u ka o etsang
feela ka thuso ea Morena Molimo. 'Me joale ka baka la boi-
tsebo bona ba hao, u tla inyelisa e le uena, u be u ichebe ka ho
itšaba habohlokol! U tla italima u le khofu e senyang tsohle ka
bolokoe ba eona! Kapa u le sehohoana se senyang tsohle ka
moea oa sona o chefo! Kapa u italime u le noha e bonokoane,
e batlang ho thetsa feela. Qetellong, Maria eleng Moikokobe-
tsi e Moholo, o tla u arolela boikokobetso ba hae hoo, ha u fela
u inyelisa ebile u rata hore u nyelisoe ke ba bang, uena u sa tl'o
nyelisa motho mang kapa mang.

Tholoana ea Bobeli: Kabelo Tumelong ea Maria.

214* Maria Movirigo o tla u arolela tumelo ea hae, eo, ha a
ntse a phela mona lefatšeng, e neng e feta hole ka
boholo tumelo ea Baptriakera, Baprofeta, Baapostola le
Bahalaleli bohle. Joale ha a le leholimong moo a busang teng,



*Thuto ea Louis-Maria oa Montfort holim'a Borapeli ho Maria
Movirigo "E na le cheseho, e tiile, e otlolohile!"*

Puis XII

*ha a sa e hloka tumelo ena; kaha a bona lintho tsohle tsa Molimo, ka leseli la letlötlo. Leha ho le joalo, e bile thato ea Eaholimo-limo, hore a se lahleheloe ke tumelo ena ka ho kena leholimong. Empa a e boloke, ele hore a tle a e bolokele Kereke e loanang, bakeng la bahlanka ba hae ba tsepahalang. Ka baka lena, ho ea kamoo u tla hapa pelo ea Khosatsana ena e hlomphehang, Movirigo ea tsepehang, ke moo tumelo e hloekileng ea hao, e tla bonahala hantle mesebetsing ea hao. Tumelo e hloekileng e tla u etsa hore u se hapjoe ke moea oa tse phahameng, leha ele maikutlo a feto-fetohang a pelo. Tumelo e phelang, e khannoang ke lerato la Molimo, e u thusang hore u etse mesebetsi ea hao ka baka la lerato la Molimo feela! Tumelo e tiileng, e sa tsitsinyeheng, eo ka eona, joaloka lefika, u tla ema u tiile, u sa thekesele har'a lifefo le maqhubu! Tumelo e mafolo-folo, e roromelang, eo, joaloka senotlolo sa mohlolo pula-hohle, e tla u bulela linnete tse hlolang kutloisiso tsa Jesu Kriste, tsa qetello ea motho! E u kenyé *pelong ea Molimo ka sebele!* Tumelo e sebete eo ka eona, u kekeng ua 'na ua lika-lika ho jara tse kholo, le ho li phetha ka baka la Morena Molimo, le pholoho ea meea ea batho.*

Qetellong, tumelo ena e tla ba lebone la hao le khanyang, bophelo ba Molimo ho uena, tlötlo e patiloeng ea Bohlale ba Molimo ho uena! Lebone la hao le matla 'ohle; leo ka lona u tla bonesetsa bao, ba ntseng ba tsamaea lefifing le moriting oa lefu. Ho hotetsa bao ba foofo 'me ba hlokang gauda e chesang ea lerato la Molimo. Ho kenyá bophelo ho bao ba shoeleng ke sebe! Ka mantsoe a monate 'me a matla: Ho tsitsinya le ho sokolla lipelo tsa majoe a moralla-phofu le licidara tsa Libano! Khabareng, ho qhala satane le lira tsohle tsa pholoho ea röna.

Tholoana ea Boraro: Grasia ea lerato le hloekileng.

215* 'Mè enoa ea molemo ea lerato le hloekileng, o tla tlosa *pelong ea hao matsoalo a senang motheho, le tšabo*

ea bokhoba bo bobe. O tla bula pelo ea hao, a e sarolle hore e jare melao ea Mor'a hae; ka bolokolohi bo halalelang ba bana ba Morena Molimo. A be a e tlatse ka lerato la hae le hloekileng, leo a tšoereng tlötlo ea lona. Ka baka leo ha u sa tla hlola u sebeletsa Morena Molimo, eo eleng lerato ka bolona, joalo-kaha u 'nile u etsa ho fihlela joale, ka tšabo. Empa kajeno u tla mo sebeletsa ka lerato le hloekileng. U tla mo talima ele ntat'ao ea lerato; eo kamehla u tla leka ho mo thabisa le ho bua le Eena, ka bolokolohi ba ngoana le ntat'ae. Haeba u ka ba le bomalimabe ba ho mo siteloa, u tla phakisa ho ikokobetsa u kope tšoarello ho Eena. U tla nanabeletsa letsoho la hao ho Eena joaloka mehla. 'Me u tsohe sebeng sa hao, ka pelo e tletseng lerato. U sa ipolaise matsoalo leha ele ho ituba hloho! U mpa u tsamaea ho ea ho Eena u sa nyahama pelo.

Tholoana ea Bone: Tšepo e Khqlo ho Molimo le Maria.

216* Mofumahali oa röna ea Lehlohonolo o tla tlatsa moea oa hao ka tšepo e kholo, ho Molimo le ho eena:

1. Hobane ha u sa tla hlola u atamela ho Jesu Kriste ka buuena, empa kamehla etlaba ka 'M'ao ea Molemo.
2. Hobane, erekaha u mo nehile meuno eohle ea hao, ligrasia le litefelo, hore a sebetse ka tsona kamoo a ratang kateng, le eena o tla u abela makhabane a hae. A u apese ka meuno ea hae; hoo u ka buang ka tšepo e kholo ho Morena Molimo, ua re: "Ke 'na enoa lekhabunyane la Morena, ha etsoe ho 'na ho ea ka polelo ea hao."
3. Ha u mo nehile 'mele le moea oa hao, u inehile eena ka ho tlala, Maria Movirigo, eena ea fanang ho ba fanang, ea fanang le ho feta bohle ba pelo e tšoeu, o tla ineha uena, lehoja ele ka mokhoa oa mohlolo; empa ke kannetel Hoo u ka buang ka sebete ua re ho eena: "Ke oa hao, oho Movirigo ea lehlohonolo, mpholose!" (Pes. 118, 94). Kapa joaloka morutua ea ratoang Johannes, ua re: "Ke u nkile u le tsohle ho 'na, oho 'Mè ea Lehlohonolo".

Hape u ka 'molella le Bonaventura ea Halalelang, ua re: "Bona hle, 'Mè Mofumahali, Mopholosi oa mel! Ke tla sebetsa ka tšepo e kholo ebile nke ke ka tšaba letho; hobane matla a ka le thoriso ea ka ho Molimo, ke uena 'Mè!' Kapa u ka eketsa le eena Bonaventura Mohalaleli, ua re: "Ke oa hao kaofela ha ka, le tsohle tsa ka! Oho Movirigo ea tlötlihang ho feta tsohle tse bopiloeng, ntumelle ke u etse letšao holim'a pelo ea ka; hobane lerato la hao le matla joaloka lefu!"

Hape u ka bua ka maikutlo a moprofeta ho Molimo, ua re: "Morena, pelo ea ka ha ea ka ea ikokomosa, leha ele mahlo a ka ho ikhantšal Ha kea ka ka tsamaea ke qethohile ke tse kholo, kapa tse ka holimo ho 'nä tse makatsang! Empa leha ho le joalo ha ho letho le ntlhabisang lihlong! Empa ke koetlile moea oa ka ka ho ikhothatsa! Ke joalokaha lesea le khoeleng maikutlong a tsa lefatše, le iphomolela sefubeng sa 'M'a lona! 'Me ke hona sefubeng sena, moo tsohle tse molemo ke li fumanang teng!"

4. Ebile ho tla eketsa tšepo ea hao ho Maria, ke hobane, joale ha u se u behile tsohle tse molemo tsa hao tšireletsong le paballong ea hae, hore a li sebelise kamoo a ratang kateng kapa a u bolokele tsona; u tla ikeisa ele uena. Hoba u behile tšepo e kholohali ho eena, eo eleng tlötlo ea hao. Oho, ke lehlohonolo le lekaakang la tšepo le la matšeliso, ho moea o ka bolelang kannete hore: "Tlötlo ea Molimo, ho eona Molimo o behile tsohle tsa Hae tsa bohlokoahali; eona Tlötlo eo ke ea Hae!" "Maria ke tlötlo ea Morena," Ho rialo mohalaleli.

Tholoana ea Bohlano: Nehelano ea Moea oa Maria.

217* Moea oa Maria o tla inehela uena, hore u tle u tsebe ho tlötliisa Morena. Ha feela u tsepahala borapeling bona, moea oa Maria, o tla nka sebaka sa moea oa hao ho ithabela

ho Molimo, Molopolli oa oona: "Moea oa Maria o ke o be ho e mong le e mong, ho tlötliisa Morena! Moea oa Maria o ke o be ho e mong le e mong, ho nyakalla ho Molimo, Molopolli oa oona!" Oho nako! Ho sisimoha monna e mong ea halalelang oa mehleng eona ena ea röna, ea neng a hotetsoa ke mollo oa lerato la Maria, – Nako eo ea mahlohonolo e tla tla neng? Ha Maria 'M'a Molimo a tla busa lipelong tsa batho ele Mofumahali le 'Musi? Ho li kenya ka tlalo 'Musong o moholo, oa Eaphahamileng ka ho fetisia Jesu, Mor'a Molimo? Meea e tla phela ka Maria neng, joalokaha 'mele o phela ka moea? Ha nako eo e fihla, batho re tla bona mehlolo lefatšeng! Hobane Moea o Halalelang, ka ho fumana monyaluoa ea ratoang oa Oona, a ikahetse meeeng ea batho, o tla tla ho bona ka bongata. O tlatse meeaa eo ka limpho tsa Oona, haholo-holo ka mpho ea Bohlale; eo ba tla sebetsa mehlolo ea grasia ka eona. Ngoan'eso ea ratehang, e tla tla neng bo, nako eo ea mahlohonolo, 'muso oa Maria? Ha meeaa e mengata, e khethiloeng, ea ba ea nehoa Maria ke Molimo, e keneng ka litotsoana ka-hare-hare ho bophelo bo kahare ba Maria; e tla fetoha Maria ea phelelang ho rata Jesu Kriste le ho mo tlötla? Nako eo e tla tla feela, mohla borapeli bona boo ke bo rutang, bo seng bo tsejoa bo bile bo sebelisoa. "Oho Jesu, hore 'Muso oa hao o tle, ha ho tle 'Muso oa Maria!"

Tholoana ea Botšeleta: Maria o tla hlahisa Jesu, ka moeeng o tsepahalang.

218* Haeba Maria, eo eleng sefate sa 'nete sa bophelo, a ötloa moeeng oa röna ka ho phetha maiteko a borapeli bona, ka nako ea teng o tla beha litholoana; 'me tholoana ena ke Jesu Kriste. Ke bona meeaa e mengata e batlang Jesu Kriste, ka tsela ena le eane! Ebile hangata, hoba ba qete ho ipolaea ka mosebetsi bosiu bohle, ba ka qetella ka ho re: "Lehoja re sebelitse bosiu bohle, ha rea fumana le lethol!" (Luka 5: 5).

Rona re ka re ho bona: "Le sebelitse haholo, empa le fumane ka seatla feela!" Jesu o sa fokola haholo ka ho lona. Empa ka tsela e senang sekoli ea Maria, le ka borapeli bona ba leholimo boo ke bo rutang, re sebetsa motšeare, re sebetsa qalong e halalelang, le teng re sebetsa hanyenyane haholo. Ha ho bosiu ho Maria, hoba ha ho sebe ho eena; ha ho le seritinyana feela. Maria ke qalo e halalelang, Sehlabelo sa Lihala-lelo moo bahalaleli ba etsetsoang 'me ba bopeloang teng!

219* Ak'u hlokomele hle, hore ke re: "Bahalaleli ba bopjoa ka ho Maria!" Ho na le phapano e kholohali mahareng a ho betla setšoantšo, ka ho se bataka ka hamore le ka chesele; le ho etsa setšoantšo, ka ho se akhela ka foromong. Libetli tsa litšoantšo li sebetsa ka ho fufuleloa ho hoholo, ho etsa litšoantšo, ka mokhoa ona oa ho betla; ebile li hloka nako e telele. Empa ka ho li bōpa, ba sebetsa habonolo; ebile ba li etsa kapele haholo! Mohalaleli Augustinus o bitsa Mofumahali oa rōna ea lehlohonolo: "Foromo ea Molimo!" "Ua tšoanelia hore ke u bitse foromo ea Molimo". (*Sermo 208*): *Maria ke sebōpi sa ho bōpa melimo. Eo ea akheloang foromong ena, kapele-pele oa bopjoa 'me o fetoloa Jesu Kriste!* Kastle ho mosebetsi o mongata, le hona ka nako e khutšoanyane, o fetoha Molimo! Kahobane o akhetsoe ka sebōping, sona se neng se böpe Morena Molimo.

220* Kea kholoa nka nepa hantle haholo, ka ho bapisa batسامaisi bao ba meea le batho ba bang ba borapeli. Ba ratang ho bopa Jesu Kriste, ka ho bona le ka ho ba bang ka tsela e 'ngoe, ka ntłe ho ena: Ke ba bapisa le libetli tseo, ka ho tšepa tsebo ea tsona, bohlale le bobetli ba tsona; li kubakang, ho se katleho, ka hamore le ka chesele ea bona, lejoe la moralla kapa sona sefate se matsutla-tsutla, ho leka ho etsa setšoantšo sa Jesu Kriste! Kamohlomong ha ba atlehe, ho hlahisa setšoantšo sa 'nete sa Jesu Kriste. Ka baka la hobane ba sa tsebe hantle ele bona, le ho hloka 'ona maele a Bojesu

Kriste, kamoo Jesu eleng Jesu kateng! Kapa ka baka la botope ba ho tšoara; botope bo senya mosebetsi kaofela. Empa haele bao ba *amohelang lekunutu lena la grasia, leo ke ba nehang lona, nka nepa ka ho ba tšoantša le lisehi le libopi, tseo ka ho fumana sebopi se setle Maria, eo ho eena Jesu Kriste ka botho le Bomolimo ba Hae hammoho a neng a bopjoe; li sa itšetleheng ka bohlale ba tsebo ea tsona. Empa li itšetleheng feela ka phetheho ea sebopi!* Li ikakhelang le ho itebala ho Maria, hore li fetohé litšoantšo tsa 'nete tsa Jesu Kriste.

221* A papiso e ntłe, ea 'nete! Empa ke mang ea tla e utloisia? Nka thaba haholo hle ngoan'eso, haeba u ka e tšoara, uena. Empa se lebale hore ke tse qhibilihisitsoeng feela, tse motoho, tse ka akheloang ka seboping. Eleng ho bolela hore u tšoanelia ho sila, le ho qhibilihisa Adama oa khale; ke ho re uena! Ele hore u tle u fetohé Adama e mocha, Maria!

Tholoana ea Bosupa: Letlotlo le Lehlohalii la Jesu Kriste.

222* Ka borapeli bona, ha feela u bo boloka ka tšoanelo ea bona, ka nako ea khoeli feela u tla neha Jesu Kriste tlotlo e fetang hole ea selemo, papisong le borapeli bofe kapa bofe; leha bo ka ba thata joang kapa joang! Ke bua taba ena ka mabaka ana:

1. Ke hobane, erekaha u etsa mesebetsi eohle ea hao ka Maria Movirigo, joalokaha borapeli bona bo u ruta joalo; u lahla hohang matla a boithatelo ba hao mererong ea hao, leha e ka ba e metle joang le joang! Hore hohang u tle u itahlele ho Maria; boithatelong, mererong le liketsong tsohle tsa hae leha u sa li tsebe. Ka mokhoa ona, u abeloa bophahamo ba litakatso tsa mesebetsi ea hae! Litakatso tsa hae tse neng li hloekile ka ho fetisisa, ho neha Morena Molimo tlotlo e kholohali, ka ketso esita le e nyenyane ea hae – Ere joalokaha a n'a ohla khoele, kapa a hlabia hang feela ka nale, ho roka letho le leng – Ketso ena ea hae e feta hole ka botle, eona ea Laurenti ea Halalelang!

Ea neng a shoe a halikiloe holim'a tšepe ea boshoela-tumelo bo tšabehang! Ketso e ntle ho feta liketso tsohle tsa boshoela-tumelo bo boholohali, le liketso tsa Bahalaleli bohle! Ke ka hona ha a ntse a phela lefatšeng, a neng a ipokellele bongata bo khaphatsehang ba meuno le ligrasial Hoo ho ka bang bonolo ho bala linaleli tsa leholimo, le marotholi a metsi a leoatle; kapa ho bala lehlabathe la leoatle; ho e-na le ho qeta bongata ba meuno le ligrasia tsa hae! Ebile ke ka Iona lebaka lena, a nehileng Morena Molimo tlotlo e kholohali, ho feta eo mangelo'i 'ohle le bahalaleli hammoho, ba kileng ba mo neha eona; kapa ba tlang ho mo etsetsa eona. Maria 'Mè, ha u motho, u Mohlolo! 'Me ha ho kamoo u kekeng ua etsa mehollo, ho meeaa e itahletseng ho uena ka tlalo le kahohle.

223* 2. Ka borapeli bona, moea oa motho, o nka mehopolo
le liketso tsa oona ese letho! Ompa o ichebela melemo
ea Maria feela, ho atamela ho Jesu Kriste le ho bua le Eena! Ka
ketso ena o bontša boikokobetso ba 'nete, ho feta meeaa eo e
meng e itšebeletsang ka boeona. 'Me eo ka ho se hlakomele, e
itšetleheng ka melemo ea eona; e bileng e itsepang ka baka la
boeona! Kahoo, moea oo, o neha Morena Molimo tlotlo e
kholohali ka ho fetisisa! Molimo enoa ea tlotlisoang hantle-
haholo, ke ba pelo e boikokobetso, feela.

224* 3. Mofumahali oa rōna ea Lehlohonolo, eo ka baka la
lerato la hae le se nang bolekanyo, o mosa ho amohela
matsohong a hae a senang sekoli, liketso tsa rōna tseo re mo
fang tsona. O li etsa hore li be ntle 'me li ratehe ka ho fetisisa!
Ke eena ka nama, ea li nehang Jesu Kriste. Ebile ha ho pelaelo
hore Moren'a rōna o fumana tlotliso ka ho nehoa ke Maria; ho
feta ha rōna ka matsoho a tletseng libe, re ka mo fa tsona ka
borona.

225* 4. Lebaka la qetello, ke lena: U keke ua hopola Maria,
Maria a sa hopole Morena Molimo, ho u buella! Ha ho
nako eo u ka rorisang Maria kapa ua mo hlompha; Maria a sa
rorise Molimo le ho mo hlompha, hammoho le uena. Hohang,

Maria ke Se-ea-ka Molimo! Ruri hoa tšoaneleha, hore a bitsoe
Se-ea-ka Molimo; eena ea phelelang Molimo feela! *Maria ke ketsisane ea Molimo; e buang, e phetang Molimo feela! Habea u re: "Maria!" Eena o re: "Molimo!"* Mohalaleli Elizabetha o ne a rorisa Maria, a 'mitsa ea *lehlohonolo hobane a ile a lumela. Hang Maria, Ketsisane e tšepahalang ea Molimo*, a bina, a re: "Moea oa ka o tlottisa Morena!" (Luka 1: 46). Seo Maria a neng a se etse mohla monene, o nts'a se etsa le kajeno ka tsatsi le leng le le leng. Ha a rorisoa, ha a ratoa kapa a hlompshoa, ha a nehoa letho lefe kapa lefe; Molimo oa rorisoa, Molimo oa ratoa, oa hlompshoa! 'Me ka Maria le ho Maria, Molimo o amohela limpho.





Lebitla la Louis-Maria oa Montfort ea Halalelang

MAITEKO A BORAPELI BONA

HLOHO EA PELE: MAITEKO A KANTLE

226* Le hoja borapeli bona ka bobona bo le kahare, le teng bo na le maiteko a kantle, a sa tšoanelang ho lahloa feela. "Ha le etsa tsena, le ne le sa tšoanela ho tlohela le tsane tse ling." Ho joalo, hobane maiteko a kantle ha a etsoa hantle, a thusa maiteko a kahare haholo; kahobane, motho erekaha kamehla a tsamaisoa ke matla a li amang, joaloka mahlo eleng pono, litsebe eleng kutlo, kamo le tatso, maiteko a kantle a mo hopotsa seo a se etsang kapa a tšoanelang ho se etsa. Le teng maiteko ana a kantle a hlile a hapa maikutlo a bao ba a bonang, eleng seo maiteko a kahare feela, akekeng a se hlahisa. Mona ho se be molefatše kapa monyekolli ea ka kenang ka letsako, ka ho bolela hore borapeli ba 'nete bo kahare, ka pelong! Le ka ho re, bo kantle bo tšoanelia ho nenoa, hobane bo ka 'na ba hlahisoa ke bokaako! Le hore borapeli bo tšoanelia ho pateha, le tse ling tse joalo. Ba buang joalo ke ba arabela le Moren'aka, ke re: "Etsang hore batho ba bone mesebetsi ea Iona e lokileng, ba tle ba ise tlotsiho Ntat'a Iona ea Lehelimong". (Matt. 5: 16). Joalokaha Mohalaleli Gregori a bolela, hase hore re tšoanelia ho ipolaisa borapeli le maiteko a bonoang kantle, hore feela re bonoe 'me re rorisoe ke batho, hona e ka ba bokaako feela. Empa taba ke hore liketso tse joalo ka mohlomong, li etsoa mahlong a batho ka morero oa ho thabisa Morena Molimo le ho mo tlotsi, re tsotelle ho nyelisoa kapa ho rorisoe ke batho.

Ka bokhutšoanyane ke tla hlahisa maiteko a kantle, ao ke a bitsang a kantle, eseng hobane a etsoa kantle ho moea o kahare, empa ele hobane a nka boemo bo bong ba 'ona, ho fapania le ao a kahare feela, ho se letho la 'ona le bonoang kantle.

1. Boinehelo le Maiteko a ho itokisetsa bona.

227* Boiteko ba pele:

Bao ba ratang ho nka borapeli bona, bo e-song ho etsoe Lebotho, lehoja re lakatsa joalo; ha ba se ba qetile bonyane matsatsi a leshome le metso e 'meli, – joalokaha re se re boeletse, Karolong ea pele ea boitokisetso bona, ba 'Muso oa Jesu Kriste – ka ho ikhohlopa moea oa lefatše, oona o loantšanang le moea oa Jesu Kriste; ka morao ho moo, ka nako ea beke tse tharo, ba tšoanelia ho itlatsa moea oa Jesu Kriste, ka Maria Movirigo ea Lehlohonolo. Ba tšoanelia ho latela tlhophiso ena:–

228* Bekeng ea pele, ba tla etsa lithapelo tsohle tsa bona, le liketso tsohle tsa borapeli ka morero oa ho fumana grasia ea ho itseba, le ea soabo ea libe tsa bona. 'Me ka oona morero ona, ba tšoanelia ho etsa liketso tsohle tsa bona ka moea oa 'nete oa boikokobetso. Haeba ba rata ba inahana ka seo ke se boletseng, holim'a botho ba rōna bo senyehileng. 'Me ka matsatsi a tšeletseng, ba ka ikhopola ele likhofu, liphoa-phoa, mekulubete, likolobe, linoha le lipoli! Kapa ba ka inahana ka litaba tsena tse tharo, tseo re li nkang ho Bernard ea Halalelang: "Hopola seo u neng u le sona: *Peo e bolileng!* Seo u leng sona: *Pitsa ea libolu!* Seo u tla ba sona: *Sejo sa liboko!*" Ba tla kopa Moren'a rōna le Moea o Halalelang, ho ba neha leseli, ka ho rapela joana: "Morena, ke mpe ke bone!" Kapa "Ke mpe ke itsebe!" Ka polelo ea Augustinus ea halalelang. "*Tlo Moea o Halalelang!*" Ebile ba tla bala litania tsa Moea o Halalelang ka matsatsi 'ohle, le thapelo e li latelang joaloka ha ho hhalositsoe karolong ea pele ea buka ena. Ba tla mathela ho Mofumahali oa rōna ea Lehlohonolo, hore a ba fumanele grasia ena e kholo eo eleng motheo oa tse ling. Kahoo ba tla etsa: "Ahe, Oho Naleli!" Le litania tsa Maria Movirigo, ka matsatsi 'ohle.

229* Bekeng ea bobeli, ka lithapelo tsa bona tsohle le ka mesebetsi eohle ea bona, ba tla leka ka matsatsi 'ohle ho ba le tsebo ea Maria Movirigo ea Lehlohonolo. Ba tla kopa tsebo ena ka Moea o Halalelang. 'Me ba tšoanelia ho bala le ho inahana ka seo re se boletseng, ka eena 'M'a rona. Joaloka bekeng ea pele, ba tla etsa ka matsatsi 'ohle Litania tsa Moea o Halalelang le Ave Maris Stella (Ahe O Naleli). Ba be ba eketse ka ho etsa Rosari e tletseng kapa bonyane likoto tse hlano, ho rapella tsebo ena ea Maria Movirigo.

230* Bekeng ea boraro, ba tla leka ka matla ho ba le tsebo ea Jesu Kriste. Ba ka 'na ba bala le ho inahana ka seo re se buileng holim'a Hae. Le ho etsa thapelo ea Augustinus ea Halalelang. Thapelo eo ba tla e fumana, ho ea qetellong ea Karolo ea Bobeli ea buka ena (No. 67). Hammoho le eena mohalaleli enoa, ba ka 'na ba pheta kamehla ba re: "Morena, ke mpe ke u tsebe!" Kapa: "Oho Morena, ke mpe ke bone hore na u mang!" Joaloka bekeng tse kapele, ba tla 'ne ba etse Litania tsa Moea o Halalelang le: "Ahe oho Naleli!" Ba be ba eketse ka Litania tsa Jesu, ka matsatsi 'ohle.

231* Qetellong ea beke tsena tse tharo, ba tla ea boipolelong. Ba amohele Sakramente ea Eukariste; ka morero oa ho inehela Jesu Kriste ele makhoba a Hae a lerato, ka matsoho a Maria. *Ka morao ho Kamohelo e Halalelang, eo ba tšoanelang ho etsa ka mokhoa o tla hhalosoa hamorao,* ba tla bala Ketso ea Boinehelo ba bona, bo ngotsoeng qetellong ea Buka ena. Ba tšoanelia ho e kopitsa kapa ba be le ba ba kopiletsang eona; haese haeba ba e-na le lipampiri tse seng li hatisitsoe. Ba tšoanelia ho li tekena hona mohla letsatsi leo.

232* Ekaba hantle haholo hore hona mohla letsatsi leo, ba etsetse Morena Jesu Kriste le 'M'a Hae ea Lehlohonolo, nyehelonyana e itseng. Ele tefo ea ho hloka botšepehi ha bona, lipallong tsa bona tsa Hlatsuo, kapa ele ho tiisa bohlanka ba bona pusong ea Jesu le Maria. Joale nyehelo ea mofuta

ona, e ke e etsoe ka tekanyo ea matla le borapeli ba e mong le e mong; joaloka boitimo, boithapiso, limpho tsa mohau, tsa mabone; leha e ne ekaba nalete feela, ho ba mpho ea nyehelo! Ha feela e nehoa ka pelo e ntle, ho n'o tla 'ne ho loke ho Jesu! Eena ea ichebelang pelo e ntle le boithatelo bo botle, ba motho.

233* Bonyane ka selemo se seng le se seng, ba tla nchafatsoa tsa boinehelo bona ba bona, hona tsatsing la boinehelo ba bona ba pele, ka ho etsa maiteko a tšoanang le a pele ka beke tse tharo. Ba ka 'na ba bo nchafatsa ka khoeli e 'ngoe le e 'ngoe, esita le ka tsatsi le leng le le leng, ka mantsoe ana a makhutšoanyane: "Ke oa Hao kaofela, le tsohle tsa ka ke tsa Hao, ka Maria 'M'a Hao ea Halalelang! Uena Jesu oa ka ea ratehang!"

2. Ho bala Mofapahloho o Monyenyane, oa Maria Movirigo ea Lehlohonolo

234* Boiteko ba Bobeli.

Ba tšoanelo ho etsa ka matsatsi 'ohle a bophelo ba bona, leha ese ka boikhathatso bo boholo, Mofapahloho o monyenyane oa Maria Movirigo ea lehlohonolo. O entsoeng ka: "Thapelo ea Morena" hararo. "Lumela Maria" haleshome le metso e 'meli. Ho hlompha litšitso le littlōtiso tse leshome le metso e 'meli, tsa Maria Movirigo ea Lehlohonolo. Borapeli bona ke ba khale-khale, ebile bo itšetlehile ka Mangolo a Halalelang. Joannes ea Halalelang, Moapostola, o n'a bone mosali ea moqhaka oa linaleli, tse leshome le metso e 'meli! A bile a hatile khoeli tlas'a maoto a hae! (Tšenolo 12: 1). Joale mosali eo, ka ho ea ka tlhaloso ea lihlalosi, ¹ke eena Maria Movirigo 'M'a Molimo oa rōna.

235* Ho na le mekhoa e mengata, ea ho etsa hantle mofapahloho ona o monyenyane! Empa ekaba ntho e telele haholo, ho e hlahisa mona. Moea o Halalelang, o tla ruta bao ba hlileng ba tšepahalang ka tlalo, borapeling bona. Leha ho le joalo, ho etsa ka mokhoa o bonolo oa mehla, re qala joana: "Amohela tloltiso ea ka, oho Movirigo ea Halalelang! Mphe matla a ho loantša lira tsa hao." Joale re bala: "Tumelo ea Baapostola." E ntan'o ba "Ntat'a rōna" le "Lumela Maria" hane, le "Letlōtlo..." joalo-joalo; ho fihlela qetellong. Re qetele ka ho bala thapelo: "Re balehela Tšireletsong ea hao..."

3. Ho roala Ketanenyana ea Tšepe.

236* Boiteko ba Boraro:

Ke taba e rorisehang haholo, e hlomphehang e bileng e nang le thuso e kholo, hore bona ba ikentseng makhoba a Jesu ka Maria, ba roale ketanenyana e ileng ea hlohonolofatsoa ka oona morero ona. Ele khopotso ea bokhoba ba bona ba lerato.

N.B. Liketane tsena, ha li roaloa ka pontšo ea bokhoba ba lerato ho Jesu ka Maria, ka ho ea ka keletso ea Louis Maria ea Halalelang, "Roman Congregationa" ha li li nyatse. (Anaceleta Furi Pontificii. First Series Col. 757). Ke 'nete hore lipontšo tsena tse kantle ha li etse borapeli; le hore motho ea nkileng borapeli bona, a ka 'na a li tlöhela ha a rata. Empa leha ho le joalo, nke ke ka lesa ho rorisa ka pelo ea ka eohle batho bao, eitseng ka ho khaola liketane tse mpe tsa satane, tseo sebe sa tlhaho, ka mohlomong esita le sona sebe sa motho ka mong, li neng li ba tšoere ka tsona, joale ele ka boithatelo ba bona, ba inkelang bokhoba bo tloltisehang ho Jesu Kriste. 'Me ba ithabelang le Pauluse ea Halalelang, ka liketane tseo ba li roetseng ka baka la Kriste (Ba-Efese 3: 1, Ba-Fil. 1: 9). Liketane, tseo, le hoja ele tšepe feela e hoashang, leha ho le joalo, lia tlötliseha 'me li bohlokoa ho feta liketane tsohle, tsa Marena a mebuso e meholohali.

¹Augustinus le Bernard ba halalelang le ba bang.

237* Ka nako e 'ngoe e fetileng, ho n'o se na ntho e nyelise-hang joaloka Sefapano! Empa kajeno, Sefapano ke tlötlo ea boithoriso bo boholo, har'a Bakriste. Le ka liketane tsa bokhoba, re ka 'na ra bolela ntho e tšoanang. Mehleng ea boholo-holo esita le mehleng ena, ha ho ntho e eisehang 'me e hlabisang lihlong, har'a bahedene, ho feta liketane tsena tsa Jesu Kriste! Empa har'a Bakriste, ha ho letho le rorisehang ho feta liketane tsena tsa Jesu Kriste! Hobane lia re lokolla, ebile li re sireletsa litlamong tse hlabisang lihlong tsa sebe le tsa satane. Li re neha bolokolohi, hape li re tlamella ho Jesu le Maria! Eseng ka likhoka kapa ka qobello, joaloka *makhoba a reretsoeng lefu; empa ka bolokolohi le ka lerato la Molimo*, joaloka bana: "Ke tla ba hulela ho 'na, ka liketane tsa lerato!" Morena Molimo o rialo, ka molomo oa moprofeta. Kahoo, li matla joaloka lefu, esitana le ho le feta; ho bona ba roalang lipetja tsena tse rorisehang, ba sa li lahle ho fihlela lefu la bona! Hoba, lehoja lefu le tla senya 'mele oa bona, ka ho o fetola mobu! Le tla sitoa ho senya liketane tsena tsa bokhoba ba bona! Hoba, erekaha ke tšepe, ha li kake tsa senyeha kapele. Ebile mohlomong mohla tsatsi la Bofelo, tsatsing la tsoho ea bona, liketane tsena, li tla fetoha e 'ngoe ea tlötiso tsa bona! Le hore e be liketane tsa leseli le tsa khanya. Ho lehlohonolo ke hona, makhoba a hlomphehang a Jesu ka Maria! A roalang ketane tsa bona, ho fihlela lebitleng!



238* Mabaka ke ana, ao re roalang liketane tsena ka 'ona:
1. Ho hopotsa mokriste lipallo tsa Hlatsuo ea hae, le nchafatso ea tsona e phethehileng ka ketso ea boinehelo bona. Le tlameho ea 'nete eo a nang le eona, ka ho tšepahala ho tsona. Erekaha batho ba atisa ho etsa lintho, ka ho latela

matla a 'mele oa bona, ho feta ho latela tumelo feela; ke habonolo ba lebalang litšoanelo tsa bona malebana le Molimo! Haeba ba sa fumane pontšonyana e 'ngoe e kantle, ho ba hopotsa litšoanelo tsena tsa bona! Liketanenyan tsena ke ntho e nang le thuso, ho ba hopotsa bokhoba ba sebe le ba satane; boo ka Hlatsuo ba tsoileng ho bona. Le boitlamo boo ba bo entseng ho Jesu ka Hlatsuo; joale ba bo tiisitseng ka nchafatso ea lipallo tsa bona. Le leng la mabaka, hore Bakriste ba bangata ebe ha ba inahane ka letho holim'a lipallo tsa bona tsa Hlatsuo, le hore ebe ba iphelela tje ka bahetene; ba sa kang ba tšepisa Morena Molimo le letho, ke hobane ha ba roale letho le leng la pontšo, le ba hopotsang lipallo tsena tsa bona.

239* 2. Lebaka le leng ke hore, ha re lihlong ka bokhoba le bohlanka ba rōna ho Jesu Kriste! Le hore re hlobotse bokhoba bo bobe ba sebe, satane le lefatše!

3. Hape ke tshireletso le thebe ea rōna, ho liketane tsa sebe le satane. Hobane re tlamehile ho roala liketane tsa sebe kapa tsa lerato la Molimo, le tsa photoho. "Liketane tsa sebe: kapa liketane tsa lerato la Molimo." (Osee, 11: 4)



240* Oho hle Ngoan'a 'mè; ha re khaole liketane tsa sebe le tsa baetsalibe, tsa lefatše le tsa ba lefatše, tsa satane le mahlahana a hae! 'Me jokonyana ea bona ea bobe, re e tjebele hole le rōna: "Re tla roba liketane tsa bona, re tjebele joko ea bona hole le rōna." 'Me ha re sebelisa mantsoe a Moea o Halalelang, re ka re: A re kenyeng maoto a rōna mahlaahle-leng a Hae a khabane! Le molaleng oa rōna, re roale liketane tsa Hae. "Kenya maoto a hao mahlaahleleng a hae, le molala oa hao liketaneng tsa hae." A re kobeng mahetla a rōna, re

jare Bohlale, boo eleng Jesu Kristel! 'Me re keke ra belaela ke litlamo tsa Hae. "Inama ngoan'aka, u jare Bohlale! 'Me u se ke ua khena ke litlamo tsa Hael" Hlokomele kamoo, pele ho mantsoe ana, Moea o Halalelang o lokisetsang moea oa motho kateng. Esere motho a tšoha a hana keletso ena ea bohloko: "Mamela, ngoan'aka, 'me u amohele keletso ea kutloisiso, 'me u se ke ua hana keletso ea ka!"

241* A k'u ntumelle hle, motsoalle oa ka ea ratehang, nke ke u nehe keletso e tšoanang, hammoho le Moea o Halalelang: "Liketane tsa Hae, ke ketane tsa bophelo!" Erekaha Jesu Kriste holim'a Sefapano, a tlamehile ho hulela batho bohle ho Eena, ba rata kapa ba sa rate, balahlehi o tla ba hulela khalefong ea Hae e phetetsang! A ba hule ka litlamo tsa bona tsa sebe, ho ba tlama joaloka makhoba a polao, le lisatane tse liheleng! Empa bakhethua bona, o tla ba hulela ho Eena, ka liketane tsa lerato, haholo mehleng ena ea morao: "Tsohle ke tla li hulela ho 'Na!' – Ke tla ba hula ka liketane tsa lerato!"

242* Makhoba ana a lerato a Jesu Kriste kapa batlamuo a ba Hae, ba ka jara liketane tsa bona ka ho li roala molaleng; matsohong, thekeng kapa maotong a bona. Ntate Vincenti Caraffa, Molaoli oa bosupa oa Kopano ea Jesu, ea shoeleng ka khalalelo selemong sa 1643, o n'a roala tšepe maotong a hae, ele pontšo ea bokhoba ba hae! 'Me o n'a atisa ho bolela hore o mpa a soaba hobane a sa lumelloe ho hla a tsamaea, a nts'a hulanya ketane har'a motse! Athe Moitlam Agnes oa Jesu, eo re seng re ile ra bua ka eena, o n'a itlama letheka ka eona tšepe ea bokhoba ba hae. Ba bang ba ne ba e roala molaleng ele tefelo, ka baka la likhama tsa liperela tseo ba neng ba li roala, ha ba le lefatšeng. Ba bang ba 'nile ba e roala matsohong a bona, ho ba hopotsa nakong ea mosebetsi oa matsoho, hore ke makhoba a Jesu Kriste.

4. Borapeli ba Cheshelo, ho Mysteri ea Mor'a Molimo, ea lkentseng Motho.

243* Boiteko ba Bone:

Makhoba a lerato a Jesu Kriste ka Maria, a tšoanelia ho ba le cheshelo e kholo mabapa le Boimothofatso ha Mor'a Molimo. Boo mokete oa bona o etsoang ka la 25 Hlakubele. Eleng misteri eo borapeli ba bona, bo itšetlehileng ka eona, kaha bo ne bo nyenyeletsoe ke Moea o Halalelang. Ka mabaka ana:

1. Ho hlompha le ho etsisa Mor'a Molimo, ea ipehileng tsamaisong ea Maria; ho neha Molimo Ntate tlötlo, le ho re pholosa. Boitšetleho bona, ka Maria, bo hlahella haholo Boinamafatsong bona ba Jesu Kriste. Hoba o ile a iketsa motlamuo a-lekhoba, popelong ea Maria Movirigo. Ebile a itšetlehile ka eena feela nthong tsohle.
2. Lebaka la bobeli ke ho leboha Morena Molimo, ka ligrasia tse kekeng tsa bapisoa tseo a li fileng Maria! Empa ho feta tsohle, eo ea ho mo khetha hore e be 'M'a Hae ea mo tšoanelang hantle haholo. Khetho ena ea Maria, e bona halitsoe ka 'nete ena ea Boinamafatso. Ana ke mabaka a mabeli a mantlha, a bokhoba ho Jesu ka Maria.

244* Ak'u hlokomele hle, hore ke atisa ho re: Lekhoba la Jesu ka Maria; Bokhoba ho Jesu ka Maria. Le teng ho se phoso, joalokaha ba bang ba entse. Re ka 'na ra re: Lekhoba la Maria! Bokhoba ho Movirigo ea Lehlohonolo! Empa leha ho le joalo, ke fumana eka ho molemo re re: lekhoba la Jesu ka Maria. Ena ke keletso eo re e fumaneng ho Ntate Tronson, Molaoli e moholo oa St. Sulpice; moprista ea tumileng ka bohlokolosi le ka bohalaleli bo butsoitseng. Mohla a neng a kopjoa keletso ke e mong oa bona bahlanka ba Kereke.

Mabaka a keletso eo ea hae ke ana:

245*

1. Erekaha re phela nakong tsa boikhantšo, metotsong eo bongata ba bahlalefi ba ikhotšeng moea, ea hloho tse ngata, tse tletseng nyekollo, tse fumanang phoso esita le maitekong a 'nete a tiileng a borapeli; ho molemo ka baka leo, ho bua ka Bokhoba ba Jesu ka Maria. Le hore re ipitse makhoba a Jesu Kriste, ho e-na le ho ipitsa makhoba a Maria. Ele hore re tle re qobe likhathatso tsa ho nyatsuoa le moo ho sa hlokahaleng. Kahoo re tla itheha lebitso ka ho ea kahohloli oa borapeli bona, eleng Jesu Kriste; eseng ka tsela ea bona, eleng Maria. Lohoja ruri ho se letho le re tšabisang, ho ipitsa ka le leng la mabitso ao a mabeli, joalokaha 'na ka sebele ke etsa. Ho tšoana le motho ea tlohang loting, ha Ntaote, a e-ea Maseru; a tla feta Roma ha Maama. Aka 'na a re o ea Roma kapa hore o ea Maseru. Ho bolela feela hore ke moeti ea eang Roma, ea bileng a fetelang Maseru; ka phapano ena: Roma ke tsela e otlolohileng ho ea Maseru, athe Maseru eona ke hona hae, moo leeto la hae le tla emisa teng.

246*

2. Erekaha Misteri ea mantilha e hlomphuoang 'me eo borapeli bona bo e hlometsoeng, ele eona ea ho iketsa motho, eo ka eona re fumanang Jesu a le ho Maria, a iketsa motho popelong ea hae; ho tšoaneleha hantle ho feta ha re re: Bokhoba ba Jesu ka Maria. Ba Jesu ea phelang, ea busang ka Maria! Ka ho ea ka thapelo e monate, ea batho bao ba baholo ba bangata: "Oho Jesu, ea phelang ka ho Maria, tl'o uphele ka ho rōna, ka moea oa Bohalaleli ba Hao..." joalo-joalo.

247*

3. Mokhoa ona oa ho bua, o hlalosa kopano ea tlama-hano e leng teng mahareng a Jesu le Maria. Ba kopane hona hoo e mong a leng ho e mong kaofela ha hae: Jesu kaofela ha Hae o ka ho Maria, le Maria kaofela ha hae o ka ho Jesu! Nka hla ka re: Maria ha esale eena, empa Jesu feela ke Eena ea leng mong ka ho Maria! Ho ka ba bonolo ho arola leseli ho letsatsi, ho e-na le ho arohanya Maria le Jesu. Hoo re

ka bitsang Moren'a rōna: "Jesu oa Maria!" Le Movirigo ea Lehlohonolo: "Maria oa Jesu!"

248*

1. Erekaha ho se sebaka sa hore ke eme mona, ke tle ke hhalose bokhabane le mahalima a misteri ena ea Jesu ea phelang, 'me ea busang ka ho Maria, kapa Boinkelo-Botho ba Lentsoe la Molimo, ke tla mpe ke re qaa-qaa melana ena e seng mekae. Boimothofatso ke misteri ea pele ea Jesu Kriste, e patehileng ho feta tsohle, e phahametseng tsohle, 'me e sa tsejoeng ho feta tsohle.

Misteri ena, popelong ea Maria – e bitsoang Ntlo ea Makunutu a Molimo – Aula Sacramentorum, ka puo ea bahalaleli hona mistering ena, Jesu a e-na le Maria, o ikhethetse bohle bao eleng Bakhethuoa ba Hae. Limisteri tsohle tseo a ileng a li sebetsa tsa Bophelo ba Hae, o ne a li amohela hona Mistering ena.

"Jesu hoba a kene lefatšeng a re: "Bona, oho Molimo, ke tlie ho tla phetha thato ea Hao!" Kahoo, misteri ena ke eona kakaretso ea limisteri tsohle. Kaha ke mona e phuthetse morero le grasia tse ling tsohle.

Re ka qetella ka hore, misteri ena ke terone ea mohau, ea ho fana ha Morena Molimo le ea letlötlo la Hae. Ho rōna ke terone ea mohau oa Molimo, hoba, erekaha re atamela ho Jesu ka Maria feela, re sitoa ho bona Jesu le ho bua le Eena, Maria a sa re buelle. Jesu ka baka la ho ba hlokolosi malebana le lithapelo tsa 'M'a Hae ea Ratehang, kamehla o thusa baetsalibe ba batho ka ligrasia le ka mohau oa Hae: "A re atameleng ka tšepo teroneng ea ligrasia".

Ka misteri ena, Maria ke terone ea limpho tsa Molimo. Hobane, haesale Adama e mocha, a ikahela leholimong lena la Hae lefatšeng! Morena Molimo o sebelitse ho Iona, mehlolo e mengata ka lekunutu, hoo mangeloj le batho bohle ba ka sitoang ho e kopa. Ke ka baka lena bahalaleli ba bitsang Maria, Mohlolo o tsotehang oa Molimo: "Magnificentia Dei!" – Joaloka hoja eka Morena Molimo, o tsoteha ho Maria feela!

Ho Molimo-Ntate, misteri ena, ke terone ea tlōtlo ea Hae. Hobane ebile ho Maria moo Jesu Kriste a ileng a khotsofatsa Ntat'ae ka ho tlala, ea neng a halefisitsoe ke batho! Moo a buselitseng teng ka ho tlala letlōtlo, leo Ntat'ae a neng a le senyelitsoe ka sebe. Ebile ho Maria, moo ka ho iketsa sehlabo sa sehlabelo ka thato ea Hae, le ka bophelo ba Hae, a nehileng Ntat'ae tlōtlo e kholohali, ho feta eo a neng a ka e etsetsoa ka mahlabelo 'ohle, a Molao oa Khale. A bileng a mo etselitseng tlōtliiso e lekanang boholo ba Hae; eo haesale a neng a e-s'o ka a e etsetsoa ke batho.

5. Chesehelo e kholo, mabapa le Tumeliso ea Lengeloi, le Rosari.

249* Boiteko ba Bohlano.

Bao ba tsamaeang ka borapeli bona, ba tšoanelo ho ba le cheseho e kholo ho lumelisa Maria (Tumeliso ea Lengeloi). Eo eleng Bakriste ba seng bakae feela, leha ba ka ba le leseli le leholo joang kapa joang; ba utloisisang bohloko ba eona, molemo, bokhabane le tlhokahalo ea eona. Maria Movirigo ka sebele sa hae, o bile a theoha le ho itlhahisa ho bahalaleli ba boholo, ba nang le leseli le leholo, ka nako tse fapaneng; ho tla ba neha thuto e hloekileng holim'a boholo ba eona. Bao ebile bo-Dominic, Joannes Capistra ba halalelang, le Alan de Rupe ea lehlohonolo.

Ba ngotse libuka tse hhalosang mehlolo, e ileng ea e-tsauala ka matla a thapelo ena, ho sokolla meeaa ea batho. Ba ne ba ruta, ba hoeletsa, ba bolela phatlalatsa hore, joalokaha pholoho ea batho bohole, e ne e qalehe ka "Ahe Maria!" Ka mokhoa o tšoanang, pholoho ea moea oa motho ka mong, e itsētlehile ka thapelo ena. Ba bolela hore ke eona thapelo ena, e nehiloeng lefatše lena le omileng le sa beheng, ho ba le Tholoana ea Bophelo! Le hore ha tnapeio ena e etsoa ka tšoanelo, e tla etsa hore lentsoe la Molimo le tsoale ka moeeng oa rōna; 'me le hlahise Jesu Kriste, Inoloana ea

Bophelo. Ba re bolella hore "Ahe Maria!" Ke phoka ea leholimo e noesetsang mobu oa moea oa rōna, hore o tle o behe litholoana tsa oona ka nako ea teng. Le hore moea o sa tšeilloeng ka thapelo ena, ka phoka ena ea leholimo, ha o behe tholoana. Empa o tsoala meutloa le Lihlaba-hlabane; 'me o lokela ho rohakoa ke Morena Molimo. (Baheberu 6: 8).

250* Ke sona seo Mofumahali oa rōna a neng a se senolele Alan de Rupe ea Lehlohonolo, malebana le boholo ba Rosari, joalokaha eena Ntate enoa a bolela bukeng ea hae: "Boholo ba Rosari". 'Me haesale e ntse e boleloa ke Cartagena. O re: "Ngoan'aka, tseba 'me u tsebise ba bang bohole hore ho hloea le ho balehela Tumeliso ea Lengeloi, eo ka eona lefatše lohle le neng le pholosoe, kapa ho e tsoafela; hona ke pontšo e batlang e nepa haholo, hore ea joalo o se a le haufi le ho lahlela".

Ana ke mantsoe a tšelisang, a bileng a harolang le-tsoalo! 'Me le joale ho b'o se bonolo ho rōna ho a lumela, hoja bopaki ba Dominic ea Halalelang, ea bileng teng pele ho eena, bo se bo tšehetse. Le bopaki ba batho ba bang ba bangata haesale, le bopaki ba tseo re ithutileng tsona, ho tloha makholong a mangata a lilemo. Hoba haesale ele taba e tse-joang kamehla, hore bao ba jereng sekhobo sa balahlehi joaloka bakhelohi bohole, batho ba se nang taba le Molimo, baetsi ba tse mpe, baikhantši le barati ba tsa lefatše, ba hloile: "Ahe Maria, le Rosari!" Kapa baa li nyelisa. Bakhelohi ba ntse ba ithuta: "Ntat'a rōna," le ho e etsa; empa eseng "Ahe Maria!" Kapa Rosari. Ha ba e batle hohang! Ba ka mpa ba roala noha le leotoana la naketsana, ho e-na le Rosari! Baikhantši le bona lehoja ele Bakatholike, erekaha ba tsamaea ka lekeke joaloka Ntat'a bona Lucifer, ba nyelisa "Ahe Maria!" Kapa ha ba e natse. Ba talima Rosari, ele borapeli ba basali-baholo! Kapa ba lithoto le maqaba, a sa tsebeng ho bala le ho ngola. Empa ieteng nalane ea bophelo ba batho, e paka hantle kamoo bao ba nang le matšoao a 'nete a Bakhethuoa, ba ratang: "Ahe

Maria" kateng, 'me ba e etsang ka thabo. 'Me ba e rorisang le kamoo ba eketsang ho rata thapelo ena kateng. Taba ena e bile ea boleloa ka sebele ke Maria Movirigo, Mofumahali oa rōna ea Lehlohonolo ho Alan de Rupe; hoba a 'molelle mantsoe ane ao ke qetang ho a nyafa.

251* Ho joalo ka baka la'ng le ka mokhoa o joang? Hase taba eo nka e bolelang, empa ke 'nete! 'Me ha ke na lekunu-tu le leng le fetang lena, ho tseba hore na motho ke oa Molimo ho feta lona, la ho eleloa hore o rata ho etsa: "Ahe Maria," le Rosari. Ke re: "O rata" ho etsa Rosari kapa: "Ahe Maria!" Hoba ka mohlomong motho a ka hloleha ho e etsa, ka baka le leng le mo sitisang la bothata. Empa leha ho le joalo, eena a nts'a e rata kamehla ebile a khothaletsa ba bang ho e etsa.

252* Meea ea Bakhetuoa, Makhoba a Jesu ka Maria, tsebang hore kamorao ho Ntat'a rōna; "Ahe Maria!" E phahametse lithapelo tsohle. Ke thothokiso e tsoeleletseng ho feta tsohle ho Maria! Hobane ke ka eona thothokiso ena Molimo ea Holimo-limo, a kileng a e etsetsa Maria ka Moarkangeloi Gabriele, ho hapa pelo ea hae. Matla a eona a bile a nela pelong ea Maria, hoo, ka baka la 'mitsa-pelo ea eona e mengata e patehileng, Maria a neng a tlamehe ho amohela misteri ena ea Mor'a Molimo ea ikentseng motho. Lehoja boikokobetsa ba hae bo le botebo bo tsejoang ke Molimo feela. Haeba le e etsa kamoo e tšoanelang ho etsoa kateng, thothokiso ena e tla le bulela lerato la pelo ea hae, ho se tika-tiko ea letho.

253* Ha e etsoa ka tšoanelo, ke ho re ka kelello, ka cheseho le ka hlompho: "Ahe Maria!" Ka ho ea ka mantsoe a Bahalaleli, ke sera sa satane, se mo mathisang la Ntšoekhe! Noto e mo bjajbaretsang lehata! Ke khalaletso ea meea ea batho, thabo ea mangeloi, sefela sa bakhethuoa se fumanoang Testamenteng e Ncha! Nyakallo ea Maria le tlōtlo ea Boraro bo Halalelang haholo: "Ahe Maria!" Ke phoka ea Lehholimo, e tlisetsang moea oa motho manoni. Ke kako e monate ea lerato le ea bohloeki eo re akang Maria, 'M'a rōna ka

iona! Ke rosa e khubelu eo re mo fang eonal Mpho ea perela ea bohloko ea rōna ho eenal Pitsana ea-tjela-'Mopi! Ea lijo tsa pha-Molimo, eo re mo nehang eonal Tsena ke lipapiso tse nehoang ke Bahalaleli.

254* Ka hona kea u kopa hle, ka lerato lea ke u ratang ka lona ho Jesu le Maria, hore u se khotsafale ke ho etsa mofaphahloho o monyenyanoe Movirigo ea Lehlohonolo! Empa u etse le eona Rosari ea likoto tse hlano. Ebile, haeba nako e u lumella, ekaba hantle haholo ho hla u etsa Rosari kaofela, ea likoto tse leshome le metso e mehlano, ka tsatsi le le leng le leng. Mohla lefu la hao u tla leboha, u rorise hora le letsatsi leo u nkileng mantsoe ana a ka ka lona. 'Me kamor'a ho jala litlhonolofatsong tsa Jesu le Maria, u tla kotula mahlohonolo a sa feleng a leholimo. "Ea jalang hanyenyanoe o tla kotula hanyenyanoe, 'me ea jalang haholo o tla kotula haholo."

6. Ho etsa thapelo ea Magnificat.

255* Boiteko ba Botšeleta. Makhoba a Maria, a tla atisa ho etsa "Magnificat". Moea oa ka o tlotsisa Morena! Ele ho lebohela Maria Movirigo, Mofumahali oa rōna ea lehlohonolo; ka ligrasia tseo Molimo a mo fileng tsona. Ba etsise D'Oignies ea Lehlohonolo, le bahalaleli ba bangata. "Magnificat" ke eona thapelo feela e le 'ngoe, sefela se le inotši se qapuoeng ke Movirigo ea Lehlohonolo! Nka hla ka re: Ke Jesu ka ho eena Maria, kaha e ne ele Jesu ea buang ka molomo oa 'M'a Hae. Ke mpho e kholahali ea tlotsi, eo Molimo a e fumaneng tlas'a molao oa grasia! Ha ka nqa e 'ngoe ele sefela se tibileng ka mokhoa o fetisisang, sa boikokobetsa le sa teboho! Leteng ke sefela se holimo ka ho fetisia 'me se phahametseng tse ling tsohle! Se fupere limisteri tse kholo hoo, tse bileng li patehileng hoo, le mangeloi ka sebele sa 'ona a sitoang ho li utloisia. Mohlalefi le morapeli e moholo Gerson, hoba a qete boholo ba bophelo ba hae, a ngola libuka tse tletseng bohlalefi le borapeli ba taba

tse thata-thata, ele hore a tie a roese mesebetsi ea hae eohle lesiba la tlokola; qetellong ea bophelo ba hae feela, eab'e ele hona feela a qalang ho hhalosa "Magnificat;" ka tšabo le thothomelo. Bukeng ea hae e kholohali, eo a e ngotseng holim'a "Magnificat", o re bolella tse kholo tse makatsang ka sefela sena se monate sa Molimo. Holim'a tse ling tseo a re bolellang tsona, o re Movirigo ea Lehlohonolo haholo ka sebele sa hae, o n'a atisa ho e etsa! Haholo-holo kamorao ho Kamohelo ea hae ele ketso ea teboho. Mohlalefi Benzonius, ha a hhalosa thapelo eona ena, o bolela mehlolo e mengata e etsahetseng ka matla a eona. O re manoletsa hore lisatane li baleha li qatile mehatla, ha li utloa mantsoe ana a "Magnificat": O bontšitse matla ka letsoho la Hae; o qhalantse ba ikhohomosang ka mehopolo ea lipelo tsa bona."

7. Nyeliso ea lefatše.

256* Boiteko ba Bosupa.

Makhoba a tšepahalang a Maria, a tlameha ho nyelisa lefatše hohang! Ho le hloea ka pelo ea bona eohle le ho le baleha ka mekhoa eohle, lefatše lena le senyehileng. 'Me hore ba tie ba atlehe ho le nyonya, ba ithusa ka ho sebelisa maiteko ao re a ngotseng karolong ea bobeli ea buka ena. (n. 227, j.j.)

HLOHO EA BOBELI: MAITEKO A ITSENG A KAHARE, BAKENG LA BAO BA RATANG HO PHETHEHA.

257* Kantle ho maiteko a kantle a borapeli bona, ao ke qetang ho bua ka 'ona 'me a sa tšoanelang ho tloheloa feela ka nyeliso kapa ka bohlasoa, empa a tšoanetseng ho lateloa kahohle, kamoo boemo le bophelo ba motho li tla mo lumella kateng, – kantle ho 'ona, a mang ke ana a kahare a halaletsang ka mokhoa oa mohlolo, ho bona bao Moea o Halalelang o ba biletang phethehong e kholohali.

Maiteko ana a ka boleloa ka mantsoe a mane, ke ana: Re etse liketso tsohle tsa rōna ka Maria, ho Maria le Maria,

le ka baka la Maria, ele hore ka mokhoa ona, re tie re tsebe ho li etsa hantle haholo ka Jesu, le Jesu, ho Jesu le ka baka la Jesu.

1. Ka Maria.

258* Re tšoanelo ho etsa liketso tsa rōna ka Maria, ke ho re, re tla tšoanelo ho mo mamela linthong tsohle. Re itumella hore re khannoë ke moea oa hae, oo e leng Moea o Halalelang oa Molimo: "Ba tsamaisoang ke moea oa Molimo, ke bona bao eleng bana ba Molimo": (Barom. 8: 14). Ba tsamaisoang ke moea oa Maria, ke bana ba Maria, joalokaha re se re hhalositse (No. 29-30). 'Me har'a bacheseheli bohle ba Mofumahali oa rōna ea Lehlohonolo, ke bona feela bao ba tsamaisoang ke moea oa hae; bao eleng bacheseheli ba 'nete 'me ba tšepahalang ba hae. Ke itse moea oa Maria ke Moea oa Molimo. Hobane Maria le kamohla, ha a ka a ba a itsamaisa. Empa kamehla eohle, o n'a tsamaisoa ke Moea oa Molimo o neng o mo topetse, hoo Moea oo oa Molimo, o ileng oa fetoha moea oa Maria.

Ka lona lebaka lena, mohalaleli Ambrose, o ile a bua a re: "Moea oa Maria o ke o be ka ho e mong le e mong oa rōna, ho tlötlisa Morena! Moea oa Maria, o be ka ho e mong le e mong oa rōna, ho nyakalla ho Molimo!" O lehlohonolo hakaa-kang moea oo! Joaloka moihami oa Kopano ea Jesu, Rodriguez, Frere ea lokileng, ea hlokahetseng ka bohalaleli (Hlokome-lang: Ke mohalaleli kajeno ka Mopapa Leo XII, ka 1888); o jeroeng hohang 'me o busoang ka tlalo, ke moea oa Maria: Moea o bonolo empa o matla, o chesehang empa o maele, o ikokobetsang empa o sebete, o hloekileng empa o thusang.

259* Motha ea batlang ho tsamaisoa ke moea ona oa Maria, o tšoanelo:

1. Ho tela moea oa hae, merero ea hae le boithatelo ba hae; pele a etsa ntho efe kapa efe. Joaloka, pele ho thapelo ea

boinahano, pele le ho etsa Missa kapa ho o mamela, pele ho Kamohelo, joalo-joalo. Hobane lefifi la moea oa rōna, bokhopo ba pelo ea rōna le ba mesebetsi ea rōna; lehoja eka li ntse li lokile ho rōna, li ka sitisa Moea o Halalelang oa Maria, haeba re ka tšoha re li latela.

2. Re tšoanelia ho inehela moea oa Maria, hore o re tsamaise 'me o re etse kamoo o ratang kateng. Re tšoanelia ho ipeha matsohong a hae a hloekileng le ho itšiea teng; joaloka sesebeliso matsohong a mosebelisi oa sona. Kapa joaloka foleiti matsohong a seletsi sa eona. Re tšoanelia ho itahlela ho eena le ho itebala teng; joaloka lejoe le akheloang bolibeng ba leoatle. Hona ho etsuoa habonolo feela: Ka nako ea motsotsoana, ka ho panya ha leihlo! Ke ho re, ka mohopolo feela oa kelello, ka tšisinyeho feela ea thato ea rōna. Kapa motho a ka 'na a etsa ka mantsoe, joana: "Kea itebala 'me ke ineha uena, oho 'Mè ea ratehang!" Eka 'na eaba ha re utloe monate ketsong eona ena, ea boikopanyo ba rōna le Maria! Empa 'nete eona, e tla 'ne e be eona. Lehoja ele taba eo ke kopang hore Molimo, a se e lumelle le kamohla. Empa ho ka tšoana leha re ne re ka re: "Ke ineha satane!" Eba re bolela re tiile! Le hoja taba ena e ne e ka boleloa joalo, motho a sa ikutloe phetoho e 'ngoe; leha ho le joalo re ne re tla ba ba satane, ele ka 'nete.
3. Ka nakonyana tse ngatanyana, ka nako ea mosebetsi le ka morao ho oona, re tšoanelia ho 'na re pheta ketso ena ea boinehelo le ea boikopanyo ba rōna le Maria. Ho ea kamoo re tla e pheta le ho latela sena kateng; ke moo re tla ikhalaletsa kapeie, le ho ba le kopano le Jesu Kriste kapele! Eleng motloang o tlamehileng ho hlahisoa ke kopano ea rōna le Maria; kaha moea oa Maria ele moea oa Jesu.

2. Le Maria.

260* Re tšoanelia ho etsa liketso tsa rōna le Maria. Ke ho re, liketsong tsohle tsa rōna, re tšoanelia ho talima Maria ele sesupiso sa rōna se qetileng kahohle, sa bokhabane bohle le sa phetheho. Botle le phetheho tse entsoeng ke Moea o Halalelang, ho motho oa nama le mal! Eo rōna re tšoanelang ho mo etsisa, ho ea kamoo matlanyana a rōna, a ka re jarang kateng. Ka baka lena, liketsong tsohle tsa rōna, re tšoanelia ho inahana hore na Maria eena, o ne a e etse joang? Kapa hore, na hoja a ne a le sebakeng sa rōna, o n'a ka e etsa joang? Ka khopolo eona ena, re tlameha ho inahana le ho itlhatalhoba holim'a makhabane a hae a maholo; ao a neng a e-na le 'ona ha a sa phela; haholo:-

1. Tumelo ea hae e phelang: Eo ka eona a neng a lumele polelo ea lengeloi, a sa belaelé. A ekholoa ka tieo eohle le ka botšepehi, ho fihlela maotong a Sefapano, Kalvaring.
2. Boikokobetso ba hae bo tebileng: Bo neng bo mo etsa hore a ipate, a itholele, a ipehe ka morao ho bohle! A mamelle tsohle tse mo hlahelang, ka khotso.
3. Bohloeki ba hae ba 'M'a Molimo: Bo sakang ba e-ba le thaka, le hore ha e sa tla ba teng Lehelimong le lefatšeng! Makhabane a hae joalo kaofela.

Ho se be ea lebalang, ke sa boetse ke pheta labobelii: Maria ke eena feela sebopi se le seng, se seholo sa Molimo (No. 218). Se etselitsoeng ho bopa litšoantšo tse phelang tsa Morena Molimo; kantle ho bothata bo boholo, le hona ka nako e khutsōane. Hopolang le teng, hore moea o fumaneng sebopi sena, 'me oa itahlela kahare ho sona, o potlakela ho fetoha Jesu Kriste! Eena ea neng a bopjoe ke sona ele kannete!

3. Ho Maria.

261* Re tšoanelo ho etsa liketso tsa rōna ka ho Maria! Ho utloisia boiteko bona, re tlameha ho tseba hore Mofuhali oa rōna, ke paradisi ea 'nete ea Adama e Mocha lefatšeng! Le hore Edene ea pele, e ne e le setšoantšo feela sa Maria. Hona mona paradising ea lefatše, ho na le maruo, mahali-hali, litšooa-li-bonoe, li-sa-boleloeng ka monate! Tseo Adama e Mocha eleng Jesu Kriste, a neng a li siee moo. Paradising ena ea Hae, a na a iketla ka ho lula ho eona khoeli tse robong; a etsa mehlolo ea hae ho eona! A bokella maruo a Hae a Bohlosi ba Hae ba Bomolimo! Sebaka sena se halalelang ka ho fetisisa, se entsoe ka mobu oa bohloeki feela, o senang sekoli le letho; o ileng oa bopa Adama e Mocha, oa mo fepa ho se koli le mphemphenyana, ka matla a Moea o Halalelang, o ikhahetseng moo! Paradising ena ea lefatše, ho mela sefate sa 'nete sa bophelo; se neng se hlahise Jesu Kriste, Tholoana ea Bophelo! Hona mona paradising ena, ho na le sefate sa tsebo ea botle le bobe, se hlahiseltseng lefatše Leseli.

Mobung ona oa leholimo, ho na le lifate tse lenngoeng ke Molimo ka sebele sa Hae, tsa ba tsa noesetsoa ka matla a Hae. *Tseo haesale li ntse li beha ka matsatsi ho fihlela kajeno, tholoana e monate ea tsa Molimo. Ho na le libaka tsa lipalesa tse khabileng ka mefuta-futa e bohehang, ea lipalesa tsa bokhabane; tse ntseng li betsa monko o monate; ho natefela esita le mangeloi!* Ho na le libaka tsa liphula tse talana tsa tšepo! *Liqhobosheane tse kekeng tsa fohloa ke letho; mehaho ea borena ea tšepo, le tse ling tse ngata.*

Moea o Halalelang feela, o ka manoletsa motho 'nete tse patiloeng ke lipapiso tsena tse fokolang! Sebakeng sena, moea o mapholi, ha oa senngoa ke letho! Sebakeng sena ha ho bosiu; empa ke letsatsi le khanyang la Botho bo Halalelang! Letsatsi le sa khurumetsoang la Bomolimo! Mona kamehla ho tla fumanoa sebopi se tukang sa lerato la Molimo! Moo tšepe e mafone, e hloekisoang ka mollo 'me e fetoloang gauda! Tlaase

kahare ho sona sebaka sena, ho phorosela noka ea boikokobetsuo, ka ho ikarola likarolo tse 'ne, e noesetsang sebaka sena sa mahapa-peloi Linoka tseo ke makhabane a maholo a mane.

262* Moea o Halalelang, ka molomo oa bo-Ntate ba Kereke, o sa boetse o bitsa Maria ka mabitso ana:-

1. Monyako oa Bochabela: Oo moprista e moholo, Jesu Kriste, a kenang ka oona, ha a etela lefatšeng lena; a bileng a tsoang ka oona. (Ezek. 44: 2-3).
2. Sehalalelo sa Bomolimo, Ntlo-kholo ea Boraro bo Halalelang, Terone ea Molimo, Motse oa Molimo; Aletare ea Molimo, Tempele ea Molimo, Lefatše la Molimo! Lithothokiso tsena le litlokola tsena, li bolela 'nete feela: Ho hhalosa mehlolo le ligrasia tsa mefuta-futa, tseo Ea-Holimo-limo a li sebelitseng ho Maria. Ruri a lerato! A letlötlo! A nyakkalo! A thabo; ho ba le hona ho kena le ho aha ho Maria! Moo Ea-Holimo-limo, a behileng terone ea Hae teng, ea letlotlo la Bomolimo ba Hae!

263* Empa ho thata hakaakang ho baetsalibe ba kang rōna, ho ba le matla; le leseli! Esita le ho lumelloa ho kena sebakeng sena se tlotlehang, 'me se halalelang ka mokhoa o fetisisang! Sebaka se sa lebeloang ke lengeloi le le leng la serafime, joaloka paradise ela ea pele ea lefatše! Empa sebaka se boliseng ba Moea o Halalelang ka sebele sa Oonal O itlhomieng moo ele Oona o inotši, Morena ka tlalo! 'Me ebile o bua o re, ka Maria: "Khaitseli, Monyaluoaa ka, ke Serapa se koalletsoeng! Seliba se kantelitsoeng!" Maria o lika-likelitsoe: Bana ba malimabe ba Adama le Eva, ba lelekiloeng serapeng sa paradisi ea lefatše, ba ka kena Paradising ena e ncha ka grasia feela e itseng, ea Moea o Halalelang; eo ba tlamehileng ho e sebeletsa.

264* Ha re se re fumane grasia ena ka ho tsepahala ha rōna, re tšoanelo ho ikhahela ka thabo, botteng bo kahare ba Maria; re iphomolele moo ka khotso, re itšoarelletse ka eena ka tšepo e kholo. Re ipate teng re sa tšohe letho. Re itahlele

sefubeng sa hae, se hloekileng sa bovirigo! Re sa sihe leha ele letho kantle.

1. Moea oa motho o fepjoa ka lebese la grasia ea hae, /e /a /erato /e monate la botsoali ba hae.
2. Moea oa motho o lokolloa likhathatsong, matsoalong le lipelaelong tse senang khaotso tsa moea.
3. Moea oa motho o phonyohela lira tsohle tsa oona: Satane, lefatše le sebe, tse e-song ho ka li kena hona ka mono. Ke ka baka lena, Maria a reng, ba sebetsang ka ho eena; ba ke ke ba etsa sebe: "Ba sebetsang ka ho 'na, ba ke ke ba etsa sebe". (Eccli. 24: 30). Ke hore bao ba ahang ka ho Mofumahali oa rōna ka moea, ba ke ke ba oela sebeng se seholo.
4. Moea oa motho o tla bopjoa ho Jesu Kriste, le Jesu Kriste a bopjoe ka ho oona. Hobane sefuba sa Maria, ka polelo ea bo-Ntate ba Kereke, ke Ntlo ea Makunutu a Molimo! Moo Jesu Kriste le bohle bakhethuoa, ba bopetsoeng teng: "Motho enoa le eane o tsoetsoe ho eena". (Pes. 86; 5).

4. Ka baka la Maria:

265* Khabareng, re tšoanelia ho etsa liketso tsohle tsa rōna ka baka la Maria. Hoba erekaha re inehetse tšebeletso ea Hae kahohle-hohle, ke toka hore re mo sebeletse joaloka bahlanka le makhoba a hae. Ka ketso ena, hase hore re mo nka ele mohloli oa qetello, oa mesebetsi ea rōna. Hoba mohloli oa qetello ke Jesu Kriste a inotši feela. Empa Maria re mo nka ele Leqoqolo, Naleli e pel'a Khoeli! 'Muelli oa rōna oa mohlolo, le Tsela e bobebé ho ea ho Jesu! Ka tsela ena, joaloka bahlanka le makhoba a 'nete, ha rea tšoanelia ho lula feela ka botsoa. Empa ka ho itsétleha ka tshireletso ea hae, re tšoanelia ho itjarisa mesebetsi e meholo; le ho e phetha ka baka la Mofumahali enoa ea phahameng. Re tšoanelia ho loanelia limpho tseo a li

filoeng ke Molimo ha ba bang ba li latola! Re eme le ho sireletsa boholo ba hae, ha ba bang ba bo nyenyefatsa. Haeba ele ntho e ka etsoang, re tšoanelia ho hulela bohle tšebeletsong ea hae, le borapeling bona ba 'nete 'me bo tiileng. Re tšoanelia ho rora le ho puruma! Ho loantša bao ba etsang borapeli bona motlalo ka ho soabisa Mor'a hae ka boitšoaro bo bobe ba bona. Le teng re tšoanelia ho tiisa borapeli bona ba 'nete. Empa bakeng la mesebetsinyana ena ea rōna ho eena, re seke ra lebella letho; haese tlota ea ho ba thepa feela, ea Mofumahali enoa ea ratehang! Le thabo'ea ho kopanngoa le Jesu, Mor'a hae, ka eena María! Katlamahano e satl'o khaola, bophelong bona le ba bosafeleng.

TLOTLO LE BE HO JESU KA HO MARIA!
TLOTLO LE BE HO MARIA KA HO JESU!
TLOTLO LE BE HO MOLIMO A INOTŠI!

Kakeletso

MOKHOA OA HO SEBELISA BORAPELI BONA, KAMOHELONG E HALALELANG.

I. Pele ho Kamohelo e Halalelang.

266* 1. Ikokobetse pel'a Morena Molimo, ka mokhoa o tebileng haholo.

2. Lahla botho ba hao bo senyehileng, le melemo eohle ea hao; leha ka pelo e ntla ea hao, u ka li hopola li e-na le thuso e kholo.

3. Nchafatsa boinehelo ba hao, ka ho re: "Ke oa hao kaofela ha ka, oho Maria 'Mè le Mofumahali ea ratehang oa ka; le tsohle tsa ka ke tsa hao!"

4. Kopa 'Mè enoa ea lerato, ho u kalima pelo ea hae, hore u tl'o amohele Mor'a hae *ka moea oa hae. Mo hopotse hore ke letlötlo la Mor'a hae le mo qosang, hore a seke a tla ka pelong e mamphemphe! E tsokotsehang, e kang ena ea hao. Eo ka hona, ekekeng ea tlohela ho se nyenyefatse letlotlo la Hae! Le hore mohlomong, e ka 'na ea lahleheloa ke Eena.* 'Molelle hore haeba a ka tla aha ka ho uena, ho amohele Mor'a hae, eleng ntho eo a ka e etsang; ka baka la borena boo a nang le bona, holim'a lipelo tsa rōna; Morena o tla amohehoa hantle, ke eena 'M'a Hae, ho se bobe le letho! Ho se kotsi ea hore a ka tshoa a tlotolloa, kapa moea o mo lahleheloa. (Pes. 46: 6): "Molimo o teng ho eena, 'me ha ho letho le ka senyehang". 'Molelle ka tshoar ea 'nete, hore tsohle tseo u mo fileng tsona tsa maruo a hao, li mo neha hlompho e 'nyenyane haholo! Empa joale ka Kamohelo ena ea Morena, u rata ho mo fa mpho e tshoanang le eona ela, a kang a e fuoa ke Molimo-Ntate oa Bosafeleng – Le hore he, ke tsela eo eena a tla fumana tlotlo e kholahalil! Ho feta ha u n'u ka mo fa maruo 'ohle a lefatše lena. Khabareng, u 'molelle hore, Jesu eo, ka baka la lerato le mo qollang har'a bohle, o nts'a rata ho iketla le ho itulela ho

eena. Lehoja ele ka moeeng oa hao, o litšila; o bileng o khoahlaapehileng ho feta setala, seo Jesu a neng a ikenele ho sona ka khotso! Ka baka la hobane eena Maria, a ne a le teng ka ho sona. Ka mantsoe ana a tletseng lerato, mo kope hore a u alime pelo ea hae. "Ke u nkile u le tsohle ho 'na, oho 'Mè Maria! Ak'u mphe pelo ea hao!"

II. Nakong ea Kamohelo e Halalelang.

267* Ha nako e atamela ea ho amohele Jesu, kamorao ho "Ntat'a rōna;" pheta hararo, u re ho Jesu: "Morena, ha kea tshoanel...!" Khetlo la pele, e be ka ho bolella Molimo-Ntate oa Bosafeleng – hore, ka baka la mehopola ea hao e mebe, le ka baka la ho hloka teboho ha hao, ho Eena Ntat'a rōna ea molemo hakana-kana, ha u tshoanele ho amohele Mora a inotši oa Hae. Empa ke feela ka baka la Maria, Lekhabunyane la hae, ea teng ka ho uena! Eena ea u sebeletsang 'me ea u kothaletsang ho ba le morolo le tshopo e kholahali; ho Bohlomphehi ba Bomolimo ba Hae: "Hobane o ntiisitse tshpong ka mokhoa oa mohlolo!" (Pes. 4: 10).

268* Ho Molimo Mora, u re: "Morena, ha kea tshoanel...." Ka baka la mantsoe a hao a sa tsebisahaleng, a mabel Le ka baka la ho hloka botšepehi ba hao, tshabeletsong ea Hae. Empa leha ho le joalo, 'molelle hore u mo kopa mohau le tshoarello; hobane u tla mo isa ka tlung ea 'M'a Hae le 'M'ao. Le hore u keke ua ba ua mo tlohela ho fihlela a lula kateng ho ba lehae la Hae. "Ka mo tshoara! 'Me nkeke ka mo tlohela ho fihlela ke mo isa ka tlung ea 'mè; le ka kamoreng ea motsoali oa kal!" (Cant. 3: 4). Mo kope hore a eme, a tle ka tlung ea Hae ea phomolo; ka arekeng ea khalaletso ea Hae! (Pes. 131: 8): "Tsoha Morena, u tle ka phomolelong ea Hao, areka eo u e halalelitseng!" 'Molelle hore ha u etsise Esau! Ka ho tshoar meunonyana ea hao, leha ele matla kapa boitokisetso ba hao. Empa u itshpetse eo ea Maria 'M'a hao ea ratehang, joalokaha

Jakobo a n'a tsepile bohlale ba 'm'ae Rebecca. 'Molelle hore lehoja u le moetsalibe hakana-kana, empa leha ho le joalo, u utloa u sa tšabe ho atamela Bohalaleli ba Hae; ka ho tšehetsoa le ho khabisoa ka meuno le makhabane, a 'M'a Hae ea Lehlonolo.

269* Ho Molimo Moea o Halalelang, u re: "Morena, ha kea tšoanel..." U 'molelle hore ka baka la nyebello le bokhopo mesebetsing ea hao, le ka baka la ho nyelisa leseli la Hae; ha u tšoanele ho amohela Sebabatso sa Lerato la Hael Empa tšepo ea hao ke Maria, Monyalua ea tšepahalang oa Hae. Bolela le Bernard ea halalelang, u re: "Maria ke matla a ka 'ohle, ke eena tšepo eohle ea ka". U ka mo kopa hore a ke a boele a khurumetse ka matla a hae hape Monyalua oa Hae; oa tlamahano ekekeng ea aroloa, Maria. Eo sefuba sa hae se hloekileng le ho feta, eo pelo ea hae e tukang ho feta ke lerato! 'Molelle hore haeba a sa tle ka moeeng oa hao, ha ho Jesu leha ele Maria, ea ka bang a bopjoa ka ho uena! Kapa leha ele ho fumana sebaka se ba tšoanelang.

III. Ka morao ho Kamohelo e Halalelang.

270* Ka morao ho Kamohelo e Halalelang, ka boitlhopharo bo kahare ba moea le ka mahlo a tutubetseng, u tšoanelia ho kenya Jesu pelong ea Maria. Mo nehe 'M'a Hae ea tla mo amohela ka lerato le leholo. A mo bee setulong sa hlompho, a mo khumamele ka hlonepho e tebileng! A mo rate ka mokhoa o mo tšoanelang, a mo nkele sefubeng sa hae. 'Me ka moea le ka 'nete o tla mo etsetsa liketso tsa hlompho e patehileng ho rōna, lefifing lena la bonka-ntjana.

271* Kapa u ka sala u khutsitse botebong ba boikokobetso ba pelo ea hao; ka pele ho Jesu ea phelang ka ho Maria, kapa joaloka lekhoba! Ema monyako oa ntlo ea borena, eo kahare ho eona, Morena a ntseng a bua le Mofumahali oa Hae. Joale ha ba ntse ba buisana joalo ba sa u hloke, u tla fofa ka


moea, u ee Leholimong le lefatšeng lohle, ho mema libōpuoa tsohle ho tla lebohal Ho khumamelia le ho rata Jesu ka Maria bakeng sa hao. "Tlong, re mo khumameleng bohle!" (Pes. 94: 6).

272* Kapa le teng, u ka kopa Jesu ka bouena u e-na le Maria, hore 'Muso oa Hae o tle lefatšeng, ka 'M'a Hae ea Halalelang haholo. Kapa u ka ikopela mpho ea bohlale ba Molimo, ea lerato la Molimo, tšoarello ea libe tsa hao, kapa grasia e 'ngoe. Empa kamehla e be ka Maria le ho Maria; ha uena u icheba ka nyeliso. U n'u bolele, u re: "Morena, u mpe u seke ua sheba libe tsa kal Empa ho 'na, sheba feela makhabane le meuno ea Marial" Joale ha u hopola libe tsa hao; u tla eketsa ka ho re: Ke 'na sera se seholohali sa Molimo, se entseng libel Ke tlameha ho tsoha le ho loana sennal Kapa u ka re: "Mpholose ho batho ba khopo ba baeki, ba bolotsana." (Pes. 3, 30). Kapa hape u ka 'na ua re: "E, Jesu oa ka, eka khona uena u hole ka moeeng oa ka, 'na ke nyamele! Oho Maria, 'Mè, u tšoanelia hore u hole kahare ho 'na, 'me 'na ke tlameha ho nyenyefala ho feta kamoo ke leng kateng ho fihlela joale!" (Gen. 1; 28). Oho Jesu le Maria, holang ka ho 'na le ka ho bohle ba phelang haufi le 'na!

273* Ho na le mehopolo e meng e mengata, eu Moea o Halalelang o e nyenyeletsang batho. 'Me eo ka eona, O tla u khanna. Haeba u ka hla ua itlhophara ka khutso ea moea hona ho tu, ua ithapisa qetol! 'Me ua tšepahala ruri borapeling bona bo boholo bo tebileng, boo ke u rutileng bona. Empa u selebale hore, Jesu o tla fumana tlötlo e kholohali Kamohelong ea hao e Halalelang, ho ea kamoo u tla lumella Maria hore e hle e be eena mong'a teng. 'Me ho ea kamoo u tla hil'u ikokobetse kateng, le ho mamela Jesu le Maria ka khotso le ka khutso; u sa ikhathatse ho bona le ho latsoa; ke moo u tla fa Maria sebaka se setlehalli sa ho sebeletsa Jesu le Jesu, sebaka sa ho sebetsa ka Maria! Hoba motho ea lokileng o phela ka tumelo linthong tsohle, empa haholo-holo ha a amohela Morena Kamohelong e Halalelang, eleng ketso ea tumelo: "Motho oa ka ea lokileng o phelisoa ke tumelo".



KOPANO EA BAPRISTA BA
MONTFORT LEFATSENG LOHLE



**KETSO EA BOINEHELO HO JESU KRISTE, BOHLALE BO
INKETSENG BOTHO, KA MATSOHO A MARIA MOVIRIGO.**

Oho Bohlale bo se nang qalo le qetello, bo inketseng Botho! Oho Jesu ea monate-nate, ea tlottlehang ka ho fetisia! Molimo ruri le Motho ruri! Mora a inotši oa Ntate oa Bosafeleng, le oa Maria eo esaleng ele Movirigo! Ke u khumamela ka boikokobetso bo tebileng, sefubeng le bohlomphehing ba Ntat'ao ka bosafeleng. Le teng ke u khumamela joalo pōpe-long ea bovirigo ea Maria, ka nako ea hao ea ho iketsa motho.

Kea u leboha ha u ikokobelitse ho nka sebopoho sa lekhoba, ele hore u tle u mpholose bokhobeng bo bobe ba satane. Kea u rorisa 'me kea u tlotla, ha u ile ua khahloa ke ho ipeha tlas'a Maria, 'M'a Hao ea Halalelang, linthong tsohle! Ele hore u tl'u nketse lekhoba le tsepahalang la Hao ka Eena. Empa, bomalimabe ba ka! Ke ho hloka teboho le ho se tsepahale hoo ke bileng le hona. Ha kea ka ka boloka lipallo tsa bokhosihali *ba hao, Hatsuong ea ka. Ha kea phethisa boitlamo ba ka!* Ha ke tsoanele ho bitsoa ngoana oa Hao leha ele lekhoba la Hao! 'Me erekaha ho se letho ho 'na le ka thibelang khalefo ea Hao le ho ntahla ha Hao; nkeke ka hiola ke leka ho tla ka bona, pel'a Bohlomphehi bo Tšabehang 'me bo Khala-lelo e fetisisang ba Hao! Ke ka baka lena ke mathelang bobue-ling ba 'M'a Hao ea Halalelang haholo, eo u mphileng eena ho mpuella ho uena. Ke ka eena ke tsepang ho fumana soabo le tšoarelo ea libe tsa ka ho Uena. Ho fumana Bohlale le ho bo boloka.

Lumela hle, uena Maria, 'Mè ea senang sekoli, Tabernakele e phelang ea Bomolimo! Eo Bohlale bo Safeleng, bo neng bo inyenbefatse ka ho ipata teng! Le hore bo tle bo khumameloe hona teng, ke mangeloi le batho! Lumela hle, Mofumahali oa Leholidi le oa lefatše, eo tsohle li leng tlas'a 'muso o moholo oa hae, tsohle tse tlas'a Molimo! Lumela hle, uena Setšabelo sa 'nete sa baetsalibe, uena eo mohau oa hao



LOUIS DE MONTFORT EA HALALELANG

Louis Marie Grignion o na hlahe ka la 31 Pherekhong, 1673, Montfort, Fora. A ba a fuoa Sakramente ea Hlatsuo hona teng. Ha a le lilemo li peli, o ile a ea holela lapeng habo mtseng oa Iffendic.

Ha a le lilemo li leshome le motso o mong, a ea sekolong se phahameng sa ma-Jesuits Rennes; motse-moholo oa Britani, lilemo tse robeli. Ha a qeta a ea ntsetsa pele lithuto tsa hae tsa boprista, sekolong sa St. Sulpice, Parisi.

A hloesetsoa bopristeng ka la 5 Phupjane, 1700. A ba a ikhethela ho tsejoa ka lebitso la Louis de Montfort, hobane ke moo a neng a hlatoetsoe teng. Mopapa Clementi XI, o ne a mo rehe lebitso la "Apostolic Missionary", eleng hore: Moapostola oa Moromuo. Louis a ikakhela ka setotsoana mosebetsing, a khothatsa liretereteng limishoneng tse ka bang makholo a mabeli. 'Me a ruta Evangelii ea lerato la Molimo ka matla a Moea, metseng le metsaneng e ka bophirima ho Fora.

Likopano tse tharo tse latelang tsa baitlami, ke litholoana tsa mesebetsi ea hae.

Ea pele ke: Barali ba Bohlale (Daughters of Wisdom). Ho sebeletsa ba mathateng a mefuta-futa, haholo ba teloang ke batho.

Ea bobeli ke: Baruti ba tsamaeang hohle ba ruta, ba behile tšepo ea bona ho Molimo feela. Ba ikopantse le Maria, ka ho ipeha matsohong a Molimo ka lerato.

Ho ne ho etsahala hore ba bang ba barutua ba hae, ba rongoe ho ea ruta katekisima ho mafutsana. Sehlopha seo se ne se hole hoo, se ne beng sa fetoha kopano ea boraro e bitsoang: Baena ba Gabriel ea Halalelang. 'Me ba utloisia hore mohlomi oa bona ke Montfort.

Bophelong ba hae Mohalaleli enoa, o n'a bitsoa Ntate ea Molemo oa Montfort. O n'a sa khathale ke ho khothatsa! A sebelisa lineho tse ngata tsa hae tsa ho bina; bokheleke ba ho roka, ho ngola, ho betla le ho etsa litšoantšo.

Montfort ebile sebini se seholo, sa Maria Movirigo. Se phatlalatsang sebaka sa Maria, morerong oa Molimo oa ho pholosa batho. Ha re bala libuka tsa hae, re tla senoleloa sephiri seo a se fumaneng ha a fuputsa, a bile a boha Bohlale ba Bosafeleng ba Molimo.

Montfort o ne a hlokahale la 28 'Mesa, 1716. Ebile moprista lilemo tse leshome le metso e tšeletseng. Empa o entse mosebetsi o moholo, o mongača ka mokhoa o hlollang.

★ ★ ★ ★ ★ ★


LENANEO LA LIKHAOLO

Linomoro:

SELELEKELA SA LITABA	1-13
KHAOLO EA PELE: TLHOKAHALO EA BORAPELI HO MARIA	14-59
METHEO EA BORAPELI HO MARIA	16-36
– Molimo o ratile ho iketsa Motho ka Maria	16-21
– Molimo o rata ho halaletsa meeaa ea batho ka Maria	22-36
LITHOLOANA TSA BORAPELI HO MARIA	37-59
– Maria ke Mofumahali oa lipelo tsa rōna	37-38
– Maria o hlokahala ho bohle, hore ba finyelle le-holimong	39-48
– Borapeli ho Maria, bo tla hlokahala haholo, lina-kong tsa morao	49-59
KHAOLO EA BOBELI: LINNETE TSA MANTLHA, MALEBANA LE BORAPELI, HO MARIA	
MOVIRIGO	60-89
JESU KRISTE KE EENA QETELLO, EA BORAPELI HO MARIA	61-67
RE MAKHOBA A JESU LE MARIA	68-77
RE TLAMEHA HO IKHOHLOPA BOBE BOO RE NANG LE BONA. MARIA O RE THUSA HO ETSA JOALO	78-82
RE HLOKA 'MUELLI E MONG, HO 'MUELLI OA RÔNA JESU KRISTE	83-86
HO THATA HAHOLO HO RÔNA HO BOLOKA LIGRASIA LE MATLOTLO, AO RE A FUMANENG HO MOLIMO. HO MOLEMO HO A BEHA TŠI-RELETSONG EA MARIA MOVIRIGO	87-89
KHAOLO EA BORARO: KHETHO EA BORAPELI BA 'NETE, HO MOFUMAHALI OA RÔNA	90-119

MATŠOAO A LITŠEBELETSO TSE FOSAHE-TSENG, LE BORAPELI BA 'NETE HO MOVIRIGO MARIA	92-144
- Bachesehellı ba bohata le litšebeletso tse fosa-hetseng:	
1. Babelaeli	93
2. Bo-Ramatsoalo	94-95
3. Baipontši	96
4. Baikhohomosi	97-100
5. Bo-Kahloane	101
6. Baikaketsi	102
7. Baithati	103-104
- Borapeli ba 'nete ho Mofumahali oa rōna	105-114
1. Bo Kahare	106
2. Bo Lerato	107
3. Boa Halalela	108
4. Bo Tiile	109
5. Ha boa sheba tsa Bona	110-114
MAITEKO A BORAPELI BA 'NETE HO MARIA MOVIRIGO	115-119
- Maiteko a maholo a kahare le a kantle	115-117
- Khetho ea boiteko bo phetehileng	118-119
KHAOLO EA BONE: SEO BORAPELI BA 'NETE-NETE HO MARIA MOVIRIGO, BO LENG SONA .	120-134
BOINEHELO BO PHETEHILENG, 'ME BO TLE-TSENG HO MARIA	121-125
NCHAFATSO EA SEBELE, EA LIPALLO TSA HLATSUO	126-134
KHAOLO EA BOHLANO: MABAKA A RE KHA-NELANG BORAPELING BONA	135-182
KA BORAPELI BONA, RE INEHEDA TŠEBELETSO EA MOLIMO	135-138
KA BORAPELI BONA, RE ETSISA JESU KRISTE LE MOLIMO KA SEBELE: RE ITEKA KA BOIKO-KOBETSO	139-143
LITHOLOANA TSE TSOTEHANG TSA BOINEHE-	

LO BO PHETEHILENG, HO MARIA MOVIRIGO ..	144-150
1. Maria o inehela lekhoba la hae ka lerato ..	144-145
2. Maria o hloekisa mesebetsi e metle ea rōna, oa e khabisa le ho e etsa hore, e amohelehe ho Mōr'a hae	146-150
BORAPELI BONA KE TSELA E NTLEHALI, EA HO NEHA MOLIMO TLTLISO E KHOLO HAHOLO ...	151
BORAPELI BONA BO HULELA MOTHOKOPA-NONG EA HAE, LE MORENA OA RÔNA JESU KRISTE	152-168
1. Borapeli bona ke tsela e bonolo	152-168
2. Borapeli bona ke tsela e khutšoanyane ..	155-156
3. Borapeli bona ke tsela e phetehileng	157-158
4. Borapeli bona ke tsela ea 'nete	159-168
BORAPELI BONA, BO RE NEHA BOLOKOLOHI BO BOHOLO, BA MOEA	169-170
KA BORAPELI BONA, RE BUSELETSA BANA-B'ABO RÔNA HAHOLO	171-172
BORAPELI BONA, KE TSELA E RORISEHANG EA HO PHEELA	173-182
KHAOLO EA BOTŠELELA: REBECCA LE JAKOBO KE SETŠOANTŠO, SE TŠOANTŠITSENG BORAPELI BONA BIBELENG	183-212
REBECCA LE JAKOBO	184-200
1. Nalane ea Jakobo	184
2. Tlhaloso ea Nalane ea Jakobo	185-200
MARIA MOVIRIGO LE MAKHOBA A HAE, A LERATO	201-212
1. Oa ba rata	201-207
2. Oa ba hlokomela	208
3. Oa ba tsamaisa	209
4. Oa ba sireletsa	210
5. Oa ba rapella	211-212
KHAOLO EA BOSUPA: LITHOLOANA TSE HOLLANG KA BOTLE, TSE HLAHISOANG KE BORA-	



*Louis-Marie oa Montfort o ngola buka ea hae:
"Borapeli ba 'Nete ho Maria."*

Khatiso ea Mazenod, Lesotho

PELI BONA	213-225
BOITSEPO LE BOINYELISO BA RÔNA	213
KABELO TUMELONG EA MARIA	214
GRASIA EA LERATO LE HLOEKILENG	215
TŠEPO E KHOLO HO MOLIMO LE MARIA	216
NEHELANO EA MOEA OA MARIA	217
MARIA O TLA HLAHISA JESU KA MOEENG O TŠEPAHALANG	218-221
LETLOTLO LE LEHOLOHALI LA JESU KRISTE..	222-225
KHAOLO EA BOROBELI: MAITEKO A BORAPELI BONA	226-265
MAITEKO A KANTLE	226-256
1. Boinehelo le maiteko a ho itokisetsa bona.	227-233
2. Ho bala thapelo ea Mofapahloho o monyenyane, oa Maria Movirigo ea lehlohonolo .	234-235
3. Ho roala ketanenyana ea tšepe	236-242
4. Borapeli ba chesehelo ho Misteri ea Mor'a Molimo, ea ikentseng Motho	243-248
5. Chesehelo e kholo, mabapa le Tumeliso ea Lengeloi le Rosari	249-254
6. Ho etsa "Magnificat": Moea oa ka o tlotsisa Morena	255
7. Nyeliso ea lefatše	256
MAITEKO A ITSENG A KAHARE, BAKENG LA BAO BA RATANG HO PHETHEHA	257-265
1. Ho etsa liketso tsa rôna ka Maria	258-259
2. Ho etsa liketso tsa rôna le Maria	260
3. Ho etsa liketso tsa rôna ho Maria	261-264
4. Ho etsa liketso tsa rôna ka baka la Maria .	265
KEKELETSO: MOKHOA OA HO SEBELISA BORA-PELI BONA, KAMOHELONG E HALALELANG .	266-273
1. Pele ho Kamohelo e Halalelang	266
2. Nakong ea Kamohelo e Halalelang	267-269
3. Ka morao ho Kamohelo e Halalelang	270-273
KETSO EA BOINEHELO HO JESU KRISTE, KA MATSOHO A MARIA.	

Immaculate Conception Mission
MONTFORT-FATHERS MISSIONARIES

Liphookoaneng 362 via Maputsoe
Leribe
Lesotho
(SOUTHERN AFRICA)

The collected writings of St. Louis Marie de Montfort are in the book:
GOD ALONE

Aterese ke ena:

Montfort Publications
Bay Shore, NY 11706

Address of Montfort Fathers in Lesotho:

Immaculate Conception Mission
Montfort Fathers Missionaries
Liphookoaneng 362 via Maputsoe
Leribe Lesotho